

EXODUS

IN

DALHO



**O'MOSO'MO
EI' EVENELE
GOLOSOLO' MILI MINANGUTI'
KULUHIZE-NGIDINE'
MONOVO
GULIVE GOHI MA
EKISODASI**



**EXODUS IN DANO
(UPPER ASARO)**

O'MOSO'MO
EI' EVENELE
GOLOSOLO' MILI MINANGUTI'
KULUHIZE-NGIDINE'
MONOVO
GULIVE GOHI MA
EKISODASI

Exodus in Dano
(Upper Asaro)



KULUHIZE-nGIDINE' 0

B

Exodus
In the Dano (Upper Asaro) language
of the Eastern Highlands Province,
Papua New Guinea

Trial edition
(50 copies)
June 2003

**Mene Buku Gizune' Monovomu'
Gomu' Gataa' Gamazi**

Mene buku nene O'moso'mo Ei' Evenele Golosolo' Mili Minanguti' Kuluhize-ngidine' Monovomu' nene Lunube gamazi Dano gamaziuti' do velepe' izo gizune' ne neive. Ido' do velepe' izo gizune' nene a'mine Ekisodasi gamazi gana' gizave nete engi' gamazi'ninguti' gizani' gamazilo' nene ningi di velepe' izi evene' ato atolite Ingilisi gamaziuti' gizika' gizika' angutikisi ido' Pisini gamaziutikisi nene ningo do velepe' izo gizune' ve.

Mene buku ne'mi gono do'mo novuvo evene' helpim i-nidani' engi' mukikumu' nene tangezo' ve lo nolo-ngiduve. O'moso'mo gulive'ine nene gele neive.

Neni' Gasenaho gizuve.

Mono' Godolou' Minani' Bukuliti Gulive'ine**Mono' Godolo Liteheu' Minani' Buku:**

Buku Gulive	Gulive Li'nibe
Inite' Mata' Gana' Api' Igi Soto' Ani' Monovo Gulive Gohi Ma Ne Genesisi	Api'
O'moso'mo Ei' Evenele Mini Goloso Igi Minanguti' Kuluhize-ngidine' Monovo Gulive Gohi Ma Ne Ekisodasi	Kul
Eveneto' Medeli Mini Mono' Gono Daa' Avetinemu' Lou' Gulive Gohi Ma Ne Levitikasi	Lou'
Isilaele' Aleve Nanike' Nizahe Li Gatani' Naba'inemu' Buku Gulive Gohi Ma Ne Naba	Nab
O'moso'mi Lou' Gamazi Mose' Gohi Gizo Lo-ngimine' Gulive Gohi Ma Ne Dizutelonomi	Goh
Zosua' Isilaele' Aleve Gizebo O-ngidingumu' Gamazi	Zos
Isilaele' Aleveti Gizebo Ve'ine Naba' Naba Minaditi Monovo	Giz
Luti'nimu' Gamazi	Lut
Samuveli'nimu' Neine' Buku Naba 1	1 Sam
Samuveli'nimu' Neine' Buku Naba 2	2 Sam
Zuda Velo' Ido' Isilaele' Velo' Gizebo Igi Kini Minaveliti Monovo'mi Buku Naba 1	1 Kin
Zuda Velo' Ido' Isilaele' Velo' Gizebo Igi Kini Minaveliti Monovo'mi Buku Naba 2	2 Kin
Zuda Velo' Ido' Isilaele' Velo' Soto' Ani' Initeliti Monovomu' Buku Naba 1	1 Mon
Zuda Velo' Ido' Isilaele' Velo' Soto' Ani' Initeliti Monovomu' Buku Naba 2	2 Mon
Ezela' Gamazi've	Ezel
Nehemia' Gamazi've	Neh
Esta' Gamazi've	Est
Zopu' Gamazi've	Zop
Mono' Nama Buku Gulive Gohi Ma Ne Sam Nama Buku	Nam
Minevo' Alevu' Laminekumu' Lo Neine' Monovo'mi Gamazi	Lam
Gele nGee Lo Minaa' Ive'mo Line' Gamazi Gulive Gohi Ma Ne Ekelisiastis	nGe
Solomon' Line' Nama've	Sol
Polohete Isaia' Gizine' Gamazi	Isa
Polohete Zelemia' Gizine' Gamazi	Zel
Zelusalemi' Di Goloso Angumu' Ive Nama Ani'	Ive
Polohete Ezekieli' Gizine' Gamazi	Ezek
Danieli' Gizine' Gamazi	Dan
Polohete Hosea' Gizine' Gamazi	Hos
Polohete Zoeli' Gizine' Gamazi	Zoe
Polohete Amosi' Gizine' Gamazi	Amo
Polohete Obadia' Gizine' Gamazi	Oba
Polohete Zona' Gizine' Gamazi	Zna
Polohete Mika' Gizine' Gamazi	Mik
Polohete Nahumi' Gizine' Gamazi	Nah
Polohete Habakuku' Gizine' Gamazi	Hab
Polohete Zehania' Gizine' Gamazi	Zeh
Polohete Hagai' Gizine' Gamazi	Hag
Polohete Zekalia' Gizine' Gamazi	Zek
Polohete Malaki' Gizine' Gamazi	Mal

Mono' Godolo Gosohoku' Minani' Buku:

Buku Gulive	Gulive Li'nibe
Mataio'	Mat
Maleko'	Mak
Luka'	Luk
Zohane'	Zoh
Aposolo	Apo
Loma	Lom
1 Kolidi	1 Kod
2 Kolidi	2 Kod
Galatia	Gal
Eheso	Ehe
Hilipi	Hip
Kolosa	Kos
1 Tesalonika	1 Tes
2 Tesalonika	2 Tes
1 Timoteo'	1 Tim
2 Timoteo'	2 Tim
Tito'	Tit
Hilemoni'	Him
Hebilaio'	Heb
Zakobo'	Zak
1 Petolo'	1 Pet
2 Petolo'	2 Pet
1 Zohane'	1 Zoh
2 Zohane'	2 Zoh
3 Zohane'	3 Zoh
Zuda'	Zud
Leveleseni	Lev

**O'MOSO'MO
EI' EVENELE GOLOSOLO' MILI MINANGUTI'
KULUHIZE-nGIDINE' MONOVO VE**

Mene Bukumu' Gomu' Gataa' Gamazi

Mene buku nene Mose' gamazi've lingela ne neive. Gamazi've lingela nene buku linge maukisi gizikeni' neivo a'mingukisi gatelesane. Ido' mene bukuu' gamazi naba nene Isilaele' aleve Aigita misubou' mini vai' li Aigita veti goboni ve gehepeve lili' igi golosolo' mili minikevo O'moso'mo Mose'ni do kegeso engito' imiselo ei' anadunu' nene kuluhize-ngedo Aigita misubouti' ngele'mize heta misubo lamineta ngele'mize volosa vine' ne neive. Ido' O'moso'mo ne'mine ine' nene Izesu' olihe soto' amivo kilisimasi vani tauseni tili hadeti nevo'mine ha neido' ne'mine ine' ve.


Ido' buku me'mi gamazi've nene ize' molo sitohamo ne'mine do kegeso ningelesune:

Laka'ni 1 nelo' api' ogo gate'mo vo laka'ni 18 nela hulolone' nene Mose' soto' ogo evene' lodive neivo O'moso'mo Mose'ni nene soto' o emo do kegeso-do imiselavo aza vo ei' evenele Isilaele' aleve nene Aigita ve nete goboni mili-ngidi nizavo golosolo' mili minanguti' kuluhize-ngedo ngele'mizo novivo ebe' hadiveu' moni Sinae golo gizeneu' vi hetelani' gamazi nene gatelesune.

Ido' laka'ni 19 nelo' api' ogo gate'mo vo laka'ni 24 nela hulolone' nene Isilaele' aleveti O'moso'ine lolo' ogo mino lou' gamazi'ne ngemekuvo ingine neni' evene'ne zuho lili' igi mini a'mine lou' gamazi'nelokovo' e'meti igi mili minilizave lo O'moso'mo lo huko-ngedavo ingine ne'mine olosune li li huki O'mososi gamazi di hamo' angumu' gato O'moso'mo lou' gamazi've ato ato' ngimine' mukikumukisi nene gatelesune.

Ido' laka'ni 25 nelo' api' ogo gate'mo vo buku osu' lilido' laka'ni 40 nela hulolone' nene O'moso'mo ne'mine ilizani' monovo ngelebizavo Isilaele' aleve seli mono' numunosi ido' a'mingu' minilizani' inite' mukikisi lili' ani' gamazi nesi ido' eveneto' medeli mini O'moso imani' inite' lehizi-dilizavesi mono' gono lingela dalizavesi gono'nido' ngele'mizi milalizani' monovomu' gamazi nesi ido' evene' muki' monokumu' igi mili minilizani' monovomu' gamazi nesi gatelesune.

Ido' O'moso'mo a'mine Isilaele' aleve do kegeso-ngedo ei' evenele zuho lolo' o-ngedo gizebo o-ngede'mo vo minine' nene aza alinge' alingeta ei' gipele nene evene' ato ato' muki' do lu' izo lele'mize eita ilive lo imiselavo a'mine gipele aza evene' lolo' ogo Isilaele' aleveti' soto' ilive losa ne'mine ine' ve.'



Laka'ni 1

Isilaele' Aleve Aigita Misubou' Mini Vai' Likevo Aigita Ve Nete Goboni Mili-ngidani' Gamazi

- 1 Zakobo' Aigita misubou' vo minine' gameneu' ei' gipele
 zuho ingine vene' izipaha'inesi ngele'mizi ezesi maka' vi
2 minani' neti gulive'ine nene ne'mino neive:/ Leubeni' ve
3 Simeoni' ve Levi' ve Zuda' ve/ Isakala' ve Zebuluni' ve
4 Benizamini' ve/ Dani' ve Nahatali' ve nGadi' ve ido' Aseli'
5 ve.^a / Ido' eze zuho Zakobodati' soto' ave a'mine gamenelo'
 minani' neti naba'ine nene sevedi minani'. Gipele Zosehe'
 aza mo gomutati' Aigita misubou' vo minine' ve./
- 6 Alinge' Zosehekisi uvolomotesi akunolosi ido' engi' zuho
 vai' a'mine gameneu' minani' ingine hilika' hilika' igi osu'
7 lani'za^b / engi' nga'vopilemolite vai' li minikevo neloti'
 alinge' nene Isilaele' aleve nene Aigita misubou' mine hutile'
 goloso igii ele'vole' igi mini di dizani'.^c /
- 8 Ne'mine ikevo ve gohi ma Aigita veti guve'inesi ve
 nabalo' medelo mo'mosi've dani'. Ido' a'mine guve'inesi ve
 naba gosoho' ne'mo aza nene Zosehe'nimu' ma ningo

^a 1:1-4 Apo' 46:8-27

^b 1:6 Apo' 50:26; Apo 7:15

^c 1:7 Apo 7:17

- 9 gelamine'.^a / Ei' gizebolo' minave Aigita ve nene ti' lo lo-
ngimine': Ningilo. Isilaele' aleve mene vai' li mine hutile'
10 igi amuzo mili livile' ilizado' minikeve./ Ido' lovo ma soto'
iline' nene leze lovo veteu' vi gi'mizi libili hulisa mene
misubouti' golise vikelizaze. Laza gate gele lamine' ogo
ne'mine ilizani' aka'ine hize tile-ngede mineline' inite' ma o-
11 ngiduke'zo lo lo-ngimine'.^b / Ne'mine line' neemu' ingine
gonou' amuzo mala' mala' goloso i-ngidi Isilaele' aleve nene
goboni mili-ngidilizave li Aigita ve ma di oti gizebo ve'ine
nene ngele'mizi milani'. Ido' ne'mine ikevo Isilaele' aleve
nene Halao' govi noso' nite' molaa' numuno ebe' naba' naba
sita' gulive Pitomu ido' ma ne Lamesesi nene gizi-dani'./
12 Ne'mine ani'za Aigita ve nete ngele'mize goloso galasa i'mi
igivo' minani'. Ti' igi minani'za Isilaele' aleve nete soto' i
a'mingu' a'mingu' igi gohi vai' li'mi vi mine hutile' igivo'
minani'. Nemu' nene Aigita aleve nete Isilaele' alevemu'
13 golise gili minani'./ Ne'mine igi mulumo'inesi gilami gono
14 amuzo goloso mili ngimaa' ani'./ Ingingine numuno gizaa' biliki
lili' iga' gonosi ming'u' gono ato atokisi ido' geni gono goloso
gohi ma nesi amuzo mili gihi-ngidikevo geni gono gihivo'
minani' ne'mo minevo' alevone nene ekese' goloso ogave./
15 Kini Halao' aza Hebilaio vene' izipaha'ine gidilisa angu'
ngele'mize lamine' iga' asine' vene' Sihilaki Puvaki nene ti'
16 lo lo-ngimine':/ Lingingine Hebilaio vene' izipaha'ine gidilisa
angu' ngele'mize lamine' niigi ningasivo gipe gidikevo ma
a'mine gipe nene ngibili hililizo. Ido' alungo gidikevo ma
17 ngibilami ha huli-ngimikilizo./ Ne'mine lo line'za vene'
ingine O'mosomu' ngehelele izine' mini Halao' line' gamazi
nene gili hulisa umungive soto' ani' nene ngibili

^a 1:8 Apo 7:18

^b 1:10 Apo 7:19

- 18 hilamasine'.^a / nGibilamasivo Halao' aza asi lo-ngedavo
ikesivo lingine umungive nene ngibilami nanitekumu' huli-
19 ngidasive lo longo' o-ngidine'./ Longo' ogavo vene' ingine ti'
li lasine': Hebilaio vene' nene Aigita vene' ne'mine
nizamave. Inginge amuzo malehe vene' mini laza nene olihe
vo hetelamusivo izipaha'ine lite' li gidaa' nave li lasine'./
20 A'mine vene' netise ne'mine asine' nenako O'moso'mo do
lamine' o-ngidine'. Ido' Isilaele' aleve ingine vai' li'mi vi
21 mine hutile' igi ele'vole' i'mi vi di dizani'./ Ido' a'mine vene'
izipaha'ine gidilisa angu' ngele'mize lamine' iga' asine' vene'
netise O'mosomu' ngehelele izine' ne'mo nene O'moso'mo
22 izipaha'ine do soto' o-ngidine'./ Halao' aza gizebo o-ngede
minine' aleve muki' nene ti' lo lo-ngimine': Hebilaio nete
gipe gidilizani' mukita nene huli nosou' nosou' ikevo alungo
neevo' ne ha minilizave.^b

Laka'ni 2

Mose' Soto' Ogavo

Gosuvahaku' Di Ingi-di Nosou' Huli-dikevo

Halao' Aluvo Ne'mo Ningo Do Vo Gizebo O-dine' Monovo

- 1 Levi' a'vopilemo' zuhouti' ve mali'mo a'mine Levi'
2 muliseti' alu ma do minine'./ A'mine alu aza izipahala
minavo mino gipe gidine'. Ningine' nene izipe lamine'
goloso minavo ike'ni sitohamo nene do haleke-mikine'.^c /
3 Neloti' nene ngelo do haleke-de minamiline' ogavo gepe'
ne'minedunu' lili' ani' gosuvaha' ma do noso a'mingu'
dizalive lo kolotadunu' elelo do bizeko izipe nene a'mingu'
do ongo-do do hite-miko do vo noso gaheve guvise ha'na

^a 1:17 Kul 1:21

^b 1:22 Apo 7:19

^c 2:2 Apo 7:20, Heb 11:23

- 4 ha'nau' hulo-mikine'./ Ne'mine ogavo ateleho nene nadi' i-dilizaha lo hoto' nevo vo ote mino ninge minaa' ine'./
- 5 Halao' aluvo nene nosou' ongalosa nosola vavo gelekele' aluvo ingine a'mida noso gahevela moni minani'. Halao' aluvo ne'mo nosou' guvise dize miningu' gosuvaha' nene
- 6 ningo goboni alu mali'mo vo dalive lo imiseline'./ Vo do ogavo velelo' inite' di hitikani' nene do si'zo ningine' nene izipe ngomo ive ogo minine' nene ningine'. Ningo mulumo gele-do ti' lo line': Mene ve nene Hebilaio izipe noloseive./
- 7 Ne'mine lavo izipeli'mi ateleho ne'mo neida ogo ti' lo longo' o-dine': Naza vo Hebilaio vene' izipe amine emaa'
- 8 iline' ma ele'mize-gedalohe./ Longo' o-davo vo ele'mizo ano lavo a'mine alungo aza izipeli'mi izelehine vo ele'mizo ani'./
- 9 Ele'mizo ogavo Halao aluvo aza ti' lo lo-imine': Izipe mene do vo neni' gizebo o-nedo amine emeka' emeka' ogo minezo. Ne'mine oganivo naza meni gemelesuve. Ti' lo lavo izeleho aza nene do vo amine emeka' emeka' ogo minine'./
- 10 Ne'mine ogo neivo naba ogavo izeleho aza Halao' aluvo neida ele'mizo vavo aza neni' gipe'ne minelive lo do ti' o-do gulive molo nosouti' do hazala o-duvoni' nenako nemu' gulive *Mose' ve line'.^a

Mose' Aza

**Aigita Ve Ma Bele Helo A'minemu' Halao' Nebelalive Lo
Golise Hoto' Midiani Misubouko Vo Minine' Gamazi**

- 11 Mose' aza mo naba ogo gamene ma nene ei' evenele zuho Hebilaio aleve nene vo ninge-ngedo ingine geni gono naba gihi-ngidikevo di minani' nene ningine'. Ido' a'mida neivo Aigita ve mali'mo ei' Mose' zuho Hebilaio ve ma

^a A'mine gulive Mose' nene Hebilaio veti no'ninguti' nene do hazala ogakumu' laa' ani' ne'mine neive.

^a 2:10 Apo 7:21

- 12 nene nobilivo ningine'.^a / Ne'mine neivo Mose' aza ninge
 hulo hela hela ine' nene evene' ma nizamavo Aigita ve nene
 13 bele heloo ningikelizave lo gepeu' do galese izine'. / Vo ongo
 go' lavo ti'no vingu' nene Hebilaio ve sita' nene engi'
 oko'ningu' lovo nihizasivo ningine'. Ningo lovo do soto' ive
 ma nene ti' lo lo-imine': Gei' zuho nene nanimu' nobelane. /
 14 Ne'mine lavo a'mine ve aza ti' lo line': Geze nene leze
 gizebo vete ido' zasite mineline lo zaho hulo-gidive. Aigita
 ve belaine' ma'mino nezesi nebelelesa nabe. Ne'mine lavo
 Mose' aza echelele izavo ti' lo giline': Naza uvoni' inite' ma
 nene evenelite mo di soto' igi ningikeni' neive lo giline'.^b /
 15 Ido' Halao aza a'minemu' mo gelo Mose'ni belelesa lavo
 Mose' aza eitati' golise hoto' Midiani misubouko vo
 minine'.^c

- Vo hetelo noso engetikado' gahevela nene vo mito'
 16 minine'. / Eveneto' medelo mino O'moso imani' inite' lehize-
 daa' ive'mi aluvo seveni'a minani'. A'mine alu ingine igi
 a'mine noso engetikanguti' nene me'nibi meme' ize sipisipi
 17 izelite nalizani' noso ohizi mili-ngidilisa ani'. / Ne'mine navo
 ize atoto' gizebo ve malite igi alungo nene ngimiseli di
 hulikevo Mose' nene oto a'mine alungo zuho do ngu' izo
 18 engi' izeliti noso nene ohizo molo-ngedo minine'. / Ido'
 a'mine alungo nene mo me'nibo Leuveli' neida tine' mili
 vikevo Leuveli' aza ti' lo line': Lingine idise nene nadi' igisa
 19 lite' li ave. / Lavo ingine ti' li li-imani': Aigita ve mali'mo
 izelo' gizebo velite limiselanguti' do lu' izave. Ido' noso nesi
 20 ohizo izelitine molo-ngedave. / Li-imikevo me'nibo ti' lo
 line': Aza a'mine ve ne zau' neive. – Lingine nanimu' huli-
 miki ave. Vi vise li noso' nite' maka' nalone li ele'mizi alo

^a 2:11 Heb 11:24

^b 2:11-14 Apo7:23-28

^c 2:15 Apo 7:29; Heb 11:27

- 21 lo lo-ngedavo vi ele'mizi ani'./ Ido' alinge' nene Leuveli' aza gaza lelikisi maka' ongo monelone lo nogiluve lavo Mose' aza lamine' ve lavo Leuveli' aza nene aluvo Zipola'ni
- 22 elenaho ve lo imine'./ Emavo mini Zipola' aza gipe gidine'. Gedavo Mose' aza mene ebeku' nene venenga ve ma nouve lo gelo gulive *Gelesomu' ve lo molani'./
- 23 Kilisimasi ma igi vikevo Aigita veti guve'inesi ve naba nene hiline'za Isilaele' aleve ingine ha goboni ve mini geni gono goloso di mini agae agae li minani'. Ido' ne'mine igi minanguti' nene do ngu' izelivemu' ive nama igi minani'
- 24 nene O'moso'mo gelo/ aza gozopota Abalahamuda ido' Isakada ido' Zakoboda gamazi lo huko molangumu' nene
- 25 gohi gala giline'.^a / Ee, Isilaele' aleve geni gono goloso gihi-ngidikevo di minani' nene O'moso'mo ningo mulumo'ine nene ha gele minine'.

Laka'ni 3

**Za Li'nibe nGomou' Olo' Gulumo Ogo Mininguti'
O'moso'mi Angelo' Ne'mo Mose'ni Soto' O Imine'.
Soto' O Emo Ei' O'moso'mo Evenele Do nGu' Izelive Lo
Gono Emo Ido' Gulive'vesi Nene Lo-Emo
Gono Daline' Monovosi Nene Lo-Imine' Gamazi**

- 1 Mose' aza elenahi meleho Zetolo' ize'velo' nene gizebo ogo minaa' ine'. Zetolo' aza Midiani alevelo' medelo mino O'moso imani' inite' lehize-daa' ive minine'. Gamene ma Mose' aza ize nene ngele'mizo goko' ebeto' ledovo vo O'moso'mi golo Holebe' nela vo heteline'. A'mine golo'mi
- 2 gulive gohi ma nene Sinae ve./ A'mida neivo za li'nibe ngomo'mi lulouti' nene O'moso'mi angelo' ne'mo olo'

^{*} Gelesomu' nene Hebitaio vete no'ninguti' venenga vemu' laa' ani' gamazi ne'mine neive.

^a 2:24 Ap^t 15:13-14

gulumo ne'mine soto' ogo soto' o-imine'. Mose' ningine' nene
 a'mine za olo' lo minine'za za nene lo'votamo ha neivo
 3 ningine'./ Ningo aza za nene nanimu' lo'votamive. Ma



ningamuvo nite' soto' neine' nene avito' vosa ningelove lo
 4 giline'./ Ne'mine lo gelo Mose' nene omo avito' navo
 O'moso'mo ningo olo' lo mininguti' nene asi loo Mosee,
 5 Mose'zo line'. Lavo me nouve lo line'./ Lavo O'moso ne'mo
 ti' lo lo-imine': Neloti' nene avita olo' nolida nene amozo.
 O'moso'mi kekeize lo neine' ebeto' nene ote nane. Nene do
 6 goloso ogalinge. Gizengalo' inite' nene do hulozo./ Naza
 nene avamote gubi' izi nimaa' ani' O'moso'ine ma ne nouve.
 Ado' naza Abalahamule Isakale Zakoble O'moso'ine nouve
 line'. Ne'mine nolivo Mose' nene O'moso'mi golo vele
 ningelesa ehelele izavo golo velelo' do hitine'./
 7 Ti' ogavo Guvelesi ve aza ti' lo Mose'ni lo-imine': Neze
 evene'ne zuho Aigita misubou' geni gihi minani' nene mo

- ningekuve. Ido' gizebo ve'ine nete goboni mili-ngidi'mi igi nizavo nemu' agae agae li nizani' nene mo gelekuve.
- 8 Ne'mine igi mulumo alumo nigilani' nene gele mino/ naza Aigita veti a'ninguti' kuluhize-ngedo engi' misubouti' do heta o-ngedo misubo mauko ngele'mizo volosa nolimuve. A'mine misubo nene misubo naba lamine' gavoza misubo ido' lanite' noso' nite' lamine' vai' lo neine' misubo ve. Ado' Kanaha aleve Heti aleve Amoli aleve Pelizi aleve Hivi aleve ido' Zebusi aleve mini'mi moni nizani' misubouko
- 9 ngele'mizo volosuve./ Ee, Isilaele' aleve neti ive'ine nene gelo ido' Aigita velite gobonga li-ngidi minani' nene
- 10 ningekuve./ Nemu' nene idise alo' otezo. Neni' evene'ne Isilaele' aleve nene Aigita misubouti' ngele'mizo aline lo Halao' neida nene gimiselelesa nouve.^a /
- 11 Ne'mine lavo Mose' aza O'moso ti' lo lo-imine': Naza nene evene' naba nouhe. Ido' Halao' neida vo Isilaele' aleve Aigita misubou' nizanguti' ngele'mizo do alodo' lisihe'
- 12 amuve./ Lavo O'moso ti' lo line': Nenikisi maka' volosusive. Isilaele' aleve Aigita misubouti' ngele'mizo oganivo mene gololo' nene neni' obuvotine hizi nimilisave. Ido' ne'mine ilizani' ne'mo neni' gimiseluvoni' monovo nene soto' ogavo ningo gaka sita' gelamolosane./
- 13 Mose' aza O'moso ti' lo lo-imine': Naza Isilaele' aleve nizada vosa avotingi O'moso'ine ma'mo lengita nimiselavo nouve lokuvo ingine longo' i-nidi gulive zaho neve lilizani'
- 14 nene nadive lo-ngemelove.^b / Ne'mine lavo O'moso'mo ti' lo lo-imine': Naza nouvonitele ne nouve. Gaza ti' lo lo-ngemezo: Gulive've ^{*}Nouve ve live Guvetinesi ve'mo

^a 3:2-10 Apo 7:30-34

^b 3:13 Kul 6:2-3

^{*} O'moso'mo gulive've line' nene Zuda ve nete ti' li gizaa' ani': YHWH. Ido' a'mine gulive nene nadisa laa' ahe. Laza mo gele lamine' amune'za Zuda ve gozopo' aka'mila minaveti monovomu' gili gumo igi minave linge muki' nete a'mine gulive ne'mimi laa' ani' noloseive li laa' nave: Zahveh. Ne neiba alinge' Zuda ve nete O'moso'mi gulive

- 15 lengito' nimiselavo nouve.^a / Ne'mine lo O'moso'mo imine' molo Mose'ni ti' lo lo-imine': Isilaele' aleve nene ti' lo lo-ngemezo: Guvelesi ve Abalahamu' O'moso've Isaka' O'moso've ido' Zakobo' O'moso've engi' O'moso'ine ma'mo lengita nimiselavo nouve lo lo-ngemezo. A'mine lo-gimuvoni' gulive'ne nene mo minevo' minevo' ogovo' mineline' gulive'ne ne neive. Evene' soto' i'mi dizi minilizani' gamene mukiku' nene a'mine gulive neni' gulive'ne nene mineleseive./
- 16 Gaza vo Isilaele' aleveti gizebo ve'ine nene do nubo o-ngedo ti' lo lo-ngemezo: Guvelesi ve avotingi O'moso ne'mo soto' o nemave. Ee, Abalahamu' Isaka' Zakobo' engi' O'moso ne'mo soto' o nemo lengi' nene lo-ngemezo lo ti' lo lo-nimive; Naza lengita ogo ninguvoni' Aigita vete lengi'
- 17 nii-lingidani' inite' nene ningo/ ti' lo gele nouve: Naza Aigita misubou' mulumo alumo gili nizanguti' nene lengele'mizo vo Kanaha veti ido' Heti veti Amoli veti Pelizi veti Hivi veti ido' Zebusi veti misubouko do vo hulo-lengedekuvo neu' vi minilisave. A'mine misubo nene gavoza misubo lanite' noso' nite' lamine' vai' lo neine' misubo ne neive lo lo-nimive lo lo-ngemezo./
- 18 Lo-ngemanivo Isilaele' veti gizebo ve'ine nete a'mido' gili gimilisave. Ti' ikevo engikisi ngele'mizo vo Aigita veti guve'inesi ve naba neida nene vo ti' lo lo-emezo: Laza Guvetesi ve Hebilaio veti O'mosote aza lezela ogave. Nemu' nene idise hulo-ledanivo laza misubo hadiveu' gamene sitohamou' oga' aka nene vo nopelo ize belo oloku' gizo

kekeize lo neine' nene do gopo ogo laalone li mo lisa'mani'. Mono' bukuku' a'mine gulive minida gati a'mine gulivelo' di medeli gamazi ato' Adonai li gataa' ani' ve. Ido' a'mine gamazi Adonai ne'mi monovo nene Guve'inesi ve ve. Ido' a'mine Zuda veti monovolo' e'meto lazasi a'mine gulive YHWH minida minida nene do velepe' izo Guvelesi ve lo gizame. Ido' A'mine gulive YHWH ne'mi monovo nene O'moso'mo Naza nouvonitele ne nouve lo Mose'ni lo-imine' gamazi ne'mine ne neive li laa' nave.

^a 3:14 Lev 1:4, 1:8

- 19 O'mosote lehize-delone lo lo-emezo./ Gele nouvoni' Halao' nene lingine vilizave lo gele lengemamivo alinge' gohi amuzo molokuvo a'neloti' nene gele lengemeleseive./
- 20 Nemu' nene neni' amuzo'nedunu' ngebelo Aigita alevetida ato atoli'mine suno do soto' o-ngedelesuve. Ti' okuvo neloti' nene vilo lo-lengedeleseive./
- 21 Naza nene Aigita veti lu'ningu' hizekuvo ningi lamine' i-
- 22 lingidikevo vilizani' nene haza adinesi ma vamilisave./ Ado' lengi' venetine hamo hamo' muki' ingine avita ingaa' nani' Aigita venetasi engi' numu'ningu' nilizani' vene' malasi voku' li siluvadunu' ido' ngolidunu' lili' ani' gonolise initekumu' ido' oko'nido' nite' lamine' nemu' longo' ikevo ngimilisave. nGimikevo lingine gipetinesi aluvotinesi nene di ngili izi-ngidilisave. Ne'mine igi lingine Aigita aleveti henenine'ine ipe' igi di vilisave lo O'moso'mo line'.^a

Laka'ni 4

**Mose' Aza A'mine Gono Dalodo' Lisihe' Amuve Lavo
O'moso'mo Atoli'mine Inite' Iline' Amuzo Emo
Uvoloho Aaloni' Aza Ezelo' Medelo Mino
Gamazi Laa' Ive Minelive Line'**

- 1 O'moso'mo lo-dido' do velepe' izo Mose' aza ti' lo lo-
imine': Ido' Isilaele' aleve ingine loloni' gamazi gili ele'vole'
ami ido' gilami O'moso ma soto' o gemamive lilizani' nene
2 nadolove./ Ne'mine lavo Guvelesi ve ne'mo ti' lo longo' o-
dine': Angau' nene nanite' do nane. Longo' o-davo Mose'
3 aza ti' lo line': Hatuso do nouve ./ Lavo Guvelesi ve aza ti' lo
line': Hulo misubolo' ozo. Lavo Mose' aza hulo misubolo'
ogavo sata' lolo' ine'. Ti' ogavo upuho' ogo golise ine'za/

^a 3:21-22 Kul 12:35-36

- 4 Guvelesi ve'mo ti' lo lo-imine': Lemo avasuvolola nene do do otezo. Ti' lo lavo Mose' aza lemo avasuvolola do do
- 5 otine' nene anau' gohi hatuso lolo' ine'./ Ne'mine ogavo Guvelesi ve'mo line': Inginge ningi nizavo gaza ne'mine iline' nene ne'mo ingine Guvelesi ve avo'ningi O'moso ado' Abalahamu' ido' Isaka' ido' Zakobo' gelekele' i-dani' O'moso'ine ma'mo nene soto' o gemani' neive li gili gimilisave./
- 6 Neloti' nene Guvelesi ve aza Mose'ni gohi ti' lo lo-imine': Ize nane' siotika lulou' nene anga hulozo. Lavo ana hulo lulou' ogo do heta ine' nene [ganadise] mokono'
- 7 mokono' huso analo' soto' ine'./ Ne'mine ogavo Guvelesi ve'mo gohi anga siotika lulou' nene hulozo lo line'. Lavo ana hulo lulou' ogo do heta ine' nene mokono' mokono' huso ma nene osu' lavo oko'no lingelala lamine' ha minine'
- 8 ne'mino lamine' minine'./ Ne'mine ogavo Guvelesi ve'mo line': Gana' vo ngelebizeline' inite' ne ningi gilamilizani' nene a'mido' gohi ngelebizeline' inite' nene ningi gili
- 9 ele'vole' ilisave./ Ido' a'mine inite' sita' do soto' oganivo ningilizanikisi nevo gili huli gamazikalo' gili gimamavo ma nene Nilu noso nabauti' nene noso ma ohizo misubola lepezo. Ne'mine oganivo a'mine noso nene misubolo' ogo olomo vo vanise lolo' oloseive. Ido' vanise lolo' ogavo ningisa gili gimilisave lo line'./
- 10 Lavo Mose' aza Guvelesi ve ti' lo lo-imine': Agae, Guve'nesi ve, gamazi ma lolosa nouvoni' lae. Naza gamazi ma loloni' nene gamazi do lamino gehe izo noso'vesi nene mo ngelo losa'muvoni' nenaze. Ido' a'mine monovo'ne nene gozopotati' mino idise gei' gamazi lo-nemaine' nelotikisi ma senisi amine' ve. Naza gamazi laa' nouvoni' nene amuzo

- 11 molo lamo zou zou lo gohi loloni' ve.^a / Ne'mine lavo
 Guvelesi ve aza ti' lo lo-imine': Evene' ve'ine nene zaho lolo'
 ive ido' do negi nagi nene zaho hize-ngedaa' neive. Ido'
 gamazi lilo zaho laa' neive. Ido' vetine ningamilo ningilo lo
 12 zaho ma'mo laa' neive. Guve'nesi ve neni' ma ve./ Idise nene
 ha vozo. Liline' gamazi nene nenikisi minuvo lolosane. Ido'
 13 ne'mino lozo luvu lolosane./ Lavo Mose' line': Agae,
 Guve'nesi ve, neni' nimiselamo evene' ato' ma ningo
 14 ngimiselezo./ Guvelesi ve aza Mose'nimu' goloso gelo ti' lo
 line': Ti' lo ma Levi' a'vopilemo' zuhouti' ve uvaho Aaloni'
 ne neive. Naza gele nouvoni' ei' nene gamazi lamine' laa'
 neive. Idise nene aza mo geikisi votene' olosive lo nave.
 15 Ido' ogo ge ningo lamine' geleleseive./ Gaza nene evene' lo-
 ngemeline' gamazi nene lo-emeka' emeka' nanivo loloseive.
 Ne'mine nanivo naza gamazi lilisido' lengele'mize lamine'
 16 ogo ne'mine ilizo mana'mine ilizo lo lo-lengedelesuve./ Gei'
 liline' gamazi nene Aaloni' aza evene' lo-ngemeleseive. Gei'
 veka do laa' ve mine-gedeleseive. Ee, gei' nene O'moso
 nenito' medelo mino evene' lo-ngemeline' gamazi nene lo-
 17 emelesane./ Ido' Hatusokasi nene do vozo. A'minedunu'
 nene atoli'mine inite' do soto' ogo neni' amuzo'ne
 ngelebizelesane./

Aigita Misubouko Mose' Tine' Molo Vine'

- 18 Mose' aza elenahi meleho Zetolo' neida tine' molo vo ti'
 lo line': Naza Aigita misubouko neze zuho nene ha nizahe
 hilahe vo ningelesa nouko ha volohe lo line'. Lavo Zetolo'
 aza ti' lo line': Mulungau' hongu livo vozo lo lo-dine'./

- 19 Midiani misubou' ha neivo Guvelesi ve'mo ti' lo Mose'ni
lo-imine': Evene' geze gib'ililisa igi minave muki' nene mo
20 hilikeze. Aigita misubouko ha volosane lo lo-dine'./ Lo-davo
Mose' aza elenahine izipahala do dongi izelo' molo
ngele'mizo vo hatuso've O'moso'mi amuzosi minine' nene do
mino Aigita misubouko vine'./
- 21 Guvelesi ve'mo Mose'ni ti' lo lo-imine': Ne mo tine' molo
Aigita misubouko novange. Gaza amuzo geme
nouvongumu' nene ha gele mino nedunu' Halao' velelo' nene
ato ato' suno do soto' ozo. Ne'mine olosane'za naza nene
gala hize duu lokuvo a'manapa ogo Isilaele' evene'
22 nene ngeletamoloseive./ Ne'mine ogavo ma Halao'ni ti' lo
lo-emezo: Guvelesi ve'mo ti' lo live: Isilaele' aleve nene
23 neni' gana' gipe'ne ve./ Gipe'ne nene vo neni' nopo'ni lilive
lo imiselezo luvoni' ma nene gele hulange. Gana' gipa ma
nene bele helelesuve.^a /
- 24 Aka vi vi iki akalo' ingalisa navo Guvelesi ve aza
25 Mose'ni votene' o-do belelesa ine'za/ elenaho Zipola' aza
geheni mite' ma do gipele'mi oko'no lolovo huko hulo Mose'
gizenelo' okoho' izo ti' lo line': Gaza nene vaniseli'mi
26 va'neho nane./ Zipola' ne'mine ogavo Guvelesi ve aza
Mose'ni bele helamo iseve ize-dine'. Ido' vaniseli'mi va'neho
nane line' nene oko'ine lolovo huki huli O'moso'mi noso
miladoti' vanise oga' ingumu' gelo nemu' line'./
- 27 Guvelesi ve'mo Aaloni'ni hadive misubola nene vo
Mose'ni ningezo lo lo-emavo Aaloni' aza nene Mose'ni
ningelesa vo O'moso'mi golo'vela nene ningo votene' o-do
28 golo elo nani'./ Ne'mine ogavo Mose' aza Guvelesi ve'mo
noimiselo lo-imine' gamazi nene lo-emo ido' atoli'mine suno
do soto' ogo O'moso'mi amuzo ngelebizeline lo lo-dine'

^a 4:23 Kul 12:29

- 29 initekumu' nesi muki' lo-emo osu' line'./ Ido' neloti' nene
Mose' ve Aaloni' ve ingine vi Isilaele' aleveti gizebo
30 ve'ine nene di nubo i-ngidasine'./ Ne'mine ikesivo Aaloni'
aza Guvelesi ve'mo Mose'ni lo-imine' inite' muki' nene lo-
31 ngemo ve'nido' ato' suno do soto' ogo ngelebizine'./ Ti'
ogavo ingine gili ele'vole' ani'. Ee, Guvelesi ve'mo
engikumu' gelo ogo mulumo geni gihi nizani' ningingumu'
nene gili O'moso gubi' izi imi opo'ni lani'.

Laka'ni 5

**Moseki Aaloniki Halao' Neida Vi
O'moso'mo Line' Gamazi Li-imikesivo
Aza Isilaele' Aleve Gono Huli Vamilisave Lo
Ge'nebe Gono Gohi nGimine'**

- 1 Neloti' nene Moseki Aaloniki Halao' neida vi ti' li lasine':
Guvelesi ve Isilaele' aleveti O'mosote ne'mo ti' lo nolive:
Neni' evene'ne vi hadive misubola mono' mulise naba mili
neni' gulive'ne di hozi lilizaze. nGelete hulo-ngedezo lo
2 nolive lasine'./ Likesivo Halao' line': Guvelesi ve nene zaho
neve. Naza nanimu' gele emosa Isilaele' aleve nene ngelete
hulolove. Naza a'mine Guvelesi vemu' ma gelamuvonako
3 Isilaele' aleve nene ma ngeletamolosuve./ Ne'mine lavo
ingine ti' li lasine': Hebilaio ve leli' O'mosote ne'mo lelita
soto' ogave. Nemu' nene hadive misubou' gamene sitohamo
ongo vaa' aka nene vo nopelo O'mosote opo'ni lo ofa gize
emelesa nolunge. Limiselezo. Laza vamoso' nene siki
4 initetunupe lovodunupe lebele heleleseive./ Ne'mine
lasine'za Aigita veti guve'inesi ve naba aza ti' lo line':
Mosee, Aalonizo, lingine evene' gono veleuti' di vaa' ne ma
nanimu' nilasive. Mukito' lite' li amuzo gono

- 5 gehe-lingiduningu' nene ti'ni vilo./ Ne'mine lo Halao' imine' molo ti' lo line': Mene aleve nene Aigita ve ngivile' igi vai' goloso li mini gono nidanguti' nene do o'ove li-ngidilisa nilasihe line'./
- 6 A'mine gameneukovo' Halao' aza Aigita ve nete Isilaele' veti gonolo' gizebo igi minavesi ido' bosboi'ine nesi nene ti' 7 lo lo-ngimine':/ Lingine evene' nene biliki lili' iga' ani' gohiku' di gopo iga' ani' goko' line' guvise nene gomu' di ngimaa' ani' ma'mini di ngimamilo. Angise vi dalizaze lo 8 line'./ Ido' biliki ngomo lili' ami gomu' lili' iga' ani' ma'minisa lili' ilizaze. Biliki lili' ilizani' votigile nene di ngomo i-ngidamilo. Inginge gonou' gosele' niigisa nene vo 9 O'moso ofa emo opo'ni lolone li amuzo mili nilave./ A'mine soza saza gamazilo' gilami gono amuzo mili dalizaze. Ele'voleka li-ngimilo. /
- 10 Ne'mine line' nenako nemu' Aigita ve Isilaele' veti gonolo' gizebo igi minavesi ido' bosboi'ine nesi ingine evene' nizada vi ti' li li-ngimani': Halao' ti' lo nolive: Naza biliki lili' iga' ani' gohiku' di gopo iga' ani' goko' line' guvise 11 nene lengemamolosuve./ Ma ningilizadati' moni ningi di igi biliki lili' ilizani'za di ngomo ami gomu' lili' iga' ani' 12 lisihetokovo' lili' ilo./ Likevo evene' ingine hutile' igi Aigita 13 misubo mukiku' moni a'mine guvise nene vise' ani'./ Gizebo i-ngidave ingine amuzo mili li-ngidi mini ti' li lani': Gomu' guvise lengemaa' une' gamenela gamene hamoku' biliki lili' 14 iga' ani' lisihe' malokovo' lili' ilo li li-ngidani'./ Ido' a'mine votigilelo' nene ngeli lili' amavo Halao' gizebo ve ngele'mize molave nete lingine biliki lili' ilizani' votigile nene aizekisi idisesi lili' amani' nene nanimu' ave li Isilaele' aleveuti' gonou' gomu' mili-ngimaa' ave bosboi'ine nene gavoso ngibilaa' ani'./

- 15 Ne'mine ikevo Isilaele' aleveti bosboi'ine ingine Halao'
neida vi agae li ti' li li-imani': Gaza ne'mine nanimu' o-
- 16 ledane./ Gohiku' do gopo oga' une' guvise nene ma lemamo
biliki gomu' lili' iga' ani' ma'mini lili' ilo lo-ledanido' ngelo
lolo' amunivo leli' libilaa' nave. Lihime lelita nomive.
- 17 Aigita ve lengita neive li lani'./ Likevo Halao' ti' lo lo-
ngimine': Lngine laza vo Guvelesi ve ofa gize emelonge.
Leletezo livi' livi' igi nizani' nene gonomu' goseletati' nene
- 18 nilave./ Gonouko tine' mili vilo. Guvise nene
lingimamilizaha biliki nene gomu' lili' iga' ani' lisihe' malo'
- 19 nene lili' ilo lo lo-ngimine'./ Ido' lngine gamene gamene lili'
ilizani' biliki votigile nene di ngomo amilo lavo Isilaele'
aleveti bosboi'ine nete ningi gilani' nene ingine mine
- 20 golosola milani'./ Ne'mine li gili mini Halao'ni huli-di heta
limani' nene Aaloniki Moseki engikumu' gizebo igi
- 21 minasine' nene ningi/ ti' li li-ngimani': Laza lngine lasido'
une' ne'mo Halaokisi ezeloti' limi minavesi lelikumu' gilavo
mo goloso ogaze. Guvelesi ve'mo ningo lihime lingimivo.
Lngine lasine' gamazi giliki libililizani' oganako lngine
bainati mite' engi' a'ningu' izikesine' gelave li li-ngimani'./

O'moso'mo

Isilaele' Aleve Do nGu' Izamo Ha Miningumu' Nene

Mose' Ne'mo O'moso Elemavo

Aza Amuzo'ne Do Soto' Ogo

Aigita Vetu A'ninguti' Kuluhize-lengedelesuve Lo

Lo-ngemezo Lo Isilaele' Vela Gohi Imiselavo

Vingumu' Gamazi

- 22 Ti' ogavo Mose' aza vo Guvelesi vela lo ti' lo line':
Guvekasi ve, gaza evene' mene ngele'mize goloso aine'
- 23 nene nanimu' ane. Neze nanimu' nimiselane./ Naza Halao'
neida ogo geikumu' gamazi lolosa uvodoti' nene aza Halao'

a'mine eveneka zuho nene goboni molo-ngede'mo vo
minine'za gaza do ngu' izamo hazavo' minane./

Laka'ni 6

- 1 Ido' Mose' ne'mine lido' nene Guvelesi ve'mo ti' lo lo-imine':
Idise meloti' Halao'ni o-deloni' inite' nene ningelesane. Naza
amuzo'ne do soto' o-dekuvo ne'mo evene'ne nene hulo-
ngedavo vilizave. Ee, neni' amuzo'ne ne'mo ivile' o-davo me
misubouti' ngimiseleleseive./
- 2 O'moso'mo Mose'ni lo-emo line': Naza nene Guve'nesi
3 nouve./ O'moso amuzo malehe nouve lo Abalahamu'ni soto'
o emo Isaka'ni soto' o emo Zakobo'nisi soto' o imuvoni'za
neni' gulive'ne Guve'nesi ve ve lo neine' nene gili guni i
4 minilizave lo ma lo-ngemamuve.^a / Inginge venenga ve mini
mini mili minani' misubo Kanaha misubo nene mo
lengemelove lo lo huko-ngedo a'mine gamazi'ne nene do
5 amuzo muluvoni'./ Ido' idise nene Isilaele' aleve nete Aigita
veti goboni aleve lili' igi agae agae li nizani' nene gelo
a'mine gozopo' lo huko-ngiduvoni' gamazi ma nene gohi do
6 ga'nela ogo gelekuve./ Nemu' nene gaza Isilaele' aleve nene
ti' lo lo-ngemezo: Neni' Guve'nesi ve noluve. Amuzo malehe
gono Aigita vete nilingimanguti' nene do apaso goboni
ve'ine nizanguti' nene kuluhize-lengedelesuve. Neni'
amuzo'ne naba nene do soto' ogo amuzo nite' do-ngedo
7 lihime ngemosa do lungu' izelesuve./ Lingine nene neni'
evene'ne gihile ne'mino dosa naza nene O'mosotine nene
minelesuve. Lingine nenikumu' nene Guvetesi ve O'mosote
Aigita ve nete gono goloso limi minanguti' do lu' izive ve li
8 gili minilisave./ Abalahamu' Isaka' ido' Zakobo' engi'
ngemelesa lo muluvo misubola nene lengele'mizo vo

^a 6:2-3 Api' 17:1; 23:3; 35:11; Kul 3:13-15

- lengemekuvo a'mine misubo nene lengi' mini mili igi minaa' iliza misubo lolo' oloseive. Guvelesi ve neni' ma nene nouve
- 9 lo lo-ngemezo line'./ Lavo Mose' aza a'mine gamazi nene Isilaele' aleve lo-ngimine'za ingine nalato' ve ne'mine mini mulumo gono goloso di minani' ne'mo ngivize vivo gili imamani'./
- 10 Ne'mine ikevo Guvelesi ve'mo Mose'ni ti' lo lo-imine':/
- 11 Gaza vo Aigita veti guve'inesi ve naba Halao'ni ti' lo lo-dezo: Isilaele' aleve ingine gei' misubo nene huli vilizaze.
- 12 Hulo-ngedezo./ Guvelesi ve'mo ne'mine lo line'za Mose' ti' lo lo-imine': Isilaele' aleve mene gamazi luvoni' nene gilamanako Halao' nado gelelive. Azasi ma gelamoloseive. Naza a'nevo'mine ve gamazi lo guno amaa' uve nouve
- 13 line'./ Line'za Guvelesi ve'mo Aaloningi Mosengi nene vi Isilaele' aleve nene Aigita misubouti' ngele'mizi vilisive lo Aigita veti guvelesi ve naba Halaodasi Isilaele' alevelasi ngimiselavo vasine'./

**Moseki Aaloniki Engi' Zuho Lingeliti Gulive'ine
Ne'mini Mini'mi Igi Minani'**

- 14 Engi' zuho mini di ada evene' godo'nido' minani' veti gulive'ine:
- * Isilaele' gana' gipele Leubeni ei' gipele zuho ingine gulive'ine ne'mini minani': Hano', Palu', Hezeloni', ido' Kalami'. Neve nene Leubeni' zuho neti gulive'ine ve./
- 15 Zakobo' gipele Leubenidoti' minive Simeoni' gipele zuho nene ne'mini minani': Zemueli', Zamini', Ohadi', Zakini', Zohali', ido' Kanaha' venekuti' gidive Saulo'. Neve nene Simeoni' zuho neti gulive'ine ve./

* Isaka' gipele Zakobo'nimu' nene O'moso'mo gulive gohi Isilaele' ve lo molo-davo a'mine gulive malo' do molo a'mine vemu' line'.

- 16 Zakobo' gipele Simeonidoti' minive Levi' gipele zuholiti gulive'inesi engi' nga'vo zuholiti gulive'inesi ti' li minani': Gelesoni', Kohati' ve ido' Melali' ve. Levi' aza mino kilisimasi 137 hulo hiline'./
- 17 Gelesoni' gipele zuho netise gulive'ine ne'mino minine': Libiniki Simeiki. Inginesi ido' engi' zuhosi Levi' a'vopilemo' zuhouti' minani'./
- 18 Kohati' gipele zuho neti gulive'ine ne'mini minani': Amalamu', Izihala', Hebuloni', ido' Uzieli'. Kohati' nene kilisimasi 133 hulo hiline'./
- 19 Melali' gipele zuho netise gulive'ine ne'mino minine': Mahaliki Musiki. ^a
Mene Levi' a'vopilemo' lingeliti gulive'ine ne neive./
- 20 Amalamu' aza melehi alunolo Zokebedi'ni dosa eikuti' Aalongi Mosengi nene gidine'. Amalamu' aza kilisimasi 137 hulo hiline'./
- 21 Izihala' gipele zuho neti gulive'ine ne'mini minani': Kola', Nehenge', ido' Zikili'./
- 22 Ido' Uzieli' gipele zuho: Misaeli', Elezahani', ido' Sitili'./
- 23 Aaloni' aza Aminadabu' aluvo Nasoni' alunolo Eliseba'ni dosa eikuti' Nadabu'ni Abihu'ni Eleazale'ni ido' Itamalingine gidine'./
- 24 Ido' Kola' gipele zuho neti gulive'ine ne'mini minani': Asili' ve, Elekana' ve, ido' Abiasaha'. A'mine ve Kola' a'vopilemo' zuholiti avo'ninge nene minani'./
- 25 Aaloni' gipele Eleazale' aza Putieli' aluvo zuhouti' ma dosa eikuti' gipele Hinehasi'ni gidine'.
Mene ve nene Levi' a'vopilemo' zuho nabauti' zuho ngomo ngomo minani' neti avo'ninge minani' ve./

^a 6:16-19 Nab 3:17-20; 26:57-58; 1 Mon 6:16-19

- 26 Ido' meu' Aaloni' ve ido' Mose' ve luve nene ve atokumu' lamuve. A'mine Aaloni'nisi Mose'nisi Guvelesi ve'mo Isilaele' aleveti zuho'ine ato ato' vai' di nubo i-ngidi Aigita misubouti' ngele'mizi heta vilizo lo lo-ngidivemu' nene
- 27 noluve./ Ee, a'mine Moseki Aaloniki vi Aigita veti guve'inesi ve naba Halao'ni nene Isilaele' aleve Aigita misubo huli vilizaze. nGimiselezo li li-imasive mamu' nene noluve./

**Guvelesi Ve'mo Mosekisi Aalonikisi Halao'nida Vi
Ilisine' Initekumu' Gohi Gamazi Line' Gamazi**

- 28 Aigita misubou' Guvelesi ve'mo Mose'ni gamazi lo-imine' gamenela nene ti' lo lo-imine': Naza nene Guve'nesi
- 29 ve nouve./ Aigita veti guve'inesi ve naba Halao'ni nene gamazi gamazi nolo-gimuvoni' nene lo-emezo lo-lodine'za/
- 30 Mose' aza ti' lo Guvelesi ve lo-imine': Naza nene gamazi lo guno amaa' uve ningani nouvonako Halao' nene nado gele nemelive. nGelo ma gele nemamoloseive./

Laka'ni 7

- 1 Ne'mine lavo Guvelesi ve'mo Mose'ni ti' lo lo-dine': Gaza gelezo. Gei' nene Halao' velelo' nene O'moso ne'mine lolo' o-gedekuvo uvaho Aaloni' nene gei' vekati' gamazi lo soto'
- 2 ilive poloheteka ne'mine lolo' oloseive./ Lo-giduvo gamazi muki' nene Aaloni'ni lo-emanivo aza Halao'ni Isilaele' aleve nene gei' misubo nene huli vilizaze. Hulo-ngedezo lo lo-emelive./ Lo-emeline'za do a'manapa o-dekuvo Aigita misubou' atoli'mine suno gohi gohi do soto' ogo neni'

- 4 amuzo'ne elebizeka' elebizeka' oloni' nesi^a / ma gele lengemamoloseive. Ne'mine ogavo amuzo'ne gohi do soto' ogo amuzo nite' do-ngedo lihime naba ngemosa evene'ne zuho Isilaele' aleveti zuho'ine ato ato' vai' do nubo o-ngedo
- 5 Aigita misubouti' ngele'mizo volosuve./ Amuzo malehe a'ne nene do hozi lo Aigita ve ngebelo evene'ne Aigita misubouti' ngele'mizo voloni' nene Aigita aleve nete
- 6 nenikumu' Guvelesi ve neive li ningi gililisave./ Ne'mine lavo Moseki Aaloniki nene Guvelesi ve'mo lido' lido' asine'./ Halao'ni gamazi li-imasine' gamene nene Mose' kilisimasi've 80 minivo Aaloni' 83 minivo asine'./

**Moseki Aaloniki Halao' Neida Vikesivo
Aaloni' Hatuso've Hulo Misubolo' Ogavo
Gosihe' Lolo' Ine'za Nevosi A'manapa Ogo Halao' Aza
Isilaele' Aleve Vilizave Lo Gele nGemamine' Gamazi**

- 8 Guvelesi ve'mo Aaloningi Mosengi ti' lo lo-ngimine':/
9 Halao' ne'mo gamazitinelo' gele lengemelongumu' nene ato' suno dalizo nolivo ma nene Mose' gaza Aaloni'ni ti' lo lo-emezo: Hatusoka nene sata' lolo' ilize. Halao' velela hulo
- 10 misubolo' ozo. / Guvelesi ve ne'mine lavo Moseki Aaloniki Halao' neida vi lidi'mine asine'. Halaokisi ezeloti' limi mini gono di-daa' avesi engi' ve'nido' nene Aaloni' aza hatuso've
- 11 do hulo misubolo' ogavo sata' lolo' ine'./ Ne'mine ogavo Halao' aza gamazi monovo gilaa' ave'vesi luso ve'vesi asi lavo a'mine luso gono daa' ave igi luso gamazi'ine nedunu'
- 12 a'mine suno dani'./ Ado' ingine hamo' hamo' igi gavoso'ine hulikevo a'mine'mine igi sata' lili' ani'za Aaloni' hatuso

- 13 ne'mo engi' gavoso'ine nene do mikile' o-ngidine'./ Ti' ine'za nevosi ne zaalo' Guvelesi ve'mo line' ma'mino Halao' nene a'manapa ogo mino gamazi'nido' nene gele ngemamine'./

Halao' Aza

Isilaele' Aleve Misubo Hadivela Vi

O'moso Opo'ni Lilizangumu'

Gele ngemamolosuve Lavo

Mosekisi Aalonikisi O'moso'mo Lido' Igi


Aigita Vete Naa' Ani' Nosola Hatuso Di Otikesivo

A'mine Noso Nene Vanise Noso Lolo' Ine' Gamazi

- 14 Ne'mine ogavo Guvelesi ve'mo Mose'ni ti' lo lo-imine':
Halao' nene a'manapa ogave. Evene' nene
- 15 ngimiselamolosuve lave./ Nedenga' Halao' aza Nilu nosola
novilida nene vo ninge-dezo. Noso gahevela eikumu' gizebo
minezo. Ido' sata' lolo' ine' hatuso masi nene do vozo./
- 16 Halao'ni ti' lo lo-emezo: Guvelesi ve Hebilaio aleveliti
O'mosote ne'mo geita ti' lo liline lo nimiselavo nouve: Neni'
evene'ne nene vi misubo hadivelo' neni' nopo'ni lilizaze.
Hulo-ngedezo. Ido' ne'mine line' nene lo-gimuvoni'za
- 17 gelamanivo mine do ogo idise ne none./ Nemu' nene
Guvelesi ve'mo ti' lo nolive: Neni' nene Guvelesi ve neive lo
inite' geita ma do soto' olodoti' nene gelelesane. Gelezo.
A'neu' do nouvoni' hatuso menedunu' noso nabau' nene
- 18 belekuvo vanise nosovo' lolo' oloseive.^a / A'mingu' alaha'
nizani' nene hili gese' ikevo noso nene unuvo goloso ogavo
Aigita ve ingine a'minguti' noso ma namilisave lo lo-emezo
line'./
- 19 Guvelesi ve'mo Mose'ni ti' lo lo-imine': Aaloni'ni
hatusoka nene do Aigita misubou' nizani' noso mukito' ado'

^a 7:17 Lev 16:4

- noso nabalokisi ido' evenelite gihani' oloku' nosolokisi ido'
 noso ohunolokisi ido' tengiu' nosolokisi nene a'mine
 hatusoka do otezo lo lo-dezo. Aigita misubou' noso vai' nene
 vanise noso lolo' ogo zadunukisi gehenidunukisi lili' ani'
 20 lapese gomiseu' neine' noso nesi vanise nosovo' lolo'
 oloseive./ Ne'mine lavo Moseki Aaloniki ingine Guvelesi
 ve'mo lidi'mine lidi'mine asine'. Halao' ve' ezeloti' limi mini
 gono di-daa' avesi engi' ve'nido' Aaloni' aza hatuso ma nene
 Nilu noso naba veleto' do hosi lo belavo noso a'mingu'




- 21 minani' muki' nene vanise noso lili' ani'./ Alaha' a'mingu'
 minani' nene hili gese' ikevo noso nene unuvo goloso ogavo
 Aigita ve ingine a'minguti' nalizado' amivo namani'. Aigita
 22 misubo vaiku' nene vanise nosovo' minine'./ Ne'mine ine'za
 Aigita ve luso ve ma minani' nete engi' luso gamazi'inedunu'
 a'mine'mine ani'. Ikevo Guvelesi ve'mo line' ma'mino Halao'
 aza a'manapa ogo mino Mosengi Aaloningi gele
 23 ngemamine'./ Aza velepe' izo numu'veuko vo a'mine soto'

- 24 ine' inite' nevomukisi gele hulo minine'./ Aigita aleve ingine
 noso nabauti' noso mo namilizani' o vivo noso gaheve
 25 gahevela galese gihi di monani'./ Guvelesi ve'mo noso nene
 do goloso ogavo gamene seveni ogo novivo minine'./

Laka'ni 8

**Isilaele' Aleve Misubo Hadivela Vi
 O'moso Opo'ni Lilizangumu'
 Gele ngemamolosuve Lo
 Halao' Aza A'manapa Goloso Ogavo
 Moseki Aaloniki O'moso'mo Lido' Igi
 Aigita Vete Naa' Ani' Nosola Hatuso Di Otikesivo
 Aigita Misubo Vaiku' Gizele' Vai' Soto' Igi Vai' Lani' Gamazi**

- 1 Ti' ogavo Guvelesi ve'mo Mose'ni ti' lo lo-imine':
 Guvelesi ve'mo ti' lo live lo Halao' neida vo lo-emezo: Neni'
 2 evene'ne nene hulo-ngedezo. Vi nopo'ni lilizaze./ Gelezo.
 Gaza ngimiselamolosuve liline' nene lihime gemo Aigita
 misuboka mukiku' nene gizele' do soto' okuvo zege' zege'
 3 igi minilisave./ Nosou' nene gizelelite vai' lilisave.
 A'minguti' dizi gei' numunga laminekukisi dizi ohunguko vi
 onгаа' ane' holomokalokisi dizi minilisave. Gezeloti' limi
 minavekaliti numu'ningukisi ido' haza evenekaliti
 numu'ningukisi nene dizi vai' lilisave. Sikoni gizaa' ani'
 sitopuukisi ido' sikoni gizilisa palauvakisi nososi di gopo
 4 iga' ani' lapesetingukisi dizi minilisave./ Ido' gei'
 okongalokisi gezeloti' limi mini evene' naba minave mukiliti
 oko'nidokisi haza evenekaliti oko'nidokisi dizilisave lo lo-
 emezo./
 5 Guvelesi ve'mo Mose'ni ti' lo lo-imine': Aaloni'ni lo-
 emezo: Hatusoka ma nene noso nabalokisi evenelite galese
 gihikevo ohuno naba moladokisi ido' noso ohunolokisi do




- 6 otanivo Aigita misubou' nene gizele' vai' lilizave./ Lavo Mose' aza Aaloni'ni lo-emavo Aigita veti nosolo' nene ana do hozi lavo gizele' nete zege' zege' igi ebe' nabe' mukiku' vai' li osu' lani'./ Ne'mine ani'za luso ve ingine luso
- 7 gamazi'inedunu' a'mine'mine ikevo gizele' nene Aigita ebe' nabeto' nosouti' dizani'./
- 8 Ti' ikevo Halao' aza Mosengi Aaloningimu' gamazi hulavo ikesevi ti' lo line': Lngine gizele' mene nenitasi evene'nelasi minani' mene do hulilive li Guvetinesi vela lilizo. Do hulavo naza Isilaele' aleve nene hulo-ngedekuvo
- 9 vi Guvesi ve ofa gizi imi opo'ni lilizave./ Ti' lavo Mose' aza Halao'ni ti' lo lo-imine': Gaza laminosa lo-nemezo. Gizele' nene geitatikisi gezeloti' limi nizavelatikisi ido' numudingutikisi vi osu' li noso nabaukovo' ha minilizave lo Guvesi vela nanihe' lilive lo gele nane. Lo-nemanivo naza

- 10 a'mine gamenelokovo' Guvesi vela lolosuve./ Ti' lo longo' ogavo Halao' aza aize' ve lo line'. Lavo Mose' line': Gaza leli' Guvetesi ve O'moso ne'mino gohi ato' ma nomine' nene
- 11 geleliningumu' naza gei' lanido' lolosuve./ Lokuvo gizele' nene gezesi gezeloti' minavesi eveneka zuhosi huli-lingidi numudinesi huli vi osu' lilisave. Noso nabau' neevo' nene
- 12 minilisave line'./ Ti' igi Moseki Aaloniki Halao'ni huli-di vasine'. Visa gizele' Halaoda do soto' ine' nene do hulilive
- 13 lo Mose' ne'mo Guvesi vela amuzo molo line'./ Ido' Guvesi ve aza Mose' lidi'mine ogave. Gizele' numungukisi numuno hetokisi ido' mingukisi minani' muki' nene hili
- 14 gese' ani'./ Aigita ve ingine gizele' hilani' nene di nubo nubo ika' ika' avo Aigita misubo vaiku' nene gizele' gelesani'
- 15 ne'mo unuvo goloso ogo minine'./ Ido' Halao' aza ningine' inite' nene gohi vo lamine' ogavo gohi a'manapa ogo Guvesi ve'mo Halao' ne'mine ilive line' ma'mine ogo Moseki Aaloniki li-imasine' gamazi gele hulo Isilaele' aleve nene ngimiselamine'./

**Halao' Aza Ha A'manapa Ogo Mino
Isilaele' Aleve nGimiselamivo
Aaloni' Aza O'moso'mo Lido' Ogo
Hatuso Do Oto Aigita Vetu Misubolo' Belavo
Aigita Misubo Vaiku' Umamu' Vai' Li Soto' Ani' Gamazi**


- 16 Neloti' nene Guvesi ve'mo Mose'ni ti' lo lo-imine': Aaloni'ni lo-emezo: Hatusoka do oto nedunu' misubolo' belezo lo lo-emezo. Belavo Aigita misubou' mene u'musupo nete umamu' lili' ilizave./ Lavo ti' asine'. Aaloni' aza hatuso do oto misubolo' u'musupo belavo ne'mo umamu' lolo' ogavo evene' oko'nidokisi ize gulo neti oko'nidokisi umamu' nete zege' zege' ani'. Aigita misubou' u'musupo muki' nene.



- 18 umamukovo' lili' ani'./ Aigita misubou' luso ve ingine a'mine'mine ogo leli' luso gamazi nedunu' umamu' do soto' olone li ti' aha aha ma di soto' amani'. Umamu' nete numudo' namado' mini pili mini evenetasi ize gulolasi zege'
- 19 zege' igi minani'./ Ne'mine ogavo luso ve ingine Halao'ni ti' li li-imani': Mene mo O'moso'mi ana neive. Ne'mine lani'za Halao' nene gala hize duu lo a'manapa goloso ogo mino Guvelesi ve'mo Halao' ne'mine ilive line' ma'mine ogo Mosengi Aalongi lasine' gamazi ha gele hulo minine'.^a /

**Halao' Aza Ha A'manapa Ogo Mino
Isilaele' Aleve nGimiselamivo
O'moso'mo Lavo
Aigita Misubo Vaiku' Gohine Vai' Li Soto' Ani' Gamazi**

- 20 Guvelesi ve'mo Mose'ni ti' lo lo-imine': Nedenga holukati' oto Halao' nosou' novilida vosa nene ti' lo-emezo: Guvelesi ve'mo ti' lo lave: Evene'ne zuho nene vi
- 21 neni' nopo'ni lilizaze. Hulo-ngedezo./ Isilaele' aleve ngimiselamiline' nene naza nolo-gimuve: Gezelasi gezeloti' limi minavelasi haza evenekalasi numudingukosi nene



- gohine do soto' olosuve. Aigita veti numu'ningukisi ido' ingine minaa' nani' misubo'ine vaikukisi nene gohinelite
- 22 vai' lilisave./ Ido' a'mine gameneu' nene naza lokuvo Isilaele' aleve ingani' misubo nGoseni nela nene atoli'mine ogo lamine' mineleseive. Gohine hamokisi a'mida minamoloseive. Ne ningeline' nene Guve'nesi ve neni' nene

- 23 me misubou' omo neive lo geledesane./ Gei' evenekalasi
neni' evene'nelasi inite' do ato' ogo ma molalosuve. A'mine
me luvoni' suno nene aize' soto' ogavo ningilisave lo lo-
- 24 emezo line'./ Ido' Guvelesi ve aza lidi'mine ogave. Halao'
numu've laminekukisi ezeloti' limi mini gono di-daveti
numu'ningukisi nene gohine nete zege' zege' igi minani'. Ee,
gohinelite Aigita ebe' nabe' mukiku' mini vai' li mini a'mine
- 25 misubo nene di goloso ani'./ Ne'mine ogavo Halao' aza
Mosengi Aaloningi alizo lo vise lavo ikesivo ti' lo line': Vi
O'mosotine nene ofa gizi imilizaha misubo hadivela vami
- 26 mene misubou' lilo./ Ti' lo line'za Mose' aza line': Ne lisihe'
amoloseive. Guvelesi ve O'mosote gizo emelone' inite' nene
Aigita ve gosele' asele' ngebela' neine' inite' emelone'
nenako engi' ve'nido' ma ti' oso' nene mo geheni huli libili
- 27 hililisave./ Nemu' nene Guvelesi ve leli' O'mosote ne'mo
line' ne'mino gamene sitohamo ongo vaa' aka nene vo
- 28 nopelosa ofa gizo emelesune lo line'./ Lavo Halao' ti' lo
line': Hulo-lengedekuvo ebe' hadivela nene vi O'moso ofa
gizi imilizaha hoto' vamilo. Ido' gohine nene do vilize.
- 29 O'mosola lilo./ Lavo Mose' line': Mene volodoti' O'mosola
lokuvo aize' nene gohine muki' gezelasi gezeloti' limi
minavelasi haza evenekalasi huli-lingidi vilisave. Gaza idise
nene evene' nene hulo-ngedekuvo vilizave lo laane. Luka
nene gohi do velepe' izo gote izamozo./
- 30 Mose' aza Halao'ni hulo-do vo Guvelesi vela numuna
- 31 line'./ Lavo Guvelesi ve aza Mose' lidi'mine ine'. Gohine
nene Halao'ni ido' ezeloti' limi minavelasi evene've zuholasi
- 32 huli-ngidi vani'. Hamokisi lumo ma minamani'/. Ne'mine
ani'za mo nevosi gele ngemamine'. Gele ngemamo Halao'
aza gohi gala hize duu lo a'manapa ogo mino evene' nene
ngimiselamine'./

Laka'ni 9



**Halao' Aza Ha A'manapa Ogo Mino
Isilaele' Aleve nGimiselamivo
O'moso'mo Aigita Veti Ize Gulo'ine nGibiline' Gamazi**

- 1 Guvelesi Ve'mo Mose'ni ti' lo lo-imine': Gaza nene Halao' neida vo Guvelesi ve Hebilaio veti O'mosote ma'mo ti' lo live lo lo-emezo: Evene'ne nene vi ofa gizi nimilizaze.
- 2,3 Hulo-ngedezo./ Gaza gele hulo gohi do mineline' nene/ gesi midingu' nizani' ize gulotine nene ngebelesuve. Ado' dongi izetinesi hosi izetinesi kamela izetinesi ido' bulumaka' izetinesi sipisipi izetinesi meme' izetinesi nene siki inite'
- 4 naba gizi di hililisave./ Ne neiha Guvelesi ve aza Aigita ve lengi' o-lengedeline' inite' ato' neivo Isilaele' aleve o-ngedeline' inite' nene ato' kegeso mineleseive. Isilaele' alevela nene ize gulo'ine hamokisi ma hilamilisave./ Ido'
- 5 Guvelesi ve aza aize' ne'mine nene ti' olosuve lo gamene

- 6 molani'./ Gamene molani' gamene ogavo Guvelesi ve'mo lidi'mine ogavo Aigita veti ize gulo nene hili osu' lani'. Ido' Isilaele' aleveti ize gulo nene hamokisi ma hilaamani'./
- 7 Halao' aza longo' ogavo Isilaele' aleveti ize gulo'ine hamokisi ma hila mave li li-imani'za Halao' aza gohi gala hize duu lo a'manapa ogo mino evene' nene mo vilizave lo gele ngemamine'./

Halao' Aza Ha A'manapa Ogo.Mino

Isilaele' Aleve nGimiselamivo

O'moso'mo Lido' Igi

Mosekisi Aalonikisi Ololi'mi Anese Di Huli Veleta Ikesivo

Aigita Vetu Oko'nidokisi Ize Gulo'ineti Oko'nidokisi

Huso Goloso Izine'



- 8 Guvelesi ve'mo Mosengi Aaloningi ti' lo lo-ngimine': Biliki lili' iga' ani' sitopuuti' ololi'mi anese nene adine vai' livo ma disa Mose' neke Halao' velela nene hutile' ogo hulo
- 9 veleta ozo./ Ne'mine oganivo a'mine ololi'mi anese ne'mo u'musupo ngomo ngomo ne'mine lolo' ogo Aigita misubo

- vaiku' hutile' ogo mono evene' oko'nidokisi ize gulo neti
oko'nidokisi huso goloso ne'mine do soto' oloseive line'./
- 10 Lavo vi ololi'mi anese ma gisi di vi Halao' velelo' oti mini
Mose' ne'mo ololi'mi anese nene hutile' ogo hulo veleta ine'.
Ti' ogavo a'mine ne'mo evene' ido' ize gulo neti oko'nido'
- 11 huso goloso do soto' ine'.^a / Ido' Aigita ve mukiliti oko'nido'
izine' huso ne'mine nene luso veti oko'nidasi izavo ne'mo
- 12 ingine ngeli Mose' neida igi inite' ma amani'./ Ti' ine'za
Guvelesi ve'mo Halao'ni do tihine hize-davo Guvelesi ve'mo
Halao' ne'mine oloseive lo Mose'ni lo-imido' ogo a'manapa
goloso ogo mino Mosekisi Aalonikisi lasine' gamazilo' nene
gele ngemamine'./

Halao' Aza Ha A'manapa Ogovo' Mino

Isilaele' Aleve nGimiselamivo

O'moso'mo Lido' Ogo Mose' Aza Hatuso've Do Hosi Lavo


Osupo Gihile Atoli'mine Ogo Do'mozo

Aigita Misubo Do Goloso Ine' Gamazi

- 13 O'moso'mo Mose'ni ti' lo lo-imine': Nedenga holukati'
Halao' neida vo Guvelesi ve Hebilaio veti O'mosote ne'mo ti'
lo live lo lo-emezo: Neni' evene'ne nene vi gubi' izi nimi
- 14 nopo'ni lilizangumu' ve lo hulo-ngedezo./ Gaza nene
nenikumu' eze gidini misubou' misubou' nene mo ma
nizamave lo geleline lo idise nene naza lihime ngemaa'
inite'ne nene amuzo molo hulo-lengedekuvo geitokisi
gezeloti' limi minavekalokisi eveneka zuho vaitokisi soto'
- 15 ogavo gililisave./ Naza nene amuzo'ne naba do soto' ogo siki
inite' nabadunu' geikisi eveneka zuhosi lingibiluvodiniko mo
sime' ni osu' li idise nene me misubou'

^a 9:10 Lev 16:2

- 16 minamadine./ Minamadine'za naza amuzo'ne nene
lengelebízekuvo ningilizave lo ne'mine uvodoti' nene neni'
guve'ne misubou' misubou' mono osu' loloseive losa isetine
17 izekuvo vetinesi ha nizave.^a / Gaza nene neni' evene'ne
vilizave lo hulo-ngedamo gavele ve nouve lo aka'ine ha
18 hize tile-ngede nane./ Gelezo. Naza aize' nene mene none'
gamenelo' ne'minemu' nene Aigita misubou' mene osupo
gihile hulokuvo atoli'mine ogo lemeleseive. Ee, aize' nene
me misubomu' gana' api' igi Aigita misubo ve ladoti' ogo



- 19 idise ivo ma lemesa'mine' osupo gihile lemeleseive./ Nemu'
nene evene' ma ngimiselanivo vi heta ebe' nabala ize guloka
nizani' nene huli numungu' i-ngidilizave. Evene' nehe ize
gulo nehe heta ma minilizave nene osupo gihile ne'mo
20 ngebele heleleseive lo lo-emezo line'./ Ido' lo-emavo
Halaodoti' limi mini gono di-daa' ave linge nene Guvelesi

- ve'mo line' gamazi nemu' ngehelele izivo minii ingine ize
 gulo'ine goboni izipe'ine nene geti huli numungu' i-
 21 ngidani'./ Ido' Guvelesi ve'mo line' gamazimu' gili huli
 minave ingine ize gulo'ine goboni izipe'ine nene ha huli
 ga'vuzo' ikani'./
- 22 Ti' ikevo Guvelesi ve'mo Mose'ni ti' lo lo-imine': Osupo
 gihile nene Aigita misubo vaiku' evene' ize gulo guvise
 naviselo' nene lemelize. Anga nene hulo okulumota ozo lo
 23 lo-imine'./ Lo-emavo Mose' aza hatuso've nene do hozi lo
 hulo okulumota ogavo Guvelesi ve aza go' lete nene hulo
 osupo gihile nesi go' pa'na nesi hulavo lemo misubou'
 biline'. Ee, Guvelesi ve nene osupo gihile hulavo Aigita
 24 misubou' goline ne'minosa limine'./ Osupo gihile naba
 goloso nolemo go' pa'na pa'na ine' nene gana' api' igi' Aigita
 misubo ve ladoti' a'mine gamenela ivo ma lemesa'mine'
 25 osupo gihile limine'.^a / Aigita misubo vaiku' osupo gihile
 limine' ne'mo heta soto' minani' inite' muki' ado' evenekisi
 ize gulo nesi ngebele gese' ogo minamunosi za zuho'ine
 26 nesi nene belevo ngutovo' ine'./ Isilaele' aleve ingi monani'
 gaheve nGoseni nelavo' nene osupo gihilesi mo ma
 do'mozamine'./
- 27 Halao' aza alizo lo Mosengi Aaloningi asi lo-ngedavo
 ikesivo ti' lo line': Idise nene lihime'ne dokuve. Guvelesi ve
 nene lamine' laani' neine'za nezesi evene'ne zuhosi nene do
 28 ladeni okune./ Guvelesi vela lilo. Osupo gihilesi go' lete nesi
 nene moda ti' okelize. Mo lingimiselekuvo vilisave.
- 29 Melo' gohi ma minamilisave./ Ti' lo lavo Mose' ti' lo lo-
 imine': Idise naza numuno ebekuti' vo heta voloni' nene
 a'mido' a'ne do oto do patelo Guvelesi vela lolosuve.

^a 9:24 Lev 8:7; 16:21

- Lokuvo go' lete nene nomato osupo gihile nene gohi
 lemamoloseive. Lemamivo nelu' misubo meleho nene
- 30 Guvelesi ve ne neive li gililisave./ Ne neiha geesi gezeloti'
 limi minave neesi nene Guvelesi ve O'mosomu' lengehelele
- 31 izamivo olihe gili imamave lo gele nouve line'./ (Mingu'
 inite' lavolavo lili' iga' ani' nala' lili' iga' ani' inite' flax nene
 guvovo olosa neivo ido' palauva' lili' iga' ani' inite' bali nene
 gihile noizine' neivo osupo gihile limine' ne'mo a'mine inite'
- 32 sita' nene do goloso ogo osu' line'za/ viti mali'mine
 mali'mine nene olihe dizamido' nenako ne'mo nene osupo
- 33 gihile limine' ne'mo a'mine viti nene do goloso amine'./ Ido'
 O'mosomu' olihe gili imamave lo Mose' aza Halao'ni hulo-
 do numuno ebekuti' heta vo ana do patelo Guvelesi vela
 line'. Lavo go' pa'nasi osupo gihile nesi matasine'. Ido'
- 34 goline naba izo minidoti' matine'./ Halao' aza goline go'
 pa'na ido' osupo gihile matine' nene ningo gohi a'manapa
- 35 ogavo evenele zuhosi lihime dani'./ Gohi a'manapa ogo
 Guvelesi ve'mo Halao' ne'mine ilive lo Mose'ni lo-imido'
 ogo Isilaele' aleve nene hulo-ngedamine'./

Laka'ni 10

Halao' Aza Ha A'manapa Ogo Mino

Isilaele' Aleve nGimiselamivo


O'moso'mo Lido' Ogo Mose' Aza Hatuso've Do Hozu Lavo

Ma'nabusu Vai' Goloso Igi

Aigita Misubo Nene Di Goloso Ani' Gamazi

- 1 Guvelesi ve'mo Mose'ni ti' lo lo-imine': Halao' neida
 vozo. Ezesi ezeloti' limi mini gono di-davesi do a'manapa o-
 ngiduvoni' nene ato' suno mene do soto' ogo amuzo'ne
- 2 lengelebizelesa ti' uve./ Ido' geze izipaha zuhosi ga'vo
 pilemo' zuho alinge' soto' ilizani' nesi a'minemu' lo-

- ngemeline losa ti' uve. Ido' naza Aigita ve ngivile' oka' oka' uvo ngovozi hilangumu' li-ngimi engiku' do soto' ogo ngelebizuvoni' amuzo nite' ato atokumukisi li-ngimilizave. Ne'mine uvodoti' lingine nene nenikumu' Guvelesi ve ve li
- 3 gililisave losa ti' uve./ Ne'mine lavo Moseki Aaloniki Halao' neida vi ti' li li-imasine': Guvelesi ve Hebilaio' veti O'mosote ne'mo ti' lo nolive: Gei' okonga do'mo lemo neni' gele nemamo gamene nanike' gele nohulane. Gohi ne'mine amo
- 4 nopo'ni lilizave./ Gaza ngimisele hulolosa gelamo o'ove




- liline' nene aize' ma'nabuso nene misubokau' hulolosuve./
- 5 Misubo nene bize gehepeve ikevo misubo mo ningamolosane. Osupo gihile'mo do goloso amivo lumo ha neine' inite' nene ni osu' li gesi mingau' za zuho nesi nene ni
- 6 osu' lilisave./ Gei' numunga mukiku' nene bize gehepeve igi gezeloti' limi mini gono di-gidaa' aveti numu'ningukisi

- Aigita ve mukiliti numu'ningukisi nene vai' lilisave. Gei' izamote mamotesi engi' ize'ninge me'ningesi ningamadi'minosa vai' goloso lilisave. Ee, gozopo' avamote me misubou' gana' igi minadoti' mo ningamadi'minosa soto' oloseive line'. Ne'mine lo velepe' izo Halao'ni hulo-do vine'./
- 7 Ne'mine ogavo Halaodoti' limi mini gono di-daa' avete ti' li li-imani': Ve mene gote izo gamene vai' do goloso o-lede leize. Evene' nene ngelete hulovo. Vi Guve'inesi ve O'moso nene gubi' izi imi opo'ni lilizaze. Aigita misubo nene goloso
- 8 neine' ningabe ningamane./ Ne'mine lii vi Mosengi Aaloningi di tine' mili-ngidi Halao' neida ngele'mizi ikevo Halao' ti' lo lo-ngimine': Lingine vi Guvetinesi ve O'moso
- 9 nene opo'ni lilizako zamote zamotesi vilizave lo line'./ Lavo Mose' ti' lo line': Laza mono' mulise molo Guvelesi vemu' lolize izelone' o neine' nenako vene' izipahate ozoho nazaha
- 10 sipisipi izetesi bulumakatesi volosune./ Ne'mine lavo Halao' ti' lo lo-ngimine': Guvelesi ve'mo linginela neivosa naza vene' izipahatinesi di vilizave lo hulo-lengedelohi. O'ove. Mo keke' ne'mine amolosuve. Lingine ganala ma do soto'
- 11 olone li gatine nigilani' nene soto' noninguve./ O've. Ganakuti' volone li ladokovo' gele lengemo lengi' vemohokovo' nene vi Guvelesi ve opo'ni lilizave lo noluve line'. Ne'mine lavo Halao' velelo' minasidoti' nene ngeleti di hulani'./
- 12 Guvelesi ve'mo Mose'ni ti' lo lo-imine': Ma'nabusu igi inite' mata' dizine' ado' osupo gihile'mo do goloso amo lumo huline' inite' muki' nene nalizaze. Anga do oto Aigita
- 13 misubo nene makim ozo./ Ti' lo lavo Mose' aza hatuso've do hozi lo Aigita misubo makim ogavo Guvelesi ve'mo lavo a'mine gameneukisi ido' holukakisi nene ho' dizaa' idati'

- hepe' naba amuzo molo elo Aigita ebeku' ani'. Ne'mine ogo hepeli'mo ma'nabuso nene do ogavo nedenga' nene mo imi
- 14 minani'./ Igi ebe' nabeku' mini Aigita misubo mukiku' nene mini osu' lani'. Aigita misubou' gozopo' ma'nabuso soto' ani' ivile' ivosa vai' goloso li soto' igi minani'. Ido' a'mine gameneu' vai' lani' ne'mini alinge' ngeli vai' lamilisave./
- 15 Misubo mukito' nene hiti mini osu' likevo gonobu' sini do minine'. Misubouti' dizani' inite' ato ato' nesi ido' osupo gihile'mo do goloso amivo ha minani' zalo' gihile izani' nesi ni osu' lani'. Ni osu' likevo Aigita misubo mukiku' nene zalokisi ido' avile'inesi minaa' nani' inite' linge mukitokisi avile hamokisi ma minamine'.^a /
- 16 Ti' ikevo Halao' aza lite' lo Mosengi Aaloningi alizo lo asi lavo ikesivo ti' lo line': Naza Guvetinesi ve O'mosolasi
- 17 linginelasi lihime okuve./ Nemu' nene agae lo ti' lo voku' nolo-lingiduve: Idise gamene hamo' nene lihime'ne apasi-nidi Guvetinesi ve O'mosola voku' li lebele helelido' o
- 18 neine' inite' mene do hulo-nedelive lilizo./ Ne'mine lavo
- 19 Mose' aza Halao'ni hulo-do vo O'mosola voku' line'./ Lavo Guvelesi ve aza hepe' nene do velepe' izo ho' lemaa' idati' hepe' amuzo malahe lolo' o-davo hepe' elo ma'nabuso muki' nene golovo' izo do hulo guvo noso gulive Gulehe' Noso neu' nene do huline'. Ti' ogavo Aigita misubo mukiku' nene
- 20 ma'nabuso hamokisi ma lumo minamani'./ Ti' ogani'za Guvelesi ve aza Halao'ni gohi do a'manapa o-davo Isilaele' aleve nene ha vilizave lo hulo-ngedamine'./

^a 10:14-15 Lev 9:2-3



Halao' Aza Ha A'manapa Ogo Mino
Isilaele' Aleve nGimiselamivo
O'moso'mo Lido' Ogo Mose' Aza Hatuso've Do Hozì Lavo
Aigita Misubo Vaiku' Liti'muso Gehepeve Izo
Gamene Sitohamo Minine' Gamazi

- 21 Ne'mine ogavo Guvelesi ve'mo Mose'ni ti' lo lo-imine':
 Aigita misubou' nene liti'muso gehepeve izelive lo anga
 Okulumota do hozi lozo. A'mine liti'muso izeline' ne'mo
 atoli'mine liti'muso mino evene' oko'nido' bize gese' ogo
- 22 oko'inedunukisi hizi gililizani' liti'muso ve./ Ti' lavo Mose'
 aza okulumota ana do hozi lavo liti'muso lapa lapava nene
- 23 Aigita misubou' izo gamene sitohamo minine'.^a / Aigita ve
 engi' oko'nido' eze ningivo eze ningivo amilizani' o vivo
 minani' ebe' huli aka monamilizani' ogavo a'midokovo'
 gamene sitohamo minani'za Isilaele' aleve minada nene
 labana' ha ele minine'./

^a 10:22 Nam 105:28; Lev 16:10

- 24 Ne'mino neivo Halao' aza Mose'ni ano lo asi lo-davo
ogavo ti' lo line': Vilo. Vene' izipahatinesi vi Guvetinesi ve
nene gubi' izi imi opo'ni lilisani'za ize gulotine nene ha
25 minilisave./ Lavo Mose' ti' lo lo-imine': O'ove. Guvelesi ve
O'mosote belo emaa' ize ido' ofa gizo emaa' ize nene do
26 voloningisi nemu' gele lemelesane./ Nemu' nene ize gulote
vai' do volosune. Hamokisi ma hulokunivo minamoloseive.
A'mine izeti' linge ma do kegeso Guvelesi ve ofa emosa
gubi' izo emelone'za nani ize emelonido' o minelive. A'mine
emelone' ebeta olihe vo hetelamunido' mene a'minemu'
ngelo gelamolosune'za a'mida vokunivo Guvelesi ve'mo ne
27 ize nene bili gizi nimilo lo lelebizeleseive./ Ne'mine lo
line'za Guvelesi ve'mo gohi Halao'ni do a'manapa o-davo
o'ove lo evene' nene ha vilizave lo hulo-ngedamine'./
28 Ne'mine ogo Halao' Mose'ni ti' lo lo-dine': Me novodokisi
minamo vozo. Ehe. Neni' ve'nelo' gohi amozo. Gohi ge ma
ningeloni' nene ningelo gamenelo' lisihe' ogo mo
gebelekuvo helelesane. Ti' lo lavo Mose' line': Laine'
ne'mino gezesi mo ningamolodo' neive./

Laka'ni 11

Halao' Aza Ha A'manapa Ogo Mino

Isilaele' Aleve nGimiselamivo

**Mose' Aza O'moso'mo Aigita Vetu Gana' Gipe'ine
nGebele Helelesuve Line' Gamazi Lo-nGimine' Gamazi**

- 1 Guvelesi ve'mo Mose'ni ti' lo lo-imine': Halao'nisi Aigita
vesi idise nene gohi do goloso o-ngedeline' inite' hamokovo'
ma do soto' o-ngedelesuve. Neloti' nene vilo lo-lengedavo
vilisave. Ee, meloti' hulo-lengedeline' nene mo amuzo molo
2 lingimisele lengebeleleseive./ Idise nene Isilaele' aleve
muki' nene venekisi vemohokisi ingine vi ingi minaa' ada

- minaa' ani' aleve Aigita alevelati' nene ngoli nehe siluva'
 nehe nevo'mine inite' laminekumu' voku' lilo lo lo-ngemezo
 3 line'./ Guvesi ve'mo Aigita vela gono daavo ne'mo ingine
 Isilaele' aleve nene ningi lamine' i-ngidani'. Ee, Aigita
 misubou' Halaodoti' limi mini gono di-daa' avesi ido' Aigita
 aleve mukikisi Mose'nimu' gilani' nene aza evene' naba'
 naba ve li gilani'. Ido' ne'mine ani' nenako alinge' Isilaele'
 aleve voku' lado' nene gili ngimani'./
- 4 Mose' Halao'ni ti' lo lo-imine': Guvesi ve'mo ti' lo lave:
 Holuka' homi tuvelu kiloku ne'mido' nene Aigita ve
 5 nizangu' nomonuvo/ Aigita veti gana' gipe'ine muki' nene
 hililisave. Ee, evene' nabaliti gipe'ine ado' Halao' gana'
 gipele eze numuno dalive nevo'minesi ido' evene' ngomo
 gehepeve limi minave engi' gana' gipe'ine ado' gelekele' alu
 ne'mo viti gihile do palauva' lolo' oga' masini do minaa' ine'
 alu ne'mi gana' gipele nevo'minesi muki' veletati' mini di
 limi minaveti gana' gipe'ine nene hililisave. Ido' bulumaka'
 6 ize gana' gidani' angale nesi hililisave.^a / Aigita misubo
 mukiku' nene ive nama gomu' ma isa'maa' adi'mino soto' ogo
 ive namali'mo mo lo mineleseive. Ido' alinge' ne'mine
 7 ive nama gohi ma soto' amoloseive./ Aigita vetida ne'mine
 oloseiha Isilaele' aleve ingi monada nene inite' hamoli'mosi
 do goloso o-ngedamivo guloli'mosi izemu' evenekumu'
 haukisi mo lamoloseive. Ne'mine ogavo ne'mo nene lingine
 Guvesi ve'mo Aigita vesi Isilaele' vesi do kegeso ninge-
 ngedo Aigita ve monovo ato' do-ngedo Isilaele' ve monovo
 ato' do-ngedaa' neive li gililisave lo Guvesi ve'mo line'./
 8 Ido' a'mine line' inite' soto' ilidoti' nene gezeloti' limi mini
 gono di-gidaa' ave muki' nene mene nouvoda igi limi gubi'
 izi nimi ti' li li-nimilisave: Gezesi eveneka zuho ge'metaa'

^a 11:5 Nam 78:51, 105:36, 136:10

nanikisi huli-lidi ala' vi haha ilo. Likevo neloti' naza hulo-
lengedo vo haha olosuve line'. Ido' ne'mine lo Mose' aza
izebolo' goloso molavo mino Halao'ni hulo-do vauve elo
lemo vine'./

- 9 Guvelesi ve'mo Mose'ni ti' lo lo-imine': Halao' nene gei'
gamazikalo' ngelo gelamoloseive. Nemu' nene Aigita
misubou' mene ato' suno gohi ma do soto' ogo neze
10 amuzo'ne ngelebize love line'./ Ido' Moseki Aaloniki Halao'
velelo' ato' ato' suno dikesine'za Guvelesi ve'mo Halao'ni do
a'manapa o-davo aza Isilaele' aleve nene neni' misubo'neuti'
vi vi haha ilisave lo hulo-ngedamine' ve./

Laka'ni 12

Isilaele' Aleve Sipisipi Angale Bili

Vanise've Numuno Gatenilo' Hiliki Me'mele've Gizi Nalizave Lo
O'moso'mo Mose'ni Lo-imine'

Ido' Aigita Misubou' Gana' Gipe'ine nGebeleine' Gameneu'

Vanise Hilikeni' Numungu' Minaveliti

Gipe'ine nGebelamo Ise'ine Izelesuve Lo

Alinge' Kilisimasilo' Kilisimasilo'

Ne'mine Ingumu' Giii

Noso' Nite' Nalizave

Lo Lo-imine' Gamazi

- 1 Aigita misubou' nizasivo Guvelesi ve'mo Mosengi
2 Aaloningi ti' lo lo-ngimine':/ Lingine gilavo idise mene
nonidoti' alinge' nelasi nene none' ike'ni memu' nene
kilisimasilo' kilisimasilo' nabovani ike'ni nene minelive./
3 Isilaele' aleve muki' ti' lo lo-ngemezo: Idise ike'ni naba 10
dei mau' vemoho' muki' hamo' hamo' igi engi' zuho engi'
numu'ningu' maka' ingi monaa' avemu' nene sipisipi ize he
meme' ize he angale ma di kegesi di minilizave. Numuno

- 4 hamoku' hamoku' nene hamo' hamo' di minilizave./ Ve ma eze zuhosi ize hamo' ngeli namilizani' ogavo ma nene ma numunguti' aleve nesi nalizave. Evene' nanikelite nalizahe nemu' gili mini engi' zuhosi hamo' hamo' nalizani'
- 5 votigilelo' nene ize angale ma di kegesi di minilizave./ Ido' ize di kegesilizani' nene gipe ize kilisimasi hamokovo' hulani' oko'nido' inite' goloso hamokisi nominekovo' nene di kegesilizave. Meme' ize nehe sipisipi ize nehe nene ha di kegesilizave./ Di kegesi a'mine izelo' gizebo lamine' igi nizavo ike'ni'mi dei naba 14 ogavo ne'mi nivenga' nene
- 6 Isilaele' aleve muki' mulise mili bili gese' ilizave.^a/ Ti' igisa vanise nene lipi di vi a'mine ize naliza numudo' numudo' gateni hela helala nene hili ido' gateni veleta nesi
- 7 hilalizave./ A'mine holuka' nene ize ne'mi me'mele nene oloto' gizi lulu izamine' beletisi ekese' oga' ine' guvise ne'mi avilesi nalizave./ A'mine ize nalizani' nene gosoho' nami ido' muso ami somo milami ize muki' ado' godolosi ana
- 8 gizenesi lulo hala' nite' neesi gizivo' nalizave./ Lumosi hulamavo nedenga' ivo. Ido' lumo ma minivo ma nene gizi lo'voti hulilizave./ Ize nene di ne'mini minisa nalizave: Aka geti vilizangumu' di va'va' igi mini ado' gopodido' inite' nene gopodido' ne ha neivo gizedido' inite' nene ha neivo hatuso nene adingu' ha neivo lite' li nalizave. Guvelesi ve'mo isetine izingumu' gili naa' noso' nite' ne neive./
- 9 A'mine holuka' nene naza Aigita misubou' mono osu' lo evenelite gana' gipe'ine nene ngebele gese' olosuve. Aigita veti o'moso'ine ato' ato' muki' nene lihime ngemo do'mo leme-ngedelesuve. Nenikovo' nene Guve'nesi ve nouve./
- 10 Vanise ne'mo nene lingine ingi minani' numuno nene noso molo mineleseive. A'mine vanise ningeloni' nene ninge hulo

^a 12:1-13 Lou' 23:5; Nab 9:1-5; 28:16; Goh 16:1-2

- malo' voo lengi' nene isetine izelesuve. Ee, Aigita aleveti gana' gipe'ine ngebelelongu' nene lingine lengebelamuvo ha
- 14 minilisave./ Kilisimasilo' kilisimasilo' a'mine gamene ogavo ma isetine izuvongumu' gili Guvelesi vemu' ve li holise' mini ne'mine noso' nite' nalizave. A'mine monovo nene mo keke' hulamilizave. Langa'vopilemolitesi ne'mine i di vivi' vivi' igi minilizave./
- 15 Gamene seveni ogo novivo ne'mi lulou' beleti nali ma nene zisiti hulamavo lulu izamine' beletivo' nene nalizave. A'mine gameneu' zisiti hulikevo lulu izine' beleti nalizave muki' nene Isilaele' aleveti mulisetinguti' minamilizave li ngimiseli hulilizave. Nemu' nene zisiti nikelizave li a'mine gamene seveni ne'mi gamene hamoto' beleti do lulu izza' inite' zisiti nene vise' igi ningi numudinguti' gililihe' mili di
- 16 hulilo./ A'mine gamene naba vani deilokisi naba seveni deilokisi nene mulise naba goloso milaa' ilizave. A'mine gamene sitato' nene evene' muki' nalizani' votigilelo' noso' nite' mudise di va'va' ikisa gonosi damilizave. Noso' nite' di
- 17 di va'va' ilizangumukovo' gele lengemekuve./ A'mine gamenelo' nene lengi' zuho ato' ato' muki' Aigita misubouti' lengele'mizo vuvoni' nemu' kilisimasilo' kilisimasilo' lulu izamine' beleti naa' holise' nemu' gatine molamivo gili minilo. A'mine holise' minaa' monovo nene mo minevo' minevo' ogovo' minelive lo lo hukokuvoni' nenako nemu' langa'vopilemolitesi gili mini di vivi' vivi' ilizave./
- 18 Kilisimasi gosoho' ogavo ike'ni nabovani ne'mi naba 14 dei neu' nivengati' vo 21 dei ne'mi nivenga' ivo lulu izamine'
- 19 beletivo' nalizave./ A'mine gamene seveni ne'mi lulou' nene zisiti hulikevo lulu izine' beleti nalizave misubo maukoti' igi Isilaele' alevu' g'imizave nilizahe a'mingu' soto' ave nilizahe muki' nene Isilaele' mulisetinguti' minamilizave li ngimiseli hulikelizanako numudingu' nene beleti do lulu

- 20 iza'a' inite' zisiti nene mo keke' minamilive./ Zisiti minine'
inite' vai' nene malise igi numudido' numudido' nene lulu
izamine' beletivo' nalizave.^a /

**Guvelesi Ve'mi Gamazi Mose' Lo-ngimido' Igi
Isilaele' Aleve Gana' Api' Igi
Guvelesi Ve Isete Izelingumu' Ve Li Sipisipi Angale Bili
Vanise've Numu'ine'mi Gatedo' Hili
Me'mele've Nani' Gamazi**

- 21 Mose' aza Isilaele' aleveti gizebo ve muki' nene asi lo-
ngemavo ikevo ti' lo lo-ngimine': Lingine hamo' hamo' vi
lengi' zuhomu' nene sipisipi angale nehe meme' angale nehe
nene di kegesi Guvelesi ve'mo isetine izelingumu' ve li
22 bililo./ Bili vanise've lapeseu' lepi za ngomo ma gulive
hisopu ve lo neine' ne'mi a'nava nene di vaniseu' lupizi di vi
numudido' numudido' gatani hela helala nene hili ido' gatani
veleta nesi hilalo. Ne'mine igi lengikuti' hamokisi heta
23 holuka' nene mo limami nizavo nedenga' ivo./ Guvelesi ve
aza misubo'ningu' monoo Aigita ve ngebele'mo vilingu' nene
gatedo' vanise hela hela ido' veleta ningeline' nene a'mine
numuno avuto' ogo do goloso o-ngedaa' ive a'mingu'
24 dizo lengebelelingumu' nene gele emamoloseive.^b/ Lingine
ne'mine igi ize bili nalizave lo lo huko noluvo gamazi nene
linginesi izipahatinesi langa'vopilemo' zuhosi a'mido' e'meti
mini kilisimasilo' kilisimasilo' ne'mine ilizani' nene mo
25 minevo' minevo' ogo mineleseive./ Guvelesi ve'mo
lengemelesuve lo lo huko lido' ogo lengemeline' misubou'
nene vi mini ma mene luvodo' igi isetine izingumu' gili


^a 12:14-20 Kul 23:15; 34:18; Lou' 23:6-8; Nab 28:17-25; Goh 16:3-8

^b 12:23 Heb 11:28

26. noso' nite' ni holise' minika' minika' igi minilo./ Ido' alinge' izipahatine nete ne'mine monovo oga' none' nene monovo've nado neve li longo' navo ma nene ti' li li-
- 27 ngimilo:/ Leze Isilaele' aleve Aigita misubou' minune' gameneu' nene Guvelesi ve'mo Aigita ve ngebele'mo vingu' leli' numudeu' dizo lebelamo isete izo avuto' ogo hulo-ledo vine' nenako nemu' nene isete izingumu' gelo noso' nite' mene nonune li li-ngimilo lo line'. Lavo evene' ingine O'moso gubi' izi imi opo'ni lani'./

O'moso'mo

Aigita Vetu Gana' Gipe'ine nGebele Gese' Ine' Gamazi



- 28 Ne'mine igi Isilaele' aleve ingine vi Guvelesi ve'mo Mosengi Aaloningi lo-ngidido' lisihe' igi igi mili ani'./
- 29 Holuka' homi tuvelu kiloku ogavo Guvelesi ve aza Aigita vetu gana' gipe'ine ngebele gese' ine' nene evene' naba Halao' gipele eze numuno dalive neloti' api' ogo ngebele'mo vo lemo minive gehepeve galapusolo' minive'mi gana' gipele nesi belo izelite gana' gidani' gipe'inesi nene

- 30 ngebele gese' ine^a / Ne'mine ogavo Halao' ido' ezeloti' limi minavesi ido' Aigita ve mukikisi ingine nedenga' holukati' homi oti ningani' numuno mukiku' evene' ma hilikevo ma haza minine' numuno hamokisi ma minamine' nene ningani'. Nemu' nene Aigita aleve ingine ive nama'mo hili minani'./
- 31 A'mine holukaku' nene Halao' aza alizo lo Mose'nisi Aaloni'nisi asi lo-ngemavo ikesivo ti' lo line': Linginesi Isilaele' alevesi oti evene'ne zuho huli-ngidi vilo. Vi lasine'
- 32 ma'mine igi Guvelesi ve gubi' izi imi opo'ni lilo./ Ido' lasine' ma'mine igi ize gulotine muki' nene dii vi haha ilo. Ne'mine igi Guvelesi ve'mo nezesi no'noho' ize-nedelive li ezela lilo line'./
- 33 Aigita ve ingine a'mine aleve vamilizani' nene laza mukito' neesi helalone li leli' misubote huli lite' li vi haha
- 34 ilo li amuzo mili li-ngidani'./ Ti' li li-ngidikevo evene' ingine beleti gizilisa palauva' api' igi nososi di gopo angu' beleti do lulu iza' inite' olihe hulamavo haza palauva' di gopo iga' ani' lapeseu' ha neivo oko'nido' initeku' asabu' izi
- 35 gihi di vani'./ Isilaele' aleve ingine Mose' gomu' lo-ngimido' igi mili igi minani'. Ado' Aigita alevela vi voku' li siluvadunu' ido' ngolidunu' lili' ani' gonolise initekumu' ido' oko'nido' nite' lamine' nemu' longo' ani'./ Voku' likevo
- 36 Guvelesi ve aza Aigita veti lu'ningu' lemo gono davo ne'mo ingine ningi lamine' i-ngidi mini voku' lani' lani' inite' nene ngimani'. Ne'mine ikevo ingine Aigita aleveti heneni'ine nene ipe' igi di vani'.^b /

Isilaele' Aleve Aigita Misubo Huli Vani' Gamazi

- 37 O'moso'mo ngele'mizo vilida vilisa aka api' igi Aigita
misubou' ebe' Lamesesi nene huli Sukoti ebeta volone li
38 vene' izipaha'inesi vani'./ Ido' ato ato' evene' linge muki'
inginesi maka' vani'. Ido' ize gulo'inesi ado' sipisipi izesi
39 meme' izesi bulumakakisi vai' goloso di vani'./ Vi vi iki
ve'ine nalisa minado' nene lulu iza' inite' zisiti hulamani'
palauva' Aigita misuboukoti' di ani' nene di sikoni ne'mine
gizi nani'. Ido' a'mingu' zisiti hulamani' minine' nene Aigita
ve nete bubu' izi Aigita misuboukoti' lite' li ngeleti hulani'
nenako noso' nite' di va'va' ilizangumu' gizebo igi
minamilizani' o vivo alami zisiti hulamani' palauva' nene ha
gopo di vani' minine'./
- 40 Isilaele' aleve ingine Aigita misubou' ingi monani' nene
41 kilisimasi 430 ne'mine minine'.^a / A'mine gamene lisihe' ogo
kilisimasi 430 nene ogo novivo Guvelesi ve'mi evenele
Isilaele' aleveti' zuho ato ato' di nubo igi Aigita misubo huli
42 vani'./ Ido' Guvelesi ve'mo Aigita misubouti' ngele'mizo
alingumu' gizebo ine' holuka' ma nene a'mine holuka' nene
minine' nenako nemu' a'mine holuka' oka' oka' ilido' nene
Isilaele' alevesi Guvelesi vemu' gizebo igi minika' minika'
ilizado' o neive. Ido' engi' zuho soto' i'mi dizi nizavo ne'mine
ilizani' monovo osu' lamo mo minevo' minevo' ogo
mineleseive./

^a 12:40 Api' 15:13; Gal 3:17

**O'moso'mo Ise'ine Izingumu' Gili Noso' Nite' Nalizangumu'
Lou' Gamazi Mose'ni Lo-imine' Gamazi**

- 43 Guvelesi ve'mo Mosengi Aaloningi ti' lo lo-ngimine':
Meneve nene noso' nite' nalizadi'mi lou' gamazi've nene lo
huko noluve: Venenga ve misubo mauti' ani' nene mo
- 44 namilizave./ Namilizani'za goboni aleve oko'nine meni hizi
di ani' nete lingine oko'nine lolovo huki hulikevo oko'nido'
- 45 neni' noso minavo ma nene ha nalizave./ Ido' meni hizika'
hizika' navo gelekele' ve gono di-lingidaa' nanikisi misubo
maukoti' igi mini vilisa imi nilizave nesi a'minguti'
- 46 namilizave./ Ize nene ma nalizani' numungukovo' nene ni
osu' lilo. Di moni heta namilo. Ize amuzo've hamokisi nene
- 47 mo bili ledamilo.^a / Ido' a'mine noso' nite' nalizani' nene
- 48 Isilaele' aleve mukilite nene nalizave./ Ido' misubo maukoti'
ani' aleve maka' linginesi ingi moni nizave ingine a'mine
noso' nite' nene lazasi maka' nalone li nilavo ma gomu' neni'
noso engitasi engi' zuhou' vemoho' mukitasi mili-ngidikeni'
neivo ma nene nalizave. Ee, ne'mine i-ngidikevo ne'mo
Isilaele' aleveuti' soto' pizani' gili nizavosa maka' nalo.
Nalizani'za neni' noso inginela minamilive nene mo
- 49 namilizave./ Lo huko noluvo lou' gamazi hamo' mene
Isilaele' alevu' soto' ani' evenekisi misubo maukoti' igi
lengi' vovotingu' ingi moni nizavesi asabu' izo mukito' vo do
neive./
- 50 Isilaele' aleve muki' O'moso'mo Mosengi Aaloningi lo-
ngimine' gamazi lisiheto' nene gili dani'./ A'mine gamene
gehepeveu' Guvelesi ve aza Isilaele' aleveti mulise'ine ato
ato' muki' nene do nubo o-ngedo Aigita misubouti'
ngele'mizo vine'./

^a 12:46 Nab 9:12; Zoh 19:36

Laka'ni 13

**Guvelesi Ve'mo Mose'ni Lo-emo
Gana' Gidani' Izipe Muki' Nene Neni' Ve Lo Line' Gamazi**

- 1, 2 Guvelesi ve'mo Mose'ni ti' lo lo-imine':/ Isilaele' alevela nene venelite gana' gidani' izipesi ize gulo alungolite gana' gidani' nesi nene neni' ve li huli-ngidikevo ingine neni' inite' minilisave.^a /

Mose' Aza

**Lulu Izamine' Beleti Naa' Holiseku' Minilizani' Monovomu'
Isilaele' Aleve Lo-ngimine' Gamazi**

- 3 Mose' evene' ti' lo lo-ngimine': Mene gamenelo' nene Guvelesi ve'mo amuzo've do soto' ogo ogo okosa Aigita misubou' Aigita velo' gelekele' igi nizavo goboni mala' mala' i-lingidi minanguti' nene lengele'mize heta ani' nenako Aigita misubo hulani' gamene meemu' gili minaa' ilo. Mene gamenelo' nene zisiti hulani' inite' hamokisi nene mo
- 4 namilizave./ Ido' ne'mine ilizani' nene nemu' ilisave: Idise ike'ni gulive *Abibi ne'mi lulou' none' gamenelo' nene
- 5 Aigita musubo nihulave./ Alinge' Guvelesi ve aza Kanaha veti ido' Heti veti Amoli veti Hivi veti ido' Zebusi veti misubouko lengele'mizo hulo-lengedavo a'mine ike'ni Abibi aline' nene a'mine lulu izamine' beleti naa' holise' nene minilisave. Ee, A'mine lengemelove lo avotingine lo huko lo-ngeme neine' misubo gavoza misubo lanite' noso' nite' lamine' vai' lo neine' misubouko lengele'mizo hulo-lengedavo a'mine holise' nene ne'mine igi minaa' ilizave./

^a 13:2 Nab 3:13; Luk 2:23

* A'mine ike'ni Abibi nene ogavo Zuda ve kilisimasi gosoho' api' neve laa' ani'. Ido' a'mine ike'ni nene leli' ike'ni "March" osu' lolosa neivo he "April" api' neivo he ne'mine gamenelo' oga' ine'.

- 6 Gamene seveni ne'mi lulou' nene lulu izamine' beleti neevo'
ni mini naba seveni dei neu' nene noso' nite' naba vata' igi
7 ni Guvelesi ve'mi gulive di hozi lilizave./ Lulu izamine'
beleti nalizani' nene gamene seveni ogo novingu' nene ni
minilo. Ido' a'mine gameneu' nene lulu izine' beleti lengita
nomivo beleti do lulu iza' inite' zisiti nesi di hulikevo
8 misubotingu' nene mo keke' minamoloseive./ Ne'mine
gamene nimini ma nene ne'mine oga' nounge' nene Aigita
misubo hulo une' gameneu' Guvelesi ve'mo lele'mizo lamine'
ingumu' ve li izipahatine nene di gunisa li-ngimilo./
9 A'mine holise' ne'mo nene adido' nehe golihivetido' nehe
luhuvo gzikani' gelo mino lingine Guvelesi ve'mi lou'
gamazimu' gili laa' ilizangumu' nene do gatine oloseive. Ido'
ne'mine ilizani' nene mo Guvelesi ve'mo ana do oto
amuzo've do soto' ogo Aigita misubou' goloso igi minanguti'
lengele'mizo heta ine' nemu' nene ne'mine
10 ilizave./ Kilisimasilo' kilisimasilo' gamene've ogavo ma lou'
gamazi meneve nene gili di noso' nite' ni holise' minilizave./

Mose' Aza

**Gana' Gipe'inesi Ize Gulo'ineti Gana' gipe'inesi
O'moso'mine Imilizani' Monovomu' Lo-ngimine' Gamazi**

- 11 Alinge' Guvelesi ve aza avotinginesi linginesi lo huko lo-
lingimido' ogo Kanaha veti misubou' lengele'mizo vo
12 misubo'ine lengemavo/ nelu' mini venetine nete gana'
gidilizani' gipetine nene Guvelesi ve lehizi-dilo. Ido' ize
gulotine nete gana' gidilizani' angaleuti' gipe muki' nene
13 Guvelesi vela nizanako neemu' nene lehizi-dilizave.^a / Ne
neine'za dongi ize gipe gana' soto' ani' nene meme' gipe
nehe sipisipi gipe nehe nedunu' meni hizi di ti'nilo. Ido'

^a 13:12 Kul 34:19-20; Luk 2:23


- meni hizo do tibizamolo ma dongi ize nene Guvelesi ve
emaato' lisihe' i minisa'mani' nenako nemu' luvono ize
ngutanivo helelive. Ido' lengi' gipetine ize'ninge gana'
14 gidani' nesi a'mine'mine igi meni hizi di lengita ilo./ Alinge'
gipetinete ne nani monovomu' ti' nave nilavo ma nene
ne'mine li li-ngimilo: Laza Aigita misubou' Aigita velo'
gelekele' ogo nounivo goboni mala' mala' i-lidi minanguti'
nene Guvelesi ve'mo ei' amuzodunu' lele'mizo heta ine'
15 gamenela nene/ Halao' aza a'manapa ogo laza volone lunido'
o've loka' loka' neivo ei' Guvelesi ve'mo Aigita veti gana'
gipe'inesi ize gulo'inete gana' gidanikisi nene ngebele gese'
ine' ve. Ne'mine ine' nenako nemu' nene ize gulo alungolite
gana' gidani' gipe nene belo O'moso lehize-daa' nounge'za
laza ize'ninge gana' gidani' gipete nene meni hizo
16 nodo ti'nune li li-ngimilizave./ Ido' a'mine monovo do
minelone' ne'mo nene adelo' nehe golihivetelo' nehe luhuvo
gizekune' gelavo Guvelesi ve'mo ei' amuzodunu' Aigita
misubou' minuninguti' kuluhize-ledo lele'mizo angumu' lo
gate oloseive./

**Halao' Hulo-ngedavo Isilaele' Aleve Vani' Akamukisi
Zosehe' Amuzo Di Vangumukisi**

**Ido' Limuso Ha'na Dizinekisi Olokisi Gomu' Molo-ngedo Vo
Vilizani' Aka nGelebizine' Gamazi**

- 17 Halao' aza evene' nene vilizave lo-ngedavo O'moso aza
a'mine akalo' aleve lovo i ngimilisa navo Isilaele' aleve
ingine lu'ine di velepe' izi ti'ni Aigita misubouko vikelizave
lo aka li'nibe Hilisitalia vo minida nene ngele'mizo

- 18 vamine'./ Asi aka ha'na zovo' izo misubo hadiveu' vido' guvo
noso gulive *Gulehe' noso ohunola nene ngele'mizo vine'.
Ido' Isilaele' aleve vani' nene ingine gimise elese igisa vani'
ve./
- 19 Ido' vangu' nene Mose' aza Zosehe' oko'no amuzosi do
vine'. Ido' do vine' nene Zosehe' aza alinge' gamene mala
O'moso'mo kuluhize-lengedeline' nene neni' amuzo'nesi di
vilizave lo amuzo molo lo-ngedavo Isilaele' aleve gili imi
ne'mine olone li li-huki-dani' nemu' nene do vine'.^a /
- 20 Aigita misubou' ebe' Sukoti nene huli vi misubo hadive
21 lolovola Etami misubou' nene numuno mili ingani'./ Ido' aka



nivani' gamenelo' gamenelo' nene ho' nolingu' Guvelesi ve
ne'mo aka ngelebizelesa limuso ha'na dizine' mau' mine
molo mino gomu' molo-ngemaa' ine'. Ido' liti'muso ize neivo
ma nene olo' gulumo ha'na dizinguti' hize labana' ele-

^a Gulehe' Noso Ohuno ve lune' nene Ingilisi gamazi "Red Sea" do velepe' izo lune'za Hebilao gamazi nene Nosou' Guvise Minime' Noso Ohuno ve lo neine' ve.

^a 13:19 Apr' 5o:25; Zos 24:32

- 22 ngedo gomu' molo-ngedo vine'.^a / Holise' gamene nene limuso ha'na dizine' ne'mo do gomu' molo-ngedo vaa' idati' nene vo haha osa'mivo ido' holuka' nene olo' gulumo ha'na dizine' ne'mo do gomu' molo-ngedo vaa' idati' nene vo haha osa'mine'./

Laka'ni 14

**Aigita Veti Amilite Lovou' Kali'ningu' Igi
Isilaele' Aleveti Mehe'nida nGeleti Di Navo
Ve'nida Guvo Noso Ne'mo Aka'ine Hize Tile-ngede Neivo
O'moso'mo
Noso Hulo Eza Ema Ogo Aka Do nGolo' Lo-ngedavo
A'mido' Vi Noso Helala Vikevo
Aigita Ve nGe'metilisa Avo
Noso Ne'mo nGebele Gese' Ine' Gamazi**

- 1, 2 Guvelesi ve'mo Mose'ni ti' lo lo-imine':/ Isilaele' aleve lo-ngedezo: Mine velepe' izi vi Pihahiloti misubo'mi velela Migidolisi guvo nososi oluso' nene mini guvo noso gahevela Baali Zehoni ebe'mi velela mini gililizaze lo-
- 3 ngedezo./ Ne'mine ikevo Halao' nene ti' lo geleleseive: Isilaele' aleve gopo aka nivave. Misubo hadivesi guvo noso
- 4 ne'mosi aka'ine gize tileleseive./ Ne'mine lo gelavo naza Halaokisi ami've mukikisi ngivile' okuvo ne'mo guve'ne monavo Aigita ve nene nenikumu' Guvelesi ve neive li gililizangumu' ve lo gohi Halao'ni do a'manapa o-dekuvo lingimiselo lengebeleleseive lo lo-imine'. Lavo Isilaele' aleve ingine Guvelesi ve'mo lidi'mine ani'./
- 5 Evene' malite Isilaele' aleve nene mo vikeve li li-imikevo Aigita veti guve'inesi ve nabasi ezeloti' limi mini gono didavesi ingine Isilaele' alevemu' lu'ine di velepe' izi ti' li lani':

^a 13:21 Kul 14:19, 33:9; Nam 78:14, 105:39

- Ne nadi' une. Isilaele' aleve ma nene hulo-ngedekunivo vi
haha igi gohi goboni vete minamilizani'
- 6 ogave. Nene edamive./ Ne'mine lo Halao' aza lovou'
kali'velo' hosi do nala' izo ami'vesi ngele'mizo vine'./
- 7 Lovou' kali lamine' goloso minani' 600 nesi ido' lovou' kali
linge mukikisi ngele'mizo vine'. Ido' a'mine kali mukiku'
- 8 amiliti gizebo ve naba ma minanikisi nene vani'./ Ee,
Guvesi ve'mo Halao'ni do a'manapa o-davo Isilaele' aleve
- 9 gili ele'vole' igi nivavo ngimiselo ngibiline'./ Aigita ve ado'
Halao' lovou' kali've muki' hosi gelelehe' navo ido' hosi
mehe'nido' mini lovo hizaa' ani' ami'vesi haza ami'vesi
mukito' ngimiseli ngibili Isilaele' aleve ingine Baali Zehoni
ebe' nene ve'nida neivo Pihahiloti gahevela guvo noso'mi
gahevela mini gili nizavo a'mida igi hetelani'./
- 10 Halaolesi avito' gidini ikevo Isilaele' aleve nete ningani'
Aigita ve nene hoto' home ngimiseli ngibili'mi navo ningi
ingine golise naba gili do ngu' izelingumu' O'mosola li ive
nama ani'./ Ivesi Mose'ni neida velepe' izi ti' li elemani':
- 11 Gaza Aigita misubou' minuninguti' lele'mizo misubo
hadiveu' mo hele gese' olonido' mene lele'mizo aine' nene
nanimu' ane. Aigita misubou' matimati naba ma nomine'
- 12 nolihe./ Inite' ne'mine soto' o-ledalive lo Aigita misubo
hulolosa lo-gimune' ma ve. Hulo-ledanivo mo Aigita velo'
gelekele' ogo minelone lune'. Misubo hadivela mene
helelone' nene edamoloseinako Aigita misubouko ha
minunidini mo lamine' idine. Ee, Aigita velo' gelekelekovo'
- 13 o-ngedo minunidiniko nesi mo lamine' idine./ Ne'mine
likevo Mose' ti' lo evene' lo-ngimine': Lingine golise
gilamilo. Ele'vole' igi ha ningi minilo. Guvesi ve'mo idise
do lungu' izo inite' iline' nene ningilisave. Aigita ve vole
navo ningi nizani' nene ngebelavo gohi oko'nido' ma

- 14 ningamilisave./ Lengito' medelo mino Guvelesi ve'mo lovo o-ngemeleseive. Lngine nene ma iliza inite' ma nomive. Legenivo' minilo.^a /
- 15 Guvelesi ve'mo Mose'ni ti' lo lo-imine': Gaza nenita voku' lo gamazi ha lo'mo nane' nene nanimu' nane. Ne'mine nane' nene hulo Isilaele' aleve nene gabe' igi aka vilo lo-
- 16 ngedevo./ Guvo noso vo eza ema ogavo oluso' misubo gokoto' nene Isilaele' aleve vi noso helala vilizangisi
- 17 hatusoka nene do hozi lo nosolo' lutozo./ Isilaele' aleve a'mingu' nivavo na'nise'ne Aigita ve do a'manapa o-ngedekuvo a'mingu' nene lingimiseli di vilisave. Ne'mine navo Halaokisi ami've mukikisi ido' lovou' kalilo' daa' ave'vesi hosi izelo' monaa' ani' ami'vesi nene ngivile' okuvo
- 18 neloti' neni' guve'ne nene mono mineleseive./ Neni' amuzo ne'mo Aigita ve ngivile' iline' nene nenikumu' ingine Guvelesi ve ve li gililisave line'./
- 19 O'moso'mi angelo' Isilaele' aleveti ami'ine gomu' molo-ngedo vaa' ine' nene vo mine alinge' ine'. Ido' limuso ha'na dizine' ne'mosi ve'nida minidoti' nene mehe'nida vo mine
- 20 alinge' ogo/ Aigita vesi Isilaele' alevesi oluso'ningu' ote minine'. Limuso minavo emala Aigita ve minada nene liti'muso ize minine' ido' Isilaele' aleve minada nene labana' elo minavo Aigita ve ingine Isilaele' aleve nene ningami avito' amani'./
- 21 Mose' aza ana guvo nosola lutavo Guvelesi ve'mo imiselavo a'mine holuka' liti'muso izidoti' nedenga' ivo ho' dizaa' idati' hepe' naba ne'mo hepe' naba elo guvo noso nene ehuso' ogo do hulavo noso hemuvolo' misubo nene goko'
- 22 line'. Noso nene vo eza ema ogo aka velavo/ Isilaele' aleve a'mido' lisi vani'. Nivavo noso nene gesi ha'na ne'minosa

^a 14:14 Kul 15:3; Goh 1:30, 3:22; Isa 30:15

- 23 hela hela dize minine'.^a / Ido' Aigita ve nene a'mido'
ngimiseli di vani'. Halao' ami've hosi'ine ngele'mizi vaa' ani'
muki' ado' lovou' kalilo' daa' avesi ido' hosi mehe'nido' ohiki
- 24 monaa' ani' ami'vesi a'mine guvo noso oluso' vani'. / Mo go'
nolivo Guvelesi ve aza limuso ha'na dizo olo' gulumo ogo
mininguti' Aigita ve nene ningo lu'ine ga'ine do gopo o-
- 25 ngedavo golise goloso gili minani'. / Ido' aza engi' lovou'
kali'ine neti gize'ine nene do zou zou lo-ngedavo ge'nebe igi
vani'. Ne'mine ogavo Aigita ve ingine ti' li lani': Isilaele'
aleve hulo-ngedo golise vuke'zo. Guvelesi ve ne'mo engi'
hize ele' ogo Aigita ve leli' lovo o nolimize'.
- 26 Neloti' nene Guvelesi ve'mo Mose'ni ti' lo lo-imine':
Nosonene ti'no duvo Aigita vesi lovou' kali'inesi hosi'inesi
nene molo hitelingumu' ve lo anga nene guvo nosola
- 27 lutozo. / Lavo Mose' nene ana noso veleta lutavo go' lolosa
neivo noso nene tine' mili igi bizi gomu' minasido'
minasine'. Aigita ve ingine golise vilisa ani'za Guvelesi
- 28 ve'mo do hulo a'mingu' o-ngedavo nosou' vani'. / Nosonene
ti'no ogo Halao' ami've muki' Isilaele' aleve ngimiseli di
nosou' vani' ado' lovou' kali'velo' davesi hosilo' minavesi
nene molo hite-ngedavo hamokisi ma vo kela vamani'. /
- 29 Vamani'za Isilaele' aleve nene guvo noso lulou' goko' lo
minine' misubolo' nene vi vi vi kela vani'. Nivavo noso
- 30 nene gesi ha'na ne'mine hela hela minine'. / Ne gameneu'
nene Guvelesi ve'mo Isilaele' aleve nene Aigita veti
a'ninguti' kuluhize-ngedo do ngu' izavo ingine Aigita ve
noso gahevela hili ingi mini' mini' ani' nene ningani'. /
- 31 Ne'mine igi Isilaele' aleve ingine Guvelesi ve'mi amuzo
naba Aigita velo' do soto' ine' nene ningi evene' ingine

^a 14:22 1Kod 10:1-2; Heb 11:29

Guvelesi vemu' nene ngehelele izavo ezemukisi gelekele'
ve've Mose'nimukisi gili ele'vole' igi minani'./

Laka'ni 15

**Guvelesi Ve'mo Aigita ve nGivile' Ogo
Engi' A'ninguti' Isilaele' Aleve Kuluhize-ngedavo
Nemu' Mose' Aza Guvelesi Ve Opo'ni Lo Line' Nama**

- 1 Mose' ve Isilaele' aleve ingine nama ne'mini Guvelesi
vela lani':
Lovo naba golosou' ngivile' ogo dizo neine' nemu'
Guvelesi vela nama lolosuve.
Hosi izesi a'mido' monaa' avesi hulo nosou' molave.^a /
- 2 Guvelesi ve aza do amuzo molo-nidine' nenako
nemu' nene ei' monovo lo soto' ogo
nama lo minelesuve.
Ei' hamo' ne'mo nene mo lukuvo nemave.
Aza neni' O'moso'ne neine' nemu' eze do naba o-delesuve.
Me'nehi O'moso'vesi minine' nemu'
ei' gulive do hozi lolosuve.^b /
- 3 Ei' neve nene lovou' vaa' ive neive.
Guvelesi ve ve lo ne ei' gulive've ve./
- 4 Halao' lovou' kali'vesi ami'vesi nene
hulo nosou' molave.
Halao'ni gono di-di gizebo ve minave lamine' tamine' nene
Gulehe' Nosou' noso ni hilikeve./
- 5 Noso ohuno naba ne'mo molo hite-ngedave.
Geheni ne'mini noso hemuvola limi vikeve./
- 6 Guvekasi ve,
anga hulaa' anida amuzo nene lamine' nite' minave,

^a 15:1 Lev 15:3

^b 15:2 Kul 3:6, 3:15; Nam 48:14, 118:14; Isa 12:2

- lovo ve nene ngebelo lanahana oganako./
- 7 Lovo i gimani' aleve nene
dizo hozila nane' amuzokadunu' lovo o ngemo
do'mo leme-ngedane.
Gei' gizebolo' molani' nene engito' hulanivo
guvise navise olo' line' ne'mino oko'nido' olo' lave./
- 8 Hubu lanivo gei' veka mutive ne'mo
noso nene eheto' eheto' molo'mo dizo vine'.
Ee, ogo vogo minine' noso nene mato
lave ne'mine lolo' ogo minave.
Guvo noso nene homiu' do ngi lo minine'./
- 9 Lovo vete nene ti' li likeve:
Laza ngimisele do vo oko'nido' dosa
heneni nganeni'ine ipe' ogo vode hizelonido' do
bainati mitete nene gokuti' gelelehe' ogo
leli' adedunu' ngebelo do osu' lo-ngedelesune./
- 10 Ne'mine lani'za
hubu lanivo veka mutiveli'mo ehuso' ogavo
Guvo noso ne'mo molo hite-ngedavo
geni inite' gehepeve ne'mini
amuzo molo minine' nosou' limi vave./
- 11 Guvekasi ve,
o'moso inite' muki' mini'mi moni nizangu' nene
gei' ne'mine ma nizamave.
Monovoka lisihe' laminekovo' neingumu'
guliveka do hozi lolonido' minane' ne'mine igi minani'
ma nizamave.
Ee, gei' ne'mine engikumu' lehelele izavo
ngopo'ni lolonido' lisihe' i nizave ma nizamave.
O'moso gei'
ato' suno atoli'mine atoli'mine do soto' aine' ne'mine ilive
o'moso gohi ma nomive./

- 12 Anga zamela luto do upuho' o-danivo
misubo ne'mo biluvate do mikile' o-ngedave./
- 13 Gei' nasahili' o-ledaa' nane' monovokalo' do molo
kuluhize-ledaine' eveneka nene lele'mizo ogane.
Gei' amuzo nedunu' gei' kekeize lo neine' ebekau' nene
lele'mizo nane./
- 14 Ne'mine aningumu' nene evene' zuho ato ato' nete gili
golise'mo luvoluvo niizave.
Hilisitia' aleve nene ngehelele goloso izavo agae li nizave./
- 15 Edomu misubou' guve'inesi ve minave nene
ngehelelesi niizave.
Moabe' aleveti gizebo ve'ine nene
luvoluvo izi nizave.
Kanaha misubou' minave nene vo'ine vavo
lu'ine gilizevo ine'./
- 16 Ee, ngehelele atoli'mine ogo izavo golise goloso gilave.
Gei' eveneka ogo novunivo
gei' amuzoka naba ne'mo
ingine gabe' isa'mani' inite' geheni ne'mine mini
legenivo' minilisave.
Ee, Guvekasi ve, inite' ma i-lidamavo
gei' eveneka do gei' aine' nene ha ogo volosune./
- 17 Guvekasi ve, gaza lele'mizo ogo
gei' ve lo doti' aine' golokalo'
ado' a'mingu' ongo minelove lo
gasika gizaine' numungala
ado' gei' kekeize lo neine' numunga
gei' angadunu' do ngi lo molane' nela nene
za ne'minosa zuho' o-ledelesane./
- 18 Guvelesi ve nene Guvelesi ve naba kini mino
gizebo o-ledeline' nene minevo' minevo' oloseive./

**Guvelesi Ve'mo Aigita ve nGivile' Ogo
Engi' A'ninguti' Isilaele' Aleve Kuluhize-ngedavo
Mose' Ateleho Milizamu' Guvelesi Ve Opo'ni Lo Line' Nama**

- 19 Halao' ami've hosi'ine ngele'mizi vaa' ani' muki' ado'
lovou' kalilo' daa' avesi ido' hosi mehe'nido' ohiki monaa'
ani' ami'vesi guvo noso oluso' vani' nene Guvelesi ve aza
noso nene do tibize-davo molo hite-ngidine'za gomu'
Isilaele' aleve nene guvo noso lulou' goko' lo minine'
20 misubolo' vi vi vi kela vani'./ Ne'mine ikevo polohete vene'
Aaloni' ateleho Milizamu' nene olize izo musiki molaa' inite'
tabolini nene do anau' ogo bele'mo vivo vene' muki'
21 inginesi tabolini di bili melengeni igi nie'metavo/ Milizamu'
nene nama lo-ngidine':

Lovo naba golosou' ngivile' ogo dizo neine' nemu'

Guvelesi vela nama li-dilo.

Hosi izesi a'mido' monaa' avesi hulo nosou' molave./

**Isilaele' Aleve Nene Ebe' Ma Mala Ve Lo Minine' Ebeta Vikevo
A'mida Ekese' Nosovo' Mino Namilizado' Ogavo
O'moso'mo Mose'ni Za Ma Elebizavo
A'mine Za Hulo Nosou' Ogavo
Noso Nene Lanite' Ine' Gamazisi
Ido' O'moso'mo Lou' Gamazi Lo Huko-ngedo
nGemengu' Molani' Gamazisi
Ido' Elimu Ebeta Vi Minani' Gamazisi Ve**

- 22 Mose' aza Isilaele' aleve ngele'mizo do novivo Gulehe'
Noso Ohuno nene huli misubo hadive gulive Sulu nela nene
guvise navisesi nomingu' nene vani'. Gamene sitohamo
23 nene vivi' vivi' ani'za nososi ma ningamani'./ Ne'mine igi
ebe' ma gulive Mala nela igi noso ningani'za a'mine noso

nene ekese' goloso o vinekovo' neine' neivo namilizado' ine'.
 Nemu' a'mine ebe' nene gulive *Mala ve li milikani'
 24 minine'./ Ne'mine ogavo evene' nete lolize gani Mose'ni li-
 25 imi ti' li lani': Noso nani nalone./ Li likevo Mose' aza hize
 ele' o-ledeline lo Guvelesi vela amuzo molo lavo Guvelesi
 ve aza Mose'ni za ma elebizavo Mose' aza a'mine za ne do
 hulo nosou' ogavo noso goloso nene lanite' ine'.

A'mido' nene Guvelesi ve'mo gamazi lo huko igi mili
 minilizani' monovomu' lou' gamazi lo-ngemo ngemengu'
 26 molo do ningine'./ Ti' lo line': Lingine Guvetinesi ve O'moso
 neni' lo-lingiduvoni' gamazi nene gili lamine' igi inite' lisihe'
 nene neive luvodo' e'meti lo huko luvo gamazilo' e'meti di
 minilizani' nene Aigita vela do soto' o-ngiduvoni' mulumo
 nite' nene lengita ma do soto' o-lengedamolosuve. Naza
 nene Guve'nesi ve do lamine' o-lengedaa' nouve ma ne
 nouve lo lo-ngimine'./

27 Ido' neloti' nene Isilaele' aleve ingine ebe' ma gulive
 Elimi nela vani'. A'mida nene noso hinipini tuvelu minikevo
 ido' *deiti za sevedi minikevo ingine seli numu'ine di oti
 a'mido' ingi moni minani'./

Laka'ni 16

**Isilaele' Ve misubo Hadiveu' Vi Uvonga Avanga Li-dikevo
 O'moso'mo Nama Vihe' nGimisele Ido' Mana Hulo-ngedavo
 Ni'mi Vani' Gamazi**

1 Isilaele' aleve muki' ingine Elimi ebe' nene huli vi Elimi
 ebe' nesi Sinae golo nesi oluso' minine' misubo hadive ma


* Isilele' aleveti gamazi'ningu' nene a'mine gulive'mi monovo ekese' ve lo minine'.

* Deiti za nene kokonasi za gele vine' ve. Aigita misuboukosi Alabia misuboukosi Kanaha misuboukosi noso obuno minida minida nene a'mine deiti za vai' li dizaa' nave. A'mine deiti zauti' gonobu' gihile ngomo ngomo nene naline' lanite' lamine' oga' neive.

- gulive Sinila vi hetelani'. Ido' vi hetelani' nene Aigita misubo hulani' ike'ni osu' lavo neloti' nene 14 dei ogo vavo
- 2 15 dei neu' vi hetelani' ve./ Ido' a'mida misubo hadiveu' nene ingine mukito' Mosengi Aaloningi uvonga avanga li-
- 3 ngidi ngelemi/ ti' li lani': Aigita misubou' minuningu' nene ize somo molo no ido' noso' nite' vai' no gatude oga' une'za lingine misubo hadive meu' lele'mizi ikesivo ga'nali'mo evene' vai' laza hele gese' oso' ogave. Agae, Aigita misubou' ha nonivo Guvelesi ve'mo lebelavo a'mida hilunidini nene lamine' idine./
- 4 Ne'mine ikevo Guvelesi ve'mo Mose'ni ti' lo lo-imine': Gelezo. Okulumokuti' beleti hulo-lengedekuvo goline ne'mine izivo lemeleseive. Lemavo gamene gamene evenelite vi a'mine gameneu' naliza votigilelo' di lumo lumo ilisave. Neni' luvo gamazi gili dalizahe neu' nene ingine
- 5 ngemengu' molo ningelesuve.^a / Naba 6 dei neu' vi di nubuhu ilizani' nene gamene sitakumu' di nubuhu igi di igi di va'va' ilizave./
- 6 Lavo Moseki Aaloniki ti' li Isilaele' aleve li-ngimasine': Idise nivenga' nene Aigita misubouti' lele'mizo ave ma nene Guvelesi ve'mo lele'mizo ogani' neive li gili guni ilisave./
- 7 Ido' uvonga avanga li-dani' nene geleko aza a'mido' iline' initetoti' nene nedenga' ei' amuzo've ningilisave. Lelikumu'
- 8 ningo lube li eikumu' ningi lani' ma nene mo gelave./ Lo Mose' ti' lo line': Eikumu' ningi lani' nene Guvelesi ve mo gelo nivenga' nene ize ne'mini nalizani' inite' ma lengemo nedenga' nene beleti ne'mine vai' ni gatudine ilido' ma lengemeleseive. Leli' nene haza nite' nosine' nenako lingine ningi lani' nene lelikumu' nomine' Guvelesi vemu' ningi nilave./

^a 16:4 Zoh 6:31

- 9 Mose' Aaloni'ni ti' lo lo-imine': Gaza Isilaele' aleve muki' nene ti' lo lo-ngedezo: Lngine ningi lani' ma nene
- 10 Guvelesi ve'mo gelaze. Igi ei' velelo' oti minilo./ Lo-emavo Aaloni' Isilaele' aleve muki' nene nolo-ngimine' velesi ingine misubo hadivela ningani' nene Guvelesi ve'mi
- 11 labana've naba nene limusou' soto' ine'./ Guvelesi ve'mo
- 12 Mose'ni ti' lo lo-imine':/ Isilaele' aleve ningi lani' ma nene gelekuze. Ti' lo lo-ngemezo: Nivenga' molo liti'muso izelesa neivo lngine ize goloni nalisave. Ido' nedenga' nene beleti vai' gatudine ilido' nene dalisave. Ne'mine igisa Guve'nesi ve nenikumu' nene lngine leli' O'mosote ma ne neive li gililisave lo lo-ngemezo./



- 13 Ne'mine line' nemu' nivenga' nene nama vihe' vai' goloso pateli igi numuno mili ingada nene igi limi minikevo di nani'. Ido' nedenga' nene ava' lemo a'mine ingani' ebe' hite
- 14 minine'./ Mino a'mine ava' nene vo osu' lavo misubolo' nene ngomo ngomo inite' aisi izi lanahana ani' ne'mine mulise

- 15 dizo mine'mo monine'.^a / Isilaele' aleve ingine a'mine inite'
nene ningi nanite' neve li li volelo' melo' igi minani'. Mose'
ti' lo lo-ngimine': Guvelesi ve'mo nalizave lo beleti
- 16 nolingimine' ma ne neive./ Guvelesi ve aza ti' lo lo-
lingidine': Evene' muki' ni gatu'ine ilizani' votigilelo' di lumo
lumo igi dalizave. Seli numudine hamo hamoku' ingave
hamo hamoto' somo hamo hamo' di vai' li gizeka'
- 17 ilizave lo lo-ngimine'./ Lo-ngemavo Isilaele' aleve mo
ne'mine ani'za ma nete muki' goloso di lumo ikevo ma nete
- 18 ngomosi' di lumo ani'./ Ne neiha somou' leki mili ningani'
nene vai' gizeka' ave nete dani' nene somo hamo' ivile'
amivo ngomosi' gizeka' ave nete dani' nene somou' vai' lavo
evene' hamo hamo' nalizani' votigilelo' gehepeve dani' ve.^b /
- 19 Ido' Mose' ti' lo lo-ngimine': Aizekumu' ve li idise nene
20 lumosi mili namilo./ Ne'mine line'za a'mine line' gamazi
nene gilami evene' linge nete lumo milani'. Ido' nedenga'
nene a'mingu' elehe' vai' likevo unuvo goloso ine'. Ne'mine
- 21 ikevo Mose' nene engikumu' izebolo' molani'./ Nedenga'
nedenga' nene evene' hamo hamo' nalizani' votigilelo'
gizeka' iga' ani'za holise' nene ho' losa lumo ma minine' nene
lala lo vaa' ine'./
- 22 Naba sigisi dei ma nene ogavo gamene sita' naliza
votigilelo' evene' hamo hamokumu' nene somo sita' sita' di
nubo ani'. Ne'mine ikevo engi' muliselo' gizebo ve nete igi
- 23 Mose'ni a'minemu' li-imikevo/ ti' lo lo-ngimine': Guvelesi
ve'mo mo lido' ve. Aize' nene holise' minaa' gamene ve.
Holise' gamene Guvelesi vemu' kekeize lo mine ato' o
mineline' ve. Idise nene gamene sitaku' naliza noso' nite'
nene vata' ilo. Oloku' gizi vata' ilisa gili ma oloku' gizi vata'
ilo. Ido' somo milalisa gili ma somo milalo. Ne'mine igi

^a 16:15 1 Kod 10:3

^b 16:18 2 Kod 8:15

- 24 nikevo lumo mineline' nene aizekumu' milikilo.^a / Mose' ti'
lo lo-ngemavo lumo minine' nene aizekumu' milani'za
- 25 elehe' nene a'mingu' minamani' ido' unuvo amine'./ Mose' ti'
lo line': Idise nene nalo. Idise nene Guvelesi vemu' holise'
gamene neine' nenako nemu' noso' nite' nene heta misubolo'
- 26 ma limivo ningamilisave./ Gamene sigisi ne'mi lulou' nene
noso' nite' ha lemeka' lemeka' neivo di nubo ilizaha naba
seveni dei nene holise' gamene neine' nenako nelo' nene ma
nomoloseive./
- 27 Ne'mine line'za naba seveni deilo' nene evene' linge ma
28 noso' nite' do lumo olone li vani'za ma ningamani'./ Ne'mine
ikevo Guvelesi ve'mo Mose'ni ti' lo lo-imine': Isilaele' aleve
lingine lo-lingiduvoni' gamazi ato ato' muki' nene gili hulaa'
nani' monovotine nene hulami gamene nanike' ha di
- 29 minilizahe./ Gililevo. Neni' Guve'nesi ve'mo a'mine holise'
gamene nene mine gelaa' gamene ve loo lingimuvoni' ma ve.
Nemu' nene naba sigisi dei mau' nene gamene sitaku' naliza
noso' nite' lingimuvoni' ma ve. Nemu' nene naba seveni dei
ogavo ma mukito' numudine hulami
- 30 minadokovo' minilisave./ Ne'mine lavo evene' nene naba
seveni dei neu' gono dami mini gili minaa' ani'./
- 31 Isilaele' aleve ni minani' noso' nite' nene gulive *mana ve
li milani'. A'mine mana nene guvise ma gulive koliada ne'mi
gihile mokono' ngomo ngomo gele minivo ni gilani' nene
himoni novozosi lili' ani' bisiketi ne'mine lanite' ine'.^b /
- 32 Mose' ti' lo line': Guvelesi ve'mo ti' lo nolo-lingidive: Lengi'
langa'vopilemo' zuho soto' i'mi dizi minilizani' nete naza
Aigita misubouti' lengele'mizo uvoni' gameneu' misubo

^a 16:23 Kul 20:8-11

^{*} A'mine gamazi mana nene Hebilaio gamaziuti' nene nanite' neve laa' ani' gamazi ne'mine neive. Goholo 15 neu' ningezo.

^b 16:31 Nab 11:7-8

- hadiveu' nimonavo noso' nite' lingimuvoni' nene
ningilizangumu' ve li somo hamo' ma di izi vai' li di
33 milikilo./ Mose' Aaloni'ni ti' lo lo-imine': Misubo somo ma
dosa a'mine mana nene izo vai' lozo. La'vopilemo' zuho soto'
i'mi dizi minilizani' nete ningilizangumu' ve lo
34 Guvelesi ve'mi velelo' do ogo molozo.^a / Aaloni' aza
Guvelesi ve'mo Mose'ni lo-imine' ne'mine ogo a'mine mana
nene do ogo aka gamazi minine' bokisi ne'mi velela molo
35 a'mida gizebo lamine' olone lo line'./ Isilaele' aleve ingine
mana nene ni'mi vi kilisimasi 40 huli ingine ha ingi
minilizado' o minine' misubola igi hetelani'. Ee, mana nene
ha ni'mi igi Kanaha misubo lakado' nene igi hetelani'.^b /
36 A'mine mana di milalizangumu' somo do vai' lozo line'
somo nene 2 lita somomu' line'./

Laka'ni 17

**Evenelite Naa' Nosomu' Likevo
Mose' Aza O'moso'mo Lido' E'meto
Hatusodunu' Gehenilo' Belavo
A'minguti' Noso Lemavo Nani' Gamazi**

(Nab 20:1-13)

- 1 Isilaele' aleve nene O'moso'mo lido' igi zou zou li ingika'
ingika' igi ebe' hadive ado' gulive Sini nene huli vani'.
Lehidimi misubou' nene vi seli numu'ine di oti ingani'za
2 a'mida evene' nalizani' noso ma minamine'./ Evene' nete
Mose'ni eleme ti' li li-dani': Naa' noso ma lemevo. Ne'mine
likevo Mose' line': Nenikumu' nanimu' lolize gamazi nilave.
3 Ido' Guvelesi ve nanimu' emengu' nimilave./ Line'za evene'
nene nosomu' goloso ngisavo Mose'ni no'ningu' gamazi li ti'

^a 16:33 Heb 9:4

^b 16:35 Zos 5:12; Neh 9:20-21; Zoh 6:31

- li li-dani': Aigita misubouti' nanimu' lele'mizo ane. Laza
 izipahatesi ize gulotesi noso vise' igi hililizave lo lele'mizo
 4 aine' nehe./ Mose' Guvelesi vela amuzo molo ti' lo line':
 Evene' mene nadi' o-ngedelove, geheni mene nibililako./
 5 Guvelesi ve'mo Mose'ni ti' lo lo-imine': Gizebo ve'ine linge
 ma nene ngele'mizo Isilaele' aleve gomu' molo-ngedo vozo.
 Ido' Nilu nosolo' izaine' gavosoka ma nene do-dosa vozo./
 6 *Holebe gololo' geheni malo' nene geikumu' gizebo o
 minelesuve. A'mine gehengu' nene belezo. Belanivo
 evenelite naliza noso nene lemeleseive line'. Lavo Mose' aza
 Isilaele' aleveti gizebo ve'ine nete ningi nizavo ti' ine'./
 7 Guvelesi ve nene lelikisi neihe li Isilaele' aleve lolize
 gamazi li-imi Guvelesi ve emengu' milani' nemu' a'mine ebe'
 nene *Masa ve ido' Meliba ve lo molani'.^a /

**Lehidimi Misubou' Nizavo
 Amaleki' Ve Nete Lovo Di Igi nGibilikevo
 Isilaele' Ve A'mido' Medeli Engikisi Lovo Nihizavo
 Mose' Aza Ana O'mosola Do Ote Neivo
 Isilaele' Ve Nete nGivile' Igi nGibilani' Gamazi**

- 8 Lehidimi misubou' nene Amaleki' ve nete lovo di igi
 9 ngibilani'./ Ne'mine ikevo Mose' aza Zosuva'ni ti' lo lo-
 imine': Gaza ve ma do kegese-ngedezo. Aize' vi Amaleki' ve
 nene ngibililizaze. Naza nene golo ngomolo' dizo ote mino
 O'mosomu' kekeize lo neine' hatuso'ne nene do hozi
 10 lo-minelesuve./ Lavo Zosuva' aza Mose' lo-dine' ma'mine
 ogo ngele'mizo lovou' vavo Mose' ve Aaloni' ve Huli' ve

* Laka'ni 3 gobolo 1 nene ningo gatezo.

* A'mine gulive Masa nene Isilaele' veliti gamaziu' nene emengu' ve lo neive. Ido' gulive gohi Meliba nene lolize ve lo neine' ve.

^a 17:1-7 Nab 20:2-13

- 11 golo ngomola nene dizi minani'./ Mose' aza ana do ote minine' gamene nene Isilaele' vete ngivile' i di vani'za ana do limine' nene Amaleki' ve nete api' igi ngivile' i di vani'./
- 12 Mose' ana nene do hozi lo mino abusolo elavo Aaloniki Huliki nene geheni naba ma ehuso' igi di mili-dikesivo a'mido' mito' neivo ingine hela hela oti mini ana nene di hozi li-di minasine'. Ne'mine asine' ne'mo ana nene gabe'
- 13 amivo ho' nene lemo vine'./ Zosuva' ve eze zuhosi Amaleki' aleve ngivile' igi bainati mitetunu' ngibilani'./
- 14 Ne'mine ikevo Guvelesi ve'mo Mose'ni ti' lo lo-imine': Evenelite gili minilizangumu' ve lo gamazi ti' lo buku mau' gizo Zosuva'ni gato lo-emezo: Guve'nesi ve naza ne'mine lo amuzo molo gele nouve: Ado' Amaleki' aleve nene ngebelo do osu' lo-ngedekuvo evene' muki' engikumumu' ga'ine molo gehepeve ogavo misubou' aleve malitesi engikumumu' gohi
- 15 gilamilisave.^a / Mose' aza O'moso inite' gize emaakumu' alata ma gizoo gulive ti' lo molani': Guvelesi ve nene neni'
- 16 vilaki' neve./ Ne'mine ogo ti' lo line': Guvelesi ve'mi mo'mosi'velo' mene a'ine hulani' nenako Amaleki' aleve soto' i'mi dizi nizavo Guvelesi ve ne'mo lovo o ngemeline' nene mo keke' osu' lamoloseive.

Laka'ni 18

**Mose' Elenahi Meleho Aza
Mose' Elenahinesi Gipele Sitakisi Nene nGele'mizo Ogo
Mose'ni Ninge-dine' Gamazi**

- 1 Zetolo' aza O'moso inite' oloku' gize emaa' ive Midiani misubouti' ve aluvo Mose' dave nene Moseda ido' evene've

^a 17:14 Goh 25:17-18; 1 Sam 15:2-9

- zuholasi O'moso'mo inite' muki' ogo molangumu' gelo
 Guvelesi ve aza Isilaele' aleve Aigita misubouti' ngele'mizo
 2-4 ani' nemu' giline'./ Gozopo' gala'mudati' vomine Mose' aza
 elenaho Zipola'ni ido' gipele sitakisi nene numuda
 ngimiselavo Zetolo' aza nene ngele'mize molo gizebo o-
 ngedo minine'. A'mine gipele ma nene Mose' aza ato' ebeku'
 venenga ve minuvoni' ve lo gulive *Gelesomu' ve lo molo
 ido' ma nene me'nehi O'moso ne'mo nene Halao' nebelelesa
 inguti' do nu' izave lo gulive *Eliezele' ve lo molavo
 minasine'.^{a b/}
- 5 Mose' elenahi meleho Zetolo' aza a'mine Isilaele'
 alevemu' gamazi geleko Mose' elenaho Zipola' ve gipele
 sita' nene ve hadene misubou' Guvelesi ve'mi gololo' Mose'
 ve evene've zuho ve numuno mili ingi minado' ngele'mizo
 6 ani'./ Ido' Zetolo' aza gamazi hulavo Mose'ni ti' li li-imani':
 Zetolo' aza elengaho Zipola' ve gipele sita' neve nene
 7 ngele'mizo nave./ Ne'mine li li-imikevo Mose' aza vo
 Zetolo'ni nene ningo gubu' ize emo golo elo nani'. Ne'mine
 igi laminekovo' minahe li nemu' longo' i volelo' melo' igi
 gamazi gohi lilisa Mose' seli numu'veuko nene dizi vani'./
 8 Dizi vi minikevo Mose' aza Isilaele' alevemu' Guvelesi
 ve'mo Halaoda Aigita vela ine' inite' neemu' Zetolo'ni lo-
 eme' eme' ine'. Akalo' ada geni'mosi ge'nebe ge'nebe igi
 navo Guvelesi ve'mo do ngu' izine' neemukisi lo-imine'./
 9 Lo-emavo Zetolo' aza Guvelesi ve'mo Aigita veti
 a'ninguti' do ngu' izo inite' lamine' muki' o-ngidine' neemu'
 10 olize goloso izine'./ Olize izo ti' lo line': Halao' anauti' ido'
 Aigita veti a'ninguti' do lungu' izine' nemu' Guvelesi ve'mi

^a A'mine gulive Gelesomu' ne'mi monovo nene venenga ve ve.

^{*} A'mine gulive Eliezele' ne'mi monovo ne'mino neive: O'moso'ne do nu' izza' neive.

^a 18:2-3 Kul 2:21-22

^b 18:3 Apo 7:29

- gulive do hozi noluve. Ee, Aigita ve nete Guvelesi ve'mi
 evenele zuho di gelekele' i-ngidi minanguti' nene Guvelesi
 ve'mo kuluhize-ngidine' nemu' ei' gulive do hozi noluve./
- 11 Ido' a'mine Aigita ve hokolize' igi di goloso i-ngidanguti'
 nene kuluhize-ngidine' nenako nemu' idise giluvoni' O'moso
- 12 nene o'moso muki' ngivile' ogosa neive./ Ne'mine lo Mose'
 elenahi meleho Zetolo' aza inite' ma do ogo a'minguti' linge
 ma oloku' gizo O'moso emo linge ma ha lehize-dine'. Neloti'
 nene Aalonile Isilaele' aleveti gizebo ve'ine muki' neve nene
 igi O'moso'mi velelo' Mose' elenahi melehosi maka' noso'
 nite' nani'./

Mose' Nene Aza Zasi Gono Daa' Ine' Ne'mo
Gosele' Belo Ivizelesa Ine' Nene
Elenahi Meleho Ne'mo Ningo Gala Davo
Mose' Aza Lido' Ogo Zasi Gohi Ma Do Ote-ngedavo
Isilaele' Aleveti Goni'ine Gilaa' ani' Gamazi

(Goh 1:9-18)

- 13 Ingii go' lavo Mose' aza zasi gono do eveneliti goni'ine
 gelo do lisihe' olosa ogo siza' do minine'. Neivo evene' vai'
 nete di vodo vodo i-di nizavo nedengati' vo holuka' ine'./
- 14 Ido' Mose' evenekumu' gono naba goloso do-ngedo minine'
 nene Zetolo' aza ningo nemu' ti' lo longo' ine': Gaza evene'
 nene nadi' noo-ngedane. Evene' vegala oti nizavo gaza
 mo'mosikalo' mino geikovo' gono do nanivo nedengati' vo
- 15 nivenga' holuka' ine' nene nadi' ive./ Longo' ogavo Mose' lo-
 imine': Ne'mine nouvoni' nene evene' nete O'moso'mo gilido'
 ñngine ilizani' o neine' initekumu' nene gililisa nenita iga'
 nani' nemu' nene naza gamazi'ine gele-ngedaa' nouve./
- 16 Ido' engiku' lovo lolize soto' neine' gamenelo' gamenelo'
 nene nenita iga' nave. Nenita ikevo evene' ne'mo nene
 lisiheto' lolu' ogave lo lo-ngemo Guvelesi ve'mo line'

- 17 gamazisi lo huko line' nesi lo-ngemaa' nouve./ Lavo elenahi
meleho ti' lo line': Ne'mine oga' nane' nene olihe lamine'
- 18 amive./ Gono ne'mo givile' ogavo gazasi evene' mesi
ngabuso'ine goloso eleleseive. Ido' gonoli'mo givizalinako
- 19 geikovo' nene ma damolosane./ Gaza mela gelezo. Naza
O'moso'mo geikisi minivoo lo iline' inite' ma lo-gemelove.
Gaza eveneto' medelo mino O'moso'mi velelo' ogo engi'
- 20 goni' gamazi'inemu' nene lo-emelesane./ Ti' ogo ido'
O'moso'mo line' gamazi ido' lou' gamazi lo huko line' nene
apize ngemo e'metilizani' aka ngelebizo ne'mine amilo
- 21 ne'mine ilo lo lo-ngemelesane./ Ve lamine' engikuti' ma
ningo linge ma nete mulise naba evene' tauseni ne'mine
gizebo i-ngidi nizavo ma nete evene' vanu hadeti ne'mine
gizebo i-ngidi nizavo ma nete evene' fifiti ne'mine gizebo i-
ngidi nizavo ma nete mulise ngomo evene' teni ne'mine
gizebo i-ngidi minilizave lo do ote-ngedezo. Ido' do ote-
ngedeline' nene otohato ve O'mosomu' golise gili mini ve
lisihe' gote izamilizani' mini lisihe' amine' monovo ilizave li
moni ngimilisa lilizavelo' ngeli gili ngimamilizavevo' nene
- 22 do ote-ngedelesane./ A'mine ve nene zasi lili' igi gamene
gamene eveneto' gizebo igi di lisihe' i-ngidi minilizave.
Gamazi ngomo ne'mine nene engi' nigili gamazi genivesi
nene geita di alizave. Ne'mine igi gono geikisi gihilizani'
ne'mo nene gei' gonoka lapa nomine' ogavo ha gehelesane./
- 23 O'moso'mo lo-gimine' gamazi ma nene mene nolo-gimuve.
Lo-gimuvodo' e'metiline' nene ne'mo gonoka gosele' gebelo
givizamivo minelesane. Ido' ne'mine ogo gamazi'ine do
lisihe' oganivo evene' muki' mene mulu'ningu' hongu lamine'
livo numu'nida tine' mili vilisave./
- 24 Mose' aza elenahi melehido' gele emo line' gamazi muki'
- 25 nene gele dani'./ Ado' aza Isilaele' aleve mukikuti' nene
otohato ve ma ningo do kegesse-ngedo engikuti' linge ma

- nete mulise naba evene' tauseni ne'mine gizebo i-ngidi
 nizavo ma nete evene' vanu hadeti ne'mine gizebo i-ngidi
 nizavo ma nete evene' fifiti ne'mine gizebo i-ngidi nizavo
 ma nete mulise ngomo evene' teni ne'mine gizebo i-ngidi
 minilizave lo do ote-ngedo Isilaele' alevelo' gizebo ve hulo-
 26 ngidine'./ Hulo-ngedavo ingine zasi lili' igi gamene gamene
 eveneliti goni'ine gili minaa' ani'. Gamazi ngomo ngomo
 nene angise'ine ha di lisihe' niigi geni gamazi ne'mine nene
 27 Moseda di iga' ani'./ Neloti' alinge' nene Mose' aza elenahi
 melehine aka vilida ele'mizo do vo hulo-davo aza ei' misubo
 ebe'vela vine'./

Laka'ni 19

**Isilaele' Aleve Sinae Golo Avita Igi Minikevo
 O'moso'mo Mose'nimu' Ti' Lo Lo-ngemezo Line':
 Lingine Neni' Evene'ne Gehepeve Minilizaze.
 Lingine Ningi Nizavo Naza Lemo Sinae Gololo' Minelesuve.
 Ido' Lemo minelesuze.
 Lingine Nenito'Di Kekeize Li Minilizado' Di Lisihe' I Minilo.
 Ne'mine Igi A'mine Gololo' Gehepeve Nene Dizamilo Lo
 Lo-ngemezo.
 Ido' A'mine Line' Gamazi Lo-ngemavo
 Isilaele' Aleve A'mido' Gili Dani' Gamazi**

- 1 Aigita misubo huli adoti' naba tili ike'niu' nene Sinae
 2 misubo hadivelo' igi hetelani'./ Lehidimi misubo nene huli
 igi misubo hadive Sinae neu' igi Sinae golo nene ve'nida
 3 neivo seli numu'ine di oti ingi moni minani'./ Mose' aza
 O'mososi gamazi lo volelo' melo' olosa gololo' nene dizo
 vine'. Ido' gololoti' nene Guvelesi ve'mo Mose'ni vise lo ti'
 lo line': Zakobo' a'vopilemo' Isilaele' aleve nene ti' lo lo-

4 ngedezo:/ Naza Aigita aleve o-ngiduvo nite' neesi ido' nolise
 goduvo' holoke'ne'velo' ngele'mizo patelo vaa' neine'
 ma'mino lengi' lengele'mizo mela nenita uvoni' neesi mo
 5 ningikeve./ Neemu' nene lingine neni' gili nimi lo huko lo-
 lingiduvoni' gamazi nesi gili dalizani' nene neni' evene'ne
 gehepeve minilisave. Misubo mukikisi a'mingu' evenekisi
 6 neni' initekovo' nizani'za^a / lingine Guvetinesi ve nenito'
 medeli mini mono' gono daa' zuho mini nenito' kekeize lo
 neine' evene'ne zuho minilizave. Neve nene Isilaele' aleve
 lo-ngemeline' gamazi ne neive line'.^{b c} /

7 Neemu' nene Mose' aza gololoti' lemo eveneliti gizebo
 ve nene do nubo o-ngedo Guvelesi ve'mo lo-dine' gamazi
 8 muki' nene lo-ngimine'./ Evene' mukilite di hamo' igi ti' li li-
 imi lani': Guvelesi ve'mo line' inite' muki' nene ogo molo
 olosune. Ne'mine likevo Mose' aza ne'mine li lave lo
 9 Guvelesi ve lo-emavo/ Guvelesi ve'mo Mose'ni ti' lo lo-
 imine': Evenelite nigilavo gamazi lo-gemekuvo ingine
 gamene gamene gili gimaakovo' ilizangumu' nene naza gei'
 nanida limuso nabau' alosa nouve.

Ido' Mose' aza evenelite lani' gamazi nene Guvelesi ve
 10 lo-emavo/ Guvelesi ve'mo Mose'ni ti' lo lo-imine': Gaza vo
 evene' nene nenito' kekeize li minilizangumu' nene aizekisi
 idisesi di va'va' i'mi vi mini okodido' initetine nene noso'
 11 izilo lo ngedezo./ Okozo' nene evenelite ningi nizavo
 Guve'nesi ve neni' nene Sinae gololo' lemelsoni' nenako
 nemu' a'mine gamene ogavo ma ingine mo di va'va' igi
 12 minilizado' o neive./ Gaza nene golo gizene gizenela noso
 molo evene' lingine ehe' igi mini nelasi vami ido' a'mida
 inite' matatokisi di gilamilo lo lo-ngedezo. Evene' mali'mo

^a 19:5 Goh 4:20; 7:6; 14:2; 26:18; Tit 2:14

^b 19:5-6 1 Pet 2:9

^c 19:6 Lev 1:6; 5:10

- 13 do gelavo ma nene bili hililizave./ Oko'nolo' di gilami elese bililizahe geheni huli' huli' igi bililizahe ilo. A'mine gololo' di gililizani' nene huli-ngidikevo ve'inesi minamilisave. Mo evene' ize gulomukisi nene noluve. Pikuli' ma izavo ma evene' nene a'mine gamenelokovo' golola dizilizave line'.^a /
- 14 Ido' Mose' gololati' lemo evene' nizada ogo lo-ngedavo ingine O'mosolo' kekeize li minilisa di va'va' igi mini
- 15 oko'nido' inite'ine noso' izani'./ Mose' ti' lo lo-ngimine': Okozo' nene di va'va' igi minilo. A'mine gamene olihe ogo vo osu' lamivo lingine venekisi ingamilo.

**Isilaele' Aleve Ningi Nizavo
O'moso'mo Sinae Gololo' Lemo Ogo
Gohi Evene' Gololo' Dizikelizave Lo
Mose'ni Gamazi Lo-imine' Gamazi**

- 16 A'midoti' dei naba tili ogavo go' nolivo gololo' nene go' lete lete lo go' pa'na pa'na ogo limuso like like ogo pikuli' naba goloso nene izine'. Ne'mine ogavo evene' nene
- 17 ngehelele goloso izavo luvo luvo izi minani'.^b / Ne'mine ogavo Guvelesi vesi votene' olone lo Mose' aza evene' nene ngele'mizo vavo numu'ine huli vi golo gizeneu' oti minani'./
- 18 Guvelesi ve oloku' leme neidi'mo sokile'mo Sinae gololo' nene hite osu' lo minine'. Sitopu naba' nabauti' dizine' gelavo sokile ne'mo naba goloso nodizivo nodizivo gololo'
- 19 mi'mi' naba izo minine'.^c / Ido' pikuli' a'minguti' izine' ma nene mo gohi naba goloso ize'mo vo minine'. Ne'mino neivo Mose' aza Guvelesi ve gamazi lo-emavo aza nolo molo lo-emeka' emeka' neivo go' lete lete line' giline'./

^a 19:12-13 Heb 12:18-20

^b 19:16 Lev 4:5

^c 19:16-18 Goh 4:11-12

- 20 Guvelesi ve nene Sinae golo mulolo' gehepeve lemo Mose'ni golo mulolo' gehepeve ano lo lo-davo dizo vine'./
- 21 Dizos vavo Guvelesi ve'mo Mose'ni ti' lo lo-imine': Evene' muki' hilikelizave. Gaza nene lemo vo hungo' molo lo-ngedezo: Lingine golo gizene gizenela noso muluvoni' nene avuto' igi Guvelesi ve ningelone li gololo' dizamilo./ Ido' neni' nouvodo' avito' dizilizado' i minave ado' neni' nimani' inite' oloku' gizi lehizi-nidaa' ave inginesi nene nenito' kekeize li minilizado' monovo'ine di lisihe' ilizani' o neive. Ne'mine amavo Guve'nesi ve naza upuho' ogo ngebelalove./
- 23 Ti' lavo Mose' aza Guvelesi ve ti' lo lo-imine': Gasika hungo' molo lingine Sinae golo nene kekeize lo neive li noso mili a'mido' dizamilo lo lo-ngede nainako evene' nene
- 24 ngeli dizamilisave./ Ido' Mose' ne'mine lavo Guvelesi ve'mo ti' lo lo-imine': Lemo vo Aaloni'nisi ele'mizo ano. Lingine ha alisine'za neni' nimani' inite' oloku' gizi lehizi-nidaa' ave inginesi haza evenekisi nene noso muluvo ebe' nene avuto' igi amilizave. Upuho' oko do goloso o-ngedalozze line'./
- 25 Nemu' Mose' aza evene' nizada nene lemo vo lo-ngimine'./

Laka'ni 20

O'moso'mo Aka Gamazi Lo-ngimine' Gamazi

(Goh 5:1-21)

- 1 Gamazi muki' mene O'moso'mo line':/
- 2 Naza lengi' Guvetinesi ve O'moso Aigita misubou' gelekele' ve minanguti' kuluhize-lengedo lengele'mizo uve ve./
- 3 O'moso gohi ma gelekele' i-ngidami neni' hamokovo' gelekele' i-nidi minilizave./

- 4 Lingine O'mosote ve li okulumoku' nizani' inite' nehe
 misubou' nizani' inite' nehe ido' misubo gala'munguko neine'
 nosou' nizani' inite' nehe ato' ato' nite' nizani' nelou'
- 5 ningi avazaha'ine lili' amilizave./ Guvetinesi ve O'moso naza
 evene' ma nenito' medeli o'moso ato' di minaa' avemu' nene
 nizebolo' molavo a'mine nenikumu' gosele' ngebela' neiveti
 lihime'nido' medelo lihime ngemekuvo engi' izipaha'nidokisi
 nga'vopilemo' zuho'nidokisi ido' engi' izipaha'nidokisi vo
 daa' neine' nenako nemu' nene lingine soza o'moso lili' igi
 gubi' izi ngimi ngopo'ni lamilisave.^a /
- 6 Ee, ne'mine iga' ave nene lihime ngemaa' novoni'za evene'
 vai' tauseni muki' ne'mine ado' lu'ine neni' nimii luvoni'
 gamazilo' gili daa' ave nene nasahili' o-ngedovo' minaa'
 nouve.^b /
- 7 Lingine Guvetinesi ve O'moso neni' gulive'ne di gopo igi
 di getipe gamazi gize zohi' gamaziu' mili lamilizave.
 Guve'nesi ve naza neni' gulive'ne di gopo igi lilizave nene
 hamokisi hulo-ngedamo lihime mukito' ngemelesuve.^c /
- 8 Lingine holise' nemu' gili mini a'mine gamene nenito' di
 9 kekeize li di minilo.^d / Salele hamoku' gamene sigisi nene
 10 gonotine ha dalizado' o neive./ Ne neiha dei seveni neve
 nene Guvetinesi ve O'mosola kekeize lo neine' holise'
 gamene ne neive. Nene gameneu' nene linginesi
 izipahatinesi gelekele' izipetinesi ize gulotinesi ido' ebe'
 maukoti' igi numudine ebetingu' ingi nimonave nesi nene
 11 gono mo keke' damilizave.^e / Guvelesi ve nene gamene
 sigisi ne'mi lulou' nene okulumo' misubo guvo noso ido'
 a'mingu' minani' inite' muki' nene lolo' ogosa gamene seveni

^a 20:4-5 Kul 34:17; Lou' 19:4; 26:1; Goh 4:15-18; 27:15

^b 20:5-6 Kul 34:6-7; Nab 14:18; Goh 7:9-10

^c 20:7 Lou' 19:12

^d 20:8 Kul 16:23-30; 31:12-14

^e 20:9-10 Kul 23:12; 31:15; 34:21; 35:2; Lou' 23:3

- limuso ne'mo gamene sigisi ne'mi lulou' nene gololo' molo hite-do minine'. Ido' gamene seveni ine' nene Guvelesi
 18 ve'mo limuso olusokuti' Mose'ni vise lavo/ Mose' aza limuso lulou' dizo golola dizo vine'. A'mida neivo liti'muso izo go' lo ine' nene foti ine'.^a /

Laka'ni 25

O'moso'mo

**Isilaele' Aleve Seli Mono' Numuno Lili' Ilizangumu'
 Inite' Ato Ato' Di Imilizangumu' Mose'ni Lo-imine' Gamazi**

(Kul 35:4-9)

- 1, 2 Guvelesi ve'mo Mose'ni ti' lo lo-imine':/ Neni' ve li inite' mili-nidilizaze. Isilaele' aleve lo-ngedezo. Lu'ine'mo do ote-ngedavo evene' inite' nimilisa gililizavelati' gei' nene dozo./
 3 Inite' nene ne'mine inite' nimilizani' nene dozo: nGolisi
 4 siluvakisi ido' *bolonisisi nene dozo./ Gumi kala gulehedise ido' gulehe' teleti nala' sipisipi zopovodunu' lili' ani' ve. Ido' lavolavo laminekisi meme' ize lopovosi ve./
 5 Sipisipi vemoholiti losuvo gulehe' guhise hilanikisi ido' *guvo nosou' bulumakaliti losuvosi ve. Ido' *akasiza za lamine'

^a 24:18 Goh 9:9

* Bolonisi nene ngoli ido' siluva' ne'mine neine' inite' ne neive. A'mine ne'mine inite' ato ato' vai' li nizave. A'minguti' lingeliti gulive'ine ti' li nizave: ngoli ve, siluva' ve, kopa' ve, tini ve, zingi ve, ledi ve, bilaasi ve, ido' bolonisi ve. Kopa' nene toea moni ngomo lili' iga' ani' inite' ne neive. Ido' bolonisi nene lili' ilisa kopakisi tinisi zingi ngomosi di oloku' di lala li di gopo igi lili' iga' ani'. A'mine bolonisi nene ngoli gele vine'za ngoli ne'mo bolonisi nene ivile' ivosa geni' ve nabasi neive. Ido' bilaasi nene a'mine'mine igi kopakisi zingisi inite' linge masi di di lala li di gopo igi lili' iga' nave.

* Guvo nosou' bulumaka' ve lume' nene bulumaka' ize gihilemu' lamune. Asi guvo nosou' monaa' ani' inite' naba alaha' naba' naba gili vani' nemu' lume' ve. Ee, a'mine inite' nene alaha' gili vani'za ingine ize-gulo nama-gahaliti zuhouti' mini guvo noso avilelo' dizi a'mine zuhouti' inite' muki' hepe' daa' nani' ma'minisa inginesi hepe' daa' nave. Ido' bulumakalite guvise ni'mi monaa' nadi'mine igi a'mine guvo nosou' bulumaka' netesi nene guvo nosou' guvise dizaa' neine' nene ni'mi monaa' nave. A'mine guvo nosou' bulumakaliti losuvo nene mo amuzo malehe nite' ne neive.

* Akasiza za nene gasava'vesi za ngomo ne neive. A'mine za nene amuzo malehe za mino hulupo elesa'mine' nenako nedunu' nene palani lamine' lili' iga' ani'. A'mine ne'mine za ma nene Sinae misubola ido' noso ohuno naba Guvo Noso Ohuno ne'mi gabevela minaa' nave.

gamazi mene bukuu' neine' nemu' Guvelesi vesi linginesi
gamazitine di hamo' ani' nene do amuzo nomolave.^a /

**O'moso'mo Gehenilo' Gizine' Lou' Gamazi Dalosa
Mose' Aza Sinae Gololo' Dizo Novivo
Guvelesi Ve'mi Labana've Naba A'mido' Lemo Minine' Gamazi**

- 9 Mose' ve Aaloni' ve Nadabu' ve Abihu' ve gizebo ve 70
10 neve golola dizi vi/ Isilaele' aleveti O'moso nene ningani'.
Gizeneuko aka nene gumi kala lo guno amine' geheni
okulumo' ne'mine silingenge'ne hulo minine' ne'mine
11 minine'./ Ee, Isilaele' aleveti gizebo ve'ine nene O'moso
ningani'za ma do goloso o-ngedamivo noso' nite' ni minani'./
12 Guvelesi ve'mo Mose'ni ti' lo lo-imine': Nouvoda gololo'
mene dizo ogo minezo. Geheni ma evene' igi mili iliza
monovomu' lo huko luvo gamazi muki' ongo neine' nene
13 gemelesuve. Nene apize ngemeline lo gizuvoni' ve./ Lavo
Mose' lida molada gelekele' oga' ive Zosua'nisi ele'mizo
14 O'moso'mi golola dizo vine'./ Dizo volosa Mose' aza Isilaele'
aleveti gizebo ve ti' lo lo-ngimine': Lingine melo' mini
lelikumu' gizebo igi minilo. Vo tine' molo alosusize.
Gamazitine ma soto' neivo ma nene Aaloniki Huliki nene
maka' lengikisi nizave. A'mine gamazitine nene engita di
vilo./
15 Mose' aza dizo novivo limuso ne'mo gololo' molo hite-
16-17 dine'./ Molo hite-davo Guvelesi ve'mi labana've naba
nene Sinae gololo' lemo minine'. Minavo Isilaele' aleve
ningani' nene Guvelesi ve'mi labana've naba ne'mo golo
mulolo' hoze olo' naba lovo' lovo' ogo minine' giline'. Ido'

^a 24:8 Mat 26:28; Mak 14:24; Luk 22:20; 1 Kod 11:25; Heb 9:19-20; 10:29

Laka'ni 24

Sinae Golo Gizenela Mini

**Isilaele' Aleve Bulumaka' Bili Oloku' Gizi O'moso Imi
Guvelesi Ve Lo Huko-ngidine' Gamazi Gele Dalone Li
Guvelesi Vesi Gamazi'ine Di Hamo' Igi
Vanisedunu' A'mine Gamazi Di Amuzo Milani' Gamazi**

- 1 Guvelesi ve'mo Mose'ni ti' lo lo-imine': Gezesi
Aalonikisi Nadabukisi Abihukisi ido' Isilaele' aleveti gizebo
ve 70 nesi golola dizi igi hoto' mini gubi' izi nopo'ni lilo./
- 2 Evene' nene maka' dizi amilo. Ido' golola dizi ave nene
avito' amavo Guve'nesi ve neni' nouvoda nene Mose'
geikovo' avito' ano./
- 3 Mose' aza vo Guvelesi ve'mo line' gamazi muki' nene
evene' lo-ngimine'. Evene' mukito' li-imi ti' li lani': Guvelesi
- 4 ve'mo line' inite' muki' nene e'metelesune./ Guvelesi ve'mo
line' inite' muki' nene Mose' luhuvo gize molani'. Nedenga'
holukati' oto golo gizeneu' nene O'moso oloku' gize emaa'
alata nene lolo' ine'. Ido' geheni ha'na tuvelu nene Isilaele'
aleveliti zuho tuvelu nene hamoto' hamoto' medelo
- 5 minelive ve lo hizo otine'./ Ti' ogo Isilaele' ve goso've ma
ngimiselavo vi bulumaka' ma ngibili oloku' gizi O'moso
imaa' ofasi ido' O'mososi do hamo' oga' ofasi gizi imani'./
- 6 Ido' bulumaka' ngibilanguti' vanise linge nene Mose' do
lapeseu' molo linge nene alatalo' nene hutile' ogo huline'./
- 7 Huloko evenelite gili nizavo aza O'moso'mo lo huko-ngedo
line' gamazi gize molani' buku nene do gamazi nolo nabauti'
gato ngimine'. Gato ngemavo evene' ingine O'moso'mo line'
- 8 inite' muki' nene gele do a'mido' ha olosune lani'./ Ti' ogo
lapeseu' vanise do molani' nene do hutile' ogo evene'
oko'nido' huline'. Ido' vanise hutile' ogo nohulo ti' lo line':
Vanise me'mo nene Guvelesi ve'mo lo huko-lingidine'

- 25 ha'na nesi nene bilivi' itivi' ilo./ Lengi' Guvetinesi ve O'moso neni' nopo'ni laa' ilizave. Ne'mine ikevo naza no'noho' ize-lengedo noso' nitekisi naa' nososi lengemo siki
- 26 initetine nene do hulo-lengedaa' o minelesuve./ A'mine misubotingu' nene vene' hamolitesi izipaha'ine minine' nene gamene amido' gopo gidi izipe hulamilisave. Ido' izipaha'ine gidamani' ma minamilisave. Mo gidanikovo' minilisave. Ido' naza amuzo lengemekuvo lingine geti hilami gamene ha'na minilisave./
- 27 Ido' lingine olihe vi hetelamavo misubo'ningu' viliza aleve nene do ngehelele ize-ngedekuvo neni' golise gililisave. Ee, ne'mine okuvo ne'mo nene lingine vilizada vilizada minilizave muki' gopo ga'ine gili lengikumu' golise
- 28 ilisave./ Naza lokuvo lengi' vetidati' himoni nabalite ngimiseli di vani' gilivo Hivi ve Kanaha ve ido' Heti aleve
- 29 nene vihaha ilisave./ Kilisimasi hamokovo' ogo novivo a'mine aleve muki' geto ngimiselo hulo osu' loloni' nene misubo la'napa goloso vavo lopoiso nitelite vai' goloso li
- 30 mini lingivile' ikelizanako ne'mine amolосуve./ Gamene ha'na gidini ogo novivo zou zou lo ngomo ngomo ngimiselo hulo-ngedeka' hulo-ngedeka' nouvo misubo dika' dika' igi izipahatine gidi'mi vi vai' goloso lisa nelo' nene misubo vai'
- 31 di osu' lilisave./ Misubotine'mi laka'ni nene molo-lengedelesuve. Gulehe' Noso ve laa' ani' guvo nosolati' vo Meditelania nosola vo misubo hadive nabala nevo Zupalati nosola nene voloseive. A'mine misubou' ingi monave nene
- 32 lengi' adingu' lengemekuvo ngimiseli di vilisave./ Inginesi o'moso nite'inesi maka' zogo mili namilisave./ Inginge lengi' misubou' ingi minilizani' nene lengemengu' milikevo lingine engi' o'moso inite'ine ngopo'ni li neni' ve'nelo' lihime dikelizaze. Huli-ngimikavo minamilizave./

- 17 Guve'nesi ve O'moso neni' nouvoda nene vemohota muki' ingine igi kilisimasi hamoli'mi lulou' nene a'mine gamene sitohamo soto' i nimilizave./
- 18 Neni' gizi nimilisa ize ninimi ma nene zisiti hulani' beleti nene a'mingu' milamilo. Neni' gizi nimani' izeli'mi gavozo nene hulikavo nedenga' amivo./
- 19 Midingu' gana' dolizilizani' initekuti' lamineta nene Guvelesi ve'mi numungu' di dizi imilo.
Meme' ize angale nene izelehi amine novozou' somo milamilo.^a /

Mose' Imine' Molo

O'moso'mo nGele'mizo Kanaha Misubouko Vo

A'mingu' Aleve nGimisele Hulo

Misubo'ine Do nGemelesa Lingumu' Lo-ngimine' Gamazi

- 20 Guvelesi ve'mo ti' lo line': Naza akalo' gizebo o-lengedo lamino lengele'mizo misubo do va'va' o-lingiduvoda vilive
- 21 lo angelo' nene ma noimiseluve./ Ei' lilida molalida igisavo' vilo. Gamazi've gili hulamilo. Neni' gulive eita neivo nenito' medelo mineline' nenako gamazi've avuto' ilizani' lihime
- 22 nene hulo-lengedamo lihime lengemeleseive./ Ido' ei' lida lida igi neni' luvo gamazi muki' e'metilizani' nene naza lovo i lingimilizave biluvatine lovo o ngeme'mo vo minelesuve./
- 23 Angelo'ne ne'mo gomu' molo lengemo Amoli ve Heti ve Pelizi ve Kanaha ve Hivi ve ido' Zebusi ve neti misubou' nene lengele'mizo vavo ngebelo do osu' lo-ngedelesuve./
- 24 Lingine engi' o'moso inite'nido' gubi' izi ngimamilo. Ee, a'mine o'moso nite' ngopo'ni lami ingine monoto' igi mono' li-ngimaa' nani' ne'minesi nene amilo. Asi o'moso inite'ine nene bilivi kusivi' igi engi' mono'inemu' gili di otani' geheni

- 12 Gamene sigisi nene gono ha dalizaha bulumaka' izetinesi dongi izetinesi ido' lengiku' soto' ani' gelekele' izipetinesi vovotingu' nizani' venenga vesi ingine mehe'ine di tusi mini gili minilizangisi gamene seveni neu' nene gono dami mine gili minilizave.^a /
- 13 Guvesi ve'mo ti' lo line': Gamazi luvoni' vai' nene gililo. O'moso ve li lani' inite' ato ato' mala li ngopo'ni lamilizave. Mo keke' engi' gulive'ine igi lengi' vetinguti' lamilizave./

Mose' Imine' Molo
Holise' Miniliza Gamene Naba Sitohamomu'
O'moso'mo Lou' Gamazi Line' Lo-ngimine' Gamazi

(Kul 34:18-26; Goh 16:1-17)

- 14 Kilisimasiu' kilisimasiu' nenikumu' gili noso' nite' naa'
- 15 holise' nene sitohamo minilisave./ Ado' do lulu iza' inite' zisiti hulamani' beleti nalizani' holise' ma minilisave. Ike'ni ma gulive *Abibiu' nene lingine Aigita misubo huli heta ani' nenako a'mine ike'ni Abibi ogavo ma muluvoni' gamenelo' nene api' igi gamene seveni ogo novivo beleti nalizani' nene naza lo-lingimuvoni' ma'mino zisiti hulamani' beletivo' nene ni minilisave. Ido' nei' ve'nela alizani' nene evene' hamolitesi neze nimiliza nite' nomine' mini neni' ve'nela
- 16 amilisave.^b / Ido' misubotingu' zuho' ani' viti api' igi dolizilisa a'minguti' ma nimi nenikumu' gili noso' nite' naa' holise' minilisave. Ido' kilisimasi nene osu' lolosa neivo za gihiletine husani' nene do lumo igisa a'minguti' ma nimi nenikumu' gili noso' nite' naa' holise' minilisave.^c /

^a 23:12 Kul 20:9-11; 31:15; 34:21; 35:2; Lou' 23:3; Goh 5:13-14

^b A'mine ike'ni Abibi nene ogavo Zuda ve kilisimasi gosoho' api' neive laa' ani'. Ido' a'mine ike'ni nene leli' ike'ni "March" osu' lolosa neivo he "April" api' neivo he ne'mine gamenelo' oga' ine'.

^b 23:15 Kul 12:14-20; Lou' 23:6-8; Nab 28:17-25

^c 23:16 Lou'23:15-21, 23:39-43; Nab 28:26-31

- 6 Lingine evene' goho' gahali' gonito' otikeyo ma monovo
 lisi'heto' goni'ine di lisihe' i-ngidilizani' aka nene di tili-
 ngidami evene' mukito' monovo lisihe' o minidokovo' di
 7 lisihe' i-ngidilo./ Goniku' nene soza sakupo gamazi lamilo.
 Ne'mine igi evene' lisihe' lihime've nomine' nene lihime
 daave li bili hiamilisave. Ne'mine ilizave nene lihime
 8 ngemamolohe./ Ido' goniku' leli' gamazi nene hize ele'
 ilizangumu' ve li evene' malite moni lingimilisa navo ma
 nene mo keke' a'mine moni nene damilo. Ne'mine
 monovomu' moni daa' ne'mo monovo lisihe' ningi gilaa'
 avete ningi gilamani' gilivo mini evene' lisihe' lihime'ine
 nomine' minaveti goni'ine di gopo i-ngidaa' nave. Nemu'
 nene moni lingimilisa nilavo ma nene mo damilisave.^a /
- 9 Lingine Aigita misubou' venenga ve minani' nenako
 venenga ve gilani' initekumu' nene mo gili nizaze. Venenga
 ve nene mulumo geni gihi-ngidamilo.^b /

Mose' Imine' Molo

**Misubo'ine Mine Geleline' Kilisimasimukisi
 Ido' Salele Saleleu' Dei Naba Seveni Nemukisi
 Lou' Gamazi Lo-ngimine' Gamazi**

- 10 Kilisimasi sigisi ne'mi lulou' nene misubotingu' nene
 zuho' niigi a'mingu' dizeli inite' nene ha dolizilizaha/
 11 kilisimasi seveni ilingu' nene misubotine ha mine gelo
 minelize. Lingine gono damavo a'mingu' dizeline' inite' nene
 di mili namilo. Huli-ngidikevo lengiku' goho' gahali' nizani'
 nete di ni mini lumo hulilizani' nene loposo itelitelite
 nalizave. Mo vaini minesi oliva zazuho nizada nesi mo
 ne'minevo' ilo.^c /

^a 23:6-8 Lou' 19:15; Goh 16:19

^b 23:9 Kul 22:21; Lou' 19:33-34; Goh 24:17-18; 27:19

^c 23:10-11 Lou' 25:1-7

- 31 Lingine nenita kekeize li minilizangisi guviseu'
 nomonivo lopoiso initelite bili hulikani' ize'mi me'mele nene
 namilizave. Gulovo' ngimilo.^a /

Laka'ni 23

Mose' Imine' Molo
Evene' Monovo Lisihe' O-ngedaakumu'
Lou' Gamazi Lo-ngimine' Gamazi

- 1 Lingine evene' nilani' gamazi nene gosoho' li di vi evene'
 mala li-ngimamilo. Lingine evene' goloso hizi ele' i-dilisa
 gonito' gamazi gosoho' lamilo.^b /
- 2 Evene' linge muki' monovo goloso di'mi nivavo ma gaza
 evene' vai' ne'mine naanako lo nge'meto a'mine monovo
 golosou' nene vamozo. Ido' gonito' witness gamazi liline'
 nene gamazi lisihe' lamangu' gopo evene' mukita molo engi'
- 3 gamazilo' hize ele' o-ngedamozo./ Ido' evene' goho' gahali'
 goni' i-di nizavo goho' gahali' ve lo mulumo gele-doo
 monovo've gelamanido' gopo ezela molamozo.^c /
- 4 Evene' mali'mi bulumaka've he dongi ize've he ma
 kuluhizo gopo nomonivo ningeline' nene a'mine evene'
 geikisi lovo lolize iga' asive'mi inite've nolinekisi gaza
- 5 ize've do ti'no vo melehida emezo.^d / Ido' geikumumu' gosele'
 goloso bilive mali'mo dongi ize've mehenelo' henenai vai'
 gehe-davo geni ne'mo lemo ongavo do ote-delesa neivo ma
 gaza ninge hulo vamo hize ele' o-dezo. Gazasi makato' di
 hozi li-dilizo./

^a 22:31 Lou' 17:15

^b 23:1 Kul 20:16; Lou' 19:11-12; Goh 5:20

^c 23:3 Lou' 19:15

^d 23:4-5 Goh 22:1-4

- 23 hilikeni' nesi di goloso i-ngidamilizave.^a / Ee, lingine ma di
 goloso i-ngidikevo ingine agae li nezela lilizani' nene mo
 24 gele ngemelesuve./ Nizebolo' molavo lokuvo evene' malite
 lovo i lingimi bainati mitetunu' lingibili hililisave. Lengi'
 eledingé nesi gevono' lili' ikevo izipahatine nene me'ninge
 hilani' lili' ilisave./
- 25 Lingine neni' evene'ne zuhouti' goho' gahali' minave nene
 moni ma dina' igi ngimilizani' nene moni dina' igi ngimaa'
 bisinesi iga' avete iga' adi'mine ami polopetisi damilizave.^b /
- 26 Moni dina' ogo nemaine' mo bekimi o-gedeloni' nene
 gele ele'vole' iliningumu' ve lo evene' goho' gahali'mo
 saketi've gei' angau' huliline' nene ho' olihe lemamivo
 27 a'mine saketi've gohi do ti'no emezo./ A'neve nene oko'nolo'
 hite minivo mu'musi' oga' ine' inite' ve. Gaza emamiline'
 nene holuka' naniteku' ongalive. Emamanivo aza agae lo
 nenita liline' nene naza evene' mulumotine gelaa' nouvoni'
 nenako gele emo lihime gemelesuve.^c /
- 28 Lingine O'moso di'mi limi-di lami mini evenetine mukito'
 gizebo ve'ine minive ma do goloso o-deline' gamazi lamilo.^d
 /
- 29 Lingine vititingutipe uvelitingutipe vainitingutipe inite'
 matatinguti' neni' nimilizado' o neine' inite' nimilisa nene
 zou zou li minamilo. Ido' vene' gana' gidani' gipetine nene
 30 neni' nimilizave./ Ido' a'mine'mine igi gana' soto' ani'
 bulumaka' ize he sipisipi ize he nesi neni' nimilizave. Gana'
 soto' ani' inite' nene soto' igi ize'ningesi gamene seveni
 minikevo gamene eit neu' nene nenita nimilizave./

^a 22:21-22 Kul 23:9; Lou' 19:33-34; Goh 24:17-18; 27:19

^b 22:25 Lou' 25:35-38; Goh 15:7-11; 23:19-20

^c 22:26-27 Goh 24:10-13

^d 22:28 Apo 23:5

- 15 delive./ Ne neiha ize meleho a'mida neido' nene ize goloso
ine' noline' nene ize gizebo o-dive'mo mo meni
molamoloseive. Ido' gono daa' ine' ize nene do
minelongumu' moni gemeka' gemeka' o minelesuve lo ize do
minine' noline' nene a'mine gemelove line' monivo' emelive./
- 16 Ido' oko'nolo' damani' alu ma olihe ve mali'mi izeni
elenaho minamido' nene ve mali'mo longo' o-do oko'nolo'
daline' nene a'mine ve aza alungoli'mi melehine meni hize-
davo a'mine alungo elenaho lolo' ogavo do mineleseive./
- 17 Ido' meleho o've damilive liline' nene a'mine ve ne'mo
ele'ningine meni hizaa' ani' votigilelo' nene moni ha
emeleseive.^a /

Mose' Imine' Molo

Monovo Goloso Ato Atokumu' Lou' Gamazi Lo-ngimine'

- 18 Sikalahu' golosolati' luso gamazi laa' ani' vene' ne'mine
nene mo ve'inesi ha minilizave li ningi huli-ngimikamilo.^b /
- 19 Ido' ve malite ize gulo oko'nido' dalizani' nene mo ngibili
hililizave.^c /
- 20 Ve mali'mo Guvelesi vetine nomine' o'moso ato' ma ofa
gidini inite' emeline' nene mo osu' lilive li bili hililizave.^d /
- 21 Lingine nene Aigita misubou' venenga ve minani'
nenaze. Lengi' vovotingu' venenga ve nene mulumo geni
nite' i-ngidi di goloso i-ngidamilo./
- 22 Lingine vene' gevono' va'ninge hilikeni' nene di goloso i-
ngidamilizave. Ido' lodomulo izipe ize'ninge me'ninge

^a 22:16-17 Goh 22:28-29

^b 22:18 Goh 18:10-11

^c 22:19 Lou' 18:23; 20:15-16; Goh 27:21

^d 22:20 Goh 17:2-7

- gumine veli'mo gumine davo gumine ve nene ningilizani'
 nene gumine ine' inite'to' golo hizo noemo a'mine'mine ogo
 8 gohi ma molo emelive./ Ido' gumine ive nene ningamilizani'
 nene heneni molokive nene O'moso'mi velelo' ele'mize mili
 eze zuho ve'mi inite've ei' gumine dahe nemu' vise' ilizave./
 9 Ido' evene' mali'mo evene' mamu' aza neni' inite'ne nene do
 neive liline' nene nanitekumu' lilihe bulumakakumu' lilihe
 dongi izemu' lilihe sipisipi izemu' lilihe oko'nolo' inite'vemu'
 lilihe ido' inite' ato' vo halekine' mamu' lilihe nolivo eze ma
 ne'mo o'ove neni' inite'ne neive nolivo ma nene a'mine
 evene' sita' ngele'mizi O'moso'mi velelo' milikevo
 O'moso'mo engikuti' ne'mo lihime dave lo ma do soto' ilive
 aza a'mine vo halekine' inite'to' meni nomolo a'mine'mine
 ogo gohi ma a'mido' molalive. Ido' ne'mine initekumu' goni'
 ilizani' gamene muki' nene idise luvoni' monovolo' di mili di
 lisihe' ilisave./
- 10 Ve mali'mo bulumaka' nehe dongi ize nehe sipisipi nehe
 ize gulo've gizebo o-nedelive lo ve ma emavo helelihe
 oko'nou' goloso gelelihe evene' ningamavo di vikevo vo
 11 halekelihe iline' nene/ gizebo o minive ne'mo naza do goloso
 amuve lo Guvelesi ve'mi velelo' nene lamine' noluve lilido' o
 neive. Ne'mine iline' nene ize meleho gele emavo
 12 ize melehine nene meni emamoloseive./ Ne neiha ize nene
 mo gumine dani' noline' nene meni ize melehida hize-
 13 delive./ Ido' ize nene loposo initelite bilikevo ma a'mine ize
 gizebo o-dive ne'mo ize oko'no lumo ha neine' nene do ogo
 ngelebizeleseive. Ize meleho aza loposo initelite bilani'
 izelo' nene meni damilive./
- 14 Ido' ve mali'mo ve mali'mi ize gulo ma do-de mino do
 emelove lo do minelido' oko'nolo' goloso ilihe helelihe
 meleho nomido' ti' iline' nene gizebo o-dive ne'mo a'mine
 izelo' meni do ngomo amo lisihe' o mineline' meni hize-

Laka'ni 22**Mose' Imine' Molo****Inite' Vo Halekahe Gumine Dahe Initeli'mo Do Goloso Ihe
Nemu' Meni Hizaakumu' Lou' Gamazi Lo-ngimine'**

- 1 Ve mali'mo ve mali'mi bulumaka' ize he sipisipi ize he gumine ogo belo nalihe do vo meni dalihe iline' nene bulumaka' ize hamoto' nene bulumaka' ade hela oku' livo molalive. Ido' sipisipi hamo' gumine daline' nene sipisipi
- 2-4 sita've sita've izelive./ Meni hizelive. Ido' meni hizeli inite've ma nomivo ma ei' oko'no nene ve malite meni hizikevo a'mine meni nene ize gumine ido' nene meni hizelive. Ido' gumine ine' ize nene bulumaka' nolihe dongi ize nolihe sipisipi nolihe nene velesi ha mino eita neivo ningikevo ma nene a'minesi masi meni hizelive.
- Gumine ve ma numungu' ve'vizo nodizivo ningi bili hililizani' nene holuka' moningu' ve lisa bilive nene lihime've nomive. Ido' ho' nodizivo numuno ve'vizo nodizivo bililizani' nene biline' lihime've neive./
- 5 Ido' ve mali'mo ize've ei' gesi mi'veu' nehe vaini mi'veu' nehe kuluhize-ngedavo a'minguti' heta vi ve mali'mi mingu' vi di goloso i-dikevo ma nene di goloso i-dani' initeto' nene a'mine gidini ei' mi'veu' inite' lamine' dolizo do vo meni molo-delive./
- 6 Ido' ve mali'mo ei' misubou' olo' gizine' nene lo do vo gesi've avuto' ogo ve mali'mi mingu' viti nodizine' nehe huki di go'no izi milikani' nehe lovo lovotevo' ogavo ma nene olo' gizive ne'mo nene lovo lovotevo' ine' inite' patato' nene golo hizo meni molalive./
- 7 Ido' ve mali'mo ve mamu' mene gizebo o-nedeline lo moni henehi ne'mine ma emavo numu'veu' molo-mikelingu'

- 30 huli' igi bili hili melehine nesi bili hililizave./ Ido' aza
zasilite bulumaka' meleho eze oko'no do u' izo meni hizelive
lilizani' nene meni lisihe' ogo di lisihe' iga' avete
- 31 lilizado' hizelive./ Ido' a'mine ne'mine bulumakali'mo
umungive he alungo he ma belavo ma nene mo hamo' nite'
- 32 ilizave./ Ido' a'mine bulumaka' ne'mine'mo goboni alu he
gipe he belavo ma nene bulumakali'mi meleho ne'mo goboni
gipe he alungo he gizebo ve've nene *siluva' moni teoti nene
meni hize-davo bulumaka' nene geheni huli' huli' igi bili
hililizave./
- 33 Ido' ve mali'mo galese nabalo' hitani' inite' do hulavo
nehe asi've galese iline' nene do hitamivo nehe a'mine
galeseu' nene dongi ize he bulumaka' ize he ma lemo
- 34 helavo ma/ galeselo' inite' do hitamive ne'mo ize melehine
nene meni hize-do hiline' ize nene ei' galeselo' inite' do
hitamive ne'mo dalive./
- 35 Ve mali'mi bulumaka' ne'mo ve mali'mi bulumaka' nene
bele helavo ma nene velesi minine' bulumaka' nene salim igi
meni di moni nene ize' mili dalisive. Ido' hiline'
- 36 bulumaka' nene huki ize' mili dalisive./ Ne neiha gozopo'
a'mine bulumaka' nene mo lovo daa' ivo meleho ne'mo ize
monovo've ha gilinekisi nala' emamine' neivo ma aza hiline'
bulumakato' medelo melehine velesi bulumaka' gohi ma izo
emeleseive. Ne'mine ogo hiline' bulumaka' nene do eita
ilive./

- 22 Lovo hizangu' nene evene' mali'mo vene' ma izipahala
minine' ma belavo izipe do huliha vene' goloso amo ha
minavo ma nene a'mine vene' bilive ne'mo vanahine meni
hize-deleseive. Ee, vanaho inite' ne'mine nemelive lavo goni'
gilave nete nene lisihe' o neive likevo ma nene a'mine
23 lido' nene ha emeleseive./ Ne neiha a'mine biline' vene' nesi
goloso ogavo ma nene ne'mine ilizave: Vene' aza helavo ma
24 nene bilive nene bili hililizave./ Ido' vene' ne'mi vele gulo
nene belo do goloso ogavo ma bilive'mi vele nene di goloso
i-dilizave. Vele bele ledavo ma ezesi vele bili ledi
hulilizave. Ido' anala neivo ma eze analasi ti' i-dilo. Ido'
25 gizene bele ledavo ma eze gizenesi ti' i-dilizave.^a / Oko'no
do goloso o-dine' ma'mine i-di eze ti' i-dilizave./
26 Ve mali'mo gelekele' alu've nehe gipe've nehe ne'mi
veleu' belavo vele likavo ma vele bele likido' nene
27 kuluhize-davo haza vilive./ Ido' ve mali'mo gelekele' alu've
nehe gipe've nehe ne'mi vele nene belo ledavo ma vele belo
ledido' nene kuluhize-davo haza vilive./

Mose' Imine' Molo

Izemu' Gamazi Do Lisihe' Oga' lou' Gamazi Lo-ngimine'

- 28 Bulumaka' ize mali'mo komu'vedunu' venepe vemohope
ma bele helavo ma nene geheni huli huli igi a'mine
bulumaka' ize nene bili hililizave. Bili hililisaha a'minguti'
mo keke' namilizave. Ido' bulumaka' melehine nene lihime
29 imamavo ha minelive./ Ne neiha a'mine bulumaka' ne'mo
evene' ngebelaa' neine' neivo melehine hungo' mili gala
dado' gelamo a'mine bulumaka've gizebo lamine' amivo
evene' ma ngebele helavo ma nene ize nene geheni huli'

^a 21:24 Lou' 24:19-20; Goh 19:21; Mat 5:38

- bele helavo ma nene evene' bilive aza nene ebe' ma do
kegese-lengedeloda golise vo bilamavo ha vo minelive.^a /
- 14 Ne neiha a'mine ve ne'mo gala gelo belelove lo ve ma mo
bele helelesa vo bele hiline' neivo ma nene aza golise vo
neni' alatala do minelidotikisi gelelehe' igi di vi bili
hililizave./
- 15 Evene' mali'mo izelehine he melehine he ma belevine'
nene eze mo bili hililizave./
- 16 Evene' mali'mo evene' ma nene nala' emo gumine
ne'mine ele'mizo do vavo ma nene a'mine gumine ive mo
bili hililizave. Ee, a'mine evene' gumine do vivelo' meni
hizikevo evene' ma ngemelihe ido' ha eita do neivo he
ningilizani' nene gumine ve nene bili hililizave.^b /
- 17 Evene' mali'mo izelehine he melehine he gamazi goloso
lo-deline' a'mine evene' nene bili hililizave.^c /
- 18 Lovo hizasingu' evene' mali'mo evene' ma nene anadunu'
nehe gehenidunu' nehe ma belavo helamo ha gizeho'
- 19 numuno ogo mino/ alinge' oto heta hatusolo' mono mineline'
neivo ma bilive nene goni' i-di lihime imamilizave. Lihime
imamavo aza a'mine bilive'mo gono damo ha ongo minine'
gamenelo' nene moni emo ido' gizebo o-de'mo novivo
oko'nolo' goloso ine' nene lamine' ilive./
- 20 Ve mali'mo gelekele' alu've nehe gipe've nehe
gavosodunu' belavo a'mido' hele osu' lavo ma nene mo
- 21 lihime imilizave./ Ido' belavo a'mine gelekele' izipe nene
gamene sitape hamope ha mino alinge' helevine' nene
melehine lihime imamilizave. Gelekele' izipe nene ei' inite'
ve./

^a 21:13 Nab 35:10-34; Goh 19:1-13; Zos 20:1-9

^b 21:16 Goh 24:7

^c 21:17 Lou' 20:9; Mat 15:4; Mak 7:10

hize ngolo' lo-davo kuluhize vamaato' minevo' minevo'
gelekele' izipe lolo' ilive.^a /

- 7 Ve mali'mo gelekele' alu ve lo meni do aluvo nene ve ma
imine' neivo kilisimasi naba seveni ogavo ma vemoho'
kuluhizi-ngidikevo vaa' nani' ne'mino a'mine alu kuluhizi-
8 dikevo vamoloseive./ Ido' a'mine alu meni hizive ne'mo
dokuvo ele'naho minelive lo dosa a'mine alumu' umo
helamiline' nene aza gele ngemavo a'mine alu ne'mi zuho
netevo' nene meni hizi di tine' mili dalizave. Gana' meni
hizive ne'mo a'mine alu monovo lisihe' o-damine' nenako
nemu' aza a'mine alu nene ato' alevete dalizave lo salim o-
9 ngedelido' lisihe' amize. Mo salim o-ngedamoloseive./ Ido'
gelekele' alu nene gizebo o-dive ne'mo nene gipele'mi vene'
lolo' ilive lo giline' neivo ma nene aluvo gidini ne'mino do
10 lamine' o-do minelive./ Ido' ve mali'mo gelekele' alu meni
hizine' nene dokosa vene' gohi ma daline' nene gomu' dani'
alu noso' nitekisi oko'nolo' initekisi emaa' ine' do ngomo
amo gomu' emaa' ine' votigilelokovo' emaa' oloseive. Ido'
gomu' a'mine alusi onгаа' asine' nene hulamo ezesi ha
11 onгаа' ilisido' o neive./ Ido' a'mine inite' sitohamo nene
ezela do-damiline' nene kuluhize-davo a'mine gelekele' alu
ne'mo menisi hizamo hulo-do voloseive./

Mose' Imine' Molo

Evene' nGibilaa' avemu' Lou' Gamazi Lo-ngimine'

- 12 Ve mali'mo evene' ma bele helavo ma a'mine ve nene
13 bili hililizave.^b / Ido' bele hiline' nene bele helelove lo
gelamido' akisideni ne'mine O'moso'mo aka've tile-damivo

^a 21:2-6 Lou' 25:39-46

^b 21:12 Lou' 24:17

Laka'ni 21**O'moso'mo**

**Lou' Gamazi Lo Huko-ngiduvoni' Mene Lo-ngemeline Lavo
Mose' Api' Ogo Goboni Vemu' Lou' Gamazi Lo-ngimine' Gamazi**

(Goh 15:12-18)

- 1 Ido' Guvelesi ve Mose'ni ti' lo lo-imine': Gaza Isilaele'
aleve gili dalizave lo lou' gamazi ma lo-ngemeline' nene
ne'mine lo lo-ngemelesane:/
- 2 Lingine gelekele' vete minelive li Hebilaio ve ma meni
hizi dikevo ma a'mine ve nene kilisimasi sigisi nene
gonotine do-lengedo neivo kilisimasi seveni ogavo ma
a'mido' nene kuluhizi-di imiselilizave. Ido' ei' oko'no do
tibizo meni hizo moni lemelve lami haza kuluhizi-di
imiselilizave./
- 3 Ido' a'mine ve gana' gelekele' vetine lolo' ine' gamenelo'
nene ha gohuno ve mino ogo minine' neivo ma nene
kuluhizi-dikevo viline' nene lengitati' nesi vene' damo
gohuno ve ha mino asi'vevo' vilive. Ne neiha gana' gelekele'
vetine lolo' ine' gamenelo' nene elenahosi asine' neivo ma
nene kuluhizi-dikevo ma mo elenahosi maka' vilisive. /
- 4 Ido' gizebo ve eze doti' ive ne'mo ei' gelekele' alu
zuhouti' elenaho ve lo ma do emavo izipahala gedavo ma
kuluhizi-dilizani' gamenelo' nene vene' izipahala nene eze
gizebo ivela minikevo vemoho' nene asivo' kuluhizo vilive./
- 5 Ido' a'mine gelekele' ve aza gizebo ve'nemukisi vene'
izipaha'nemukisi mulumo naba gelo kuluhizo volosa
- 6 gelamuve lavo ma nene/ gizebo ve've ne'mo nene ele'mizo
do vo O'moso'mi numu'vela vo gatenila nehe akahela nehe
ote neivo a'mido' gala me'mele nene nili naba ne'minedunu'

- 20 lo-lemanivo gelaa' olone.^a / Likevo Mose' aza evene' ti' lo
 lo-ngimine': Lingine golise gilamilo. Lingine lengemengu'
 molo ningelove lo ido' eikumu' nene lengehelele izivo
 minilizani' ne'mo lihime gohi damaa' ilizangisi ve lo nene
 21 nave./ Ne'mine lavo evene' nene hotokovo' oti nizavo Mose'
 ne'movo' nene liti'muso izo minine' limuso O'moso neingu'
 avito' vine'./

**O'moso'mo Mose'ni Alata Lili' Igi
 A'mido' Ofa Gizi Imilizani' Monovomu' Lo-imine' Gamazi**

- 22 Guvelesi ve'mo Mose'ni ti' lo lo-imine': Isilaele' aleve ti'
 lo lo-ngemezo: Gamazi Okulumokuti' lo-lingimuvoni' nene
 23 mo ningi gilikeve./ Lingine ngolidunu' nehe siluvadunu'
 nehe o'moso inite' lili' igi nenikisi gubi' izi limamilo./
 24 Nenikumu' inite' gizi nimaa' alata lili' ili ma nene
 misubodunu' lili' i-nidilo. Ido' lili' igi a'mido' nene oloku'
 gizi osu' li nimaa' ofasi ido' O'mososi do hamo' oga' ofasi
 nene sipisipi ize nehe meme' nehe bulumaka' nehe nene
 oloku' gizi nimilo. Nelo' gubi' izi nimi gulive'ne di hozi laa'
 ebe' ve lo lo-lengemeloda lo-lengemeloda nene ogo
 25 no'noho' ize-lengedelesuve./ Inite' gizi nimaa' alata lili' ili
 ma huki di lisihe' amani' haza gehenidunukovo' nene lili' ilo.
 Ido' gono daa' initetunu' nene geheni huki di lisihe' izilizani'
 ne'mo nene nenito' kekeize lo minelido' lisihe'
 26 minamoloseive.^b / Inite' gizi nimaa' alatala nene dizaa' ve lo
 liso dizaa' inite' nene lili' amilo. A'mido' lise lise dizilizado'
 nene evene' gala'muda mini ise'ine ningikelizaze./

^a 20:18-19 Heb 12:18-19

^b 20:25 Goh 27:5-7; Zos 8:31

neu' nene mine gelo minine' ve. Nemu' nene Guvelesi ve aza gamene seveni neve nene no'noho' izo eita kekeize lo neive lo lo huko line'.^a /

12 Lingine izetingine metinginemu' gilikevo dizavo gelekele' i-ngidi minilo. Ido' ne'mine ilizani' nene ve'inesi ha mini Guvelesi ve'mo lengemelesa neine' misubou' nene gamene ha'na ingi monilizangisi ne'mine ilizave.^b /

13 Lingine evene' ngibili hilamilo.^c /

14 Vene' vemoho' lili' ikesive lingine evene' atokisi ingi monovo goloso amilizo.^d /

15 Lingine gumine amilo.^e /

16 Lingine gonito' evene' mamu' soza sakupo gamazi lamilo.^f /

17 Lingine evene' mali'mi numu'velo' mumuzo' amilizave. Ee, elenahido' nehe gelekele' alu'velo' nehe gelekele' gipe'velo' nehe dongi ize'velo' nehe bulumaka'velo' nehe ei' inite' mata'velokisi mumuzo' amilizave.^g /

**Isilaele' Aleve Sinae Gololo' Soto' Ine' Inite' Ningi
O'mosomu' Golise Gilani' Gamazi**

(Goh 5:22-33)

18 Evene' muki' nene go' lete lete lo go' pa'na pa'na ogo pikuli' izo gololo' olo' sokile ogo minine' nene ningi golise
19 gili luvo luvo izi hoto' oti minani'./ Mose'ni ti' li li-imani':
Gamazi O'moso'mo lo-lemeline' nene helalonge. Geikovo'

^a 20:11 Api' 2:1-3; Kul 31:17

^b 20:12 Goh 27:16; Mat 15:4; 19:19; Mak 7:10; 10:19; Luk 18:20; Ebe 6:2, 3

^c 20:13 Api' 9:6; Lou' 24:17; Mat 5:21; 19:18; Mak 10:19; Luk 18:20; Lom 13:9; Zak 2:11

^d 20:14 Lou' 20:10; Mat 5:27; 19:18; Mak 10:19; Luk 18:20; Lom 13:9; Zak 2:11

^e 20:15 Lou' 19:11; Mat 19:18; Mak 10:19; Luk 18:20; Lom 13:9

^f 20:16 Kul 23:1; Mat 19:18; Mak 10:19; Luk 18:20

^g 20:17 Lom 7:7; 13:9

- 6 neesi ve./ Lamukumu' uvelisi ido' gonolo' di oti-ngidilisamu'
hili-ngidilizani' uvelimukisi ido' unuvo lamine' oga' ine'
sokile gizaa' initekumukisi unuvo lamine' iga' ani' inite' ato
- 7 ato' neesi ve./ Ido' O'moso inite' oloku' gizo lehize-delive
naba ne'mo sioti've ha'nalo' hito veleta izeline' inite' gulive
*efod nelokumukisi ido' a'mido' losonolo' mineline'
initekumukisi koneliani geheni lamine' ido' geheni lamine'
- 8 gohi ato ato' neesi ve./ Ido' nenito' kekeize lo mineline'
numuno ma lili' i-nidilo. Ne'mine ikevo naza lengi'
- 9 vovotingu' nene mino molo minelove./ A'mine neni'
numu'ne lili' ilizani' avazaha nene gelebizekuvo a'mido'
gehepeve e'meti gizilizani' o neive./

**O'moso'mo Lo Huko Lo-ngidine' Lou' Gamazi
Gizo nGemeline' Geheni Milalizani' Bokisi
Lili' Ilizani' Monovomu' Mose'ni Lo-imine' Gamazi**

(Kul 37:1-9)

- 10 Akasiza zadunu' bokisi ma lili' ilizave. Ha'na've nene 112
sedimita ve. Ido' li'nibe've ido' dizo vine' nene 67
- 11 sedimita ve./ Luloukisi hetasi nene pipiza'vesi nomine' ngoli
laminetunu' di hitikilizave. A'mida leleho'no nene
- 12 ngolidunu' vodo vodo igi milikilizave./ Ido' ngoli di lala li
nedunu' bokisi gihi di vaa' lini sita've sita've ne'mine lili' igi
gizene sita' ve sita' vela nene izikilizave. Helala sita' izi
- 13 helala sita' izilizave./ Ido' za gohovo ne'mine nene akasiza
zadunu' lili' ilizave. Lili' igisa ngolidunu' nene di hitilizave./
- 14 Ne'mine igi gihi di vaa' ilizani' lini hela hela nizangu' nene
- 15 loloso' ilizave./ Za gohovo nene a'mingu' ha hulikilizave. Di

* Efod nene Zuda veti no'ninguti' gamazi ne neive. Eveneto' medelo mino O'moso imani' inite' lehize-daa' ive nabali'mi oko'nolo' inite' mamu' laa' ani' ve lo gele none'za a'mine efod oko'no nene nado minaa' ine' neve. Nene gele guno amune. Evene' malite a'mine efod nene anasi minamine' sioti ne'mine minine' nehe li gilavo malite siketi li'nibe ne'mine minine' nehe li gilaa' nave.

- 16 gahevesi igi di hulaakisi amilo./ Gehedo' gizo lo huko luvo
gamazi gemeloni' nene a'mine bokisi lulou' nene ingi
ngimikilo./
- 17 Ido' bokisi velelo' nite' nene pipiza'vesi nomine' ngoli
laminetunu' ha'na've 112 sedimita ido' gatapa've 67
- 18 sedimita nelou' lili' ilo./ Ido' a'mine bokisi velelo' nite' lolovo
sitata nene kelubu angelo' ne'mine ngoli nene hamadunu'
- 19 izivi' izivi' igi lili' i ngimikilo. ^a/ Lili' ikevo bokisi velelo'
- 20 inite' nesi hamo' lili' igi minilizave./ Ido' a'mine kelubu
angelo' sita' nene holoke'ne'ine di veleta pateli velelo' niteto'
hiti minilisine' lili' i-ngidi ve'ine huli hamota igi velelo'
- 21 inite' nene vonu' bili minilisine' lili' ilo./ Velelo' nite' nene
bokisi veleta' nene milalo. Ido' lulou' nene lo huko lo
- 22 gizuvo geheni gemeloni' nene milalizave./ A'mida nouvo
nenita oganivo minelosome. Ee, a'mine lo huko lo gizuvo
geheni gemeloni' nene milalizani' bokisi velelo' niteto'
nizasine' kelubu angelolitisi oluso'ningu' mino a'midati' nene
Isilaele' aleve lo-ngedeline' gamazi muki' nene lo-
gemelesuve./

O'moso'mo

**Ei' Velelo' Milika' Milika' Ilizani' Beleti Milalizani' Tevoli
Lili' Ilizani' Monovomu' Mose'ni Lo-imine' Gamazi**

(Kul 37:10-16)

- 23 Tevoli akasiza zadunu' 90 sedimita ha'na ido' 45
- 24 sedimita gatapa' ido' 67 sedimita dizivo ma lili' ilo./ A'mido'
nene pipiza'vesi nomine' ngoli laminetunu' hiti a'mida
- 25 leleho'no nene vodo vodo igi milalo./ Ido' tevoli vodo vodo
igi gesi ngomo ne'mine 7½ sedimita dizivo hizi a'mine

- 26 gesilo' nene ngolidunu' hiti leleho'no nene vodo vodo igi
milalo./ Za gohovo loloso' oga' lini sita' ve sita' ve ma lili' igi
milalo. Gizene minido' minido' konalo' nene milalo./
- 27 A'mine tevoli gihi di viliza za gohovo loloso' oga' lini nene
28 gesi ngomolo' nene bizi minilisave./ Za gohovo nene akasiza
zadunu' lili' igi ngolidunu' di hitilo. A'mine za
29 gohovodunu' nene tevoli gihi di vaa' ilizave./ Ido' lapesesi
peletisi ido' vaini noso lepi O'mosola emaaumu' kapusi
gomisesi nene lili' ilo. A'mine inite' pata' nene pipiza'vesi
30 nomine' ngoli laminetunu' lili' ilo./ Ido' gamene gamene
beleti neni' ve'nelo' minelive li a'mine tevolilo' nene ve'nelo'
minaa' beleti nimilizani' nene milika' milika' ilo.^a /

O'moso'mo

Lamu Milaa' Inite' Lili' Ilizani' Monovomu'

Mose'ni Lo-imine' Gamazi

{Kul 37:17-24}

- 31 Ido' lamu milaa' inite' nene pipiza'vesi nomine' ngoli
laminetunu' lili' ilo. A'mine ngoli nene hamadunu' izivi' izivi'
igi lamu milaa' niteli'mi zavasi a'navasi nene lili' ilo. Ido'
lamu milaa' inite' guvovo nite' ne'mine lili' ilizani'
32 nene mo a'mine hamo' ngolidunu' lili' ilo./ Za a'nava sigisi'a
33 minilizave hela sitohamo hela sitohamo./ A'mine za a'nava
sigisi hamo hamoto' nene gonolise inite' amodi za guvovo
ne'mine gili vani' sitohamo sitohamo nene minilizave./
34 Lamu milaa' inite' zavalo' nene amodi za guvovo nite'
gili vani' gonolise nite' sita' ve sita' ve ma lili' ikevo
35 minelive./ Ee, a'mine lamu milaa' inite' zava hela hela
a'nava minasido' minasido' ne'mi gala'muda nene guvovo

^a 25:30 Lou' 24:5-8

- 36 gosoholi'mi avile've ne'mine lili' ilisave./ Lamu milaa'
initeli'mi zavasi a'nava nesi guvovo nite'vesi nene hamo'
nite' minelive. Pipiza'vesi nomine' ngoli lamine' di
- 37 hamadunu' izivi' izivi' igi lili' ilizave./ Lamu milaa' initeto'
milalizangumu' nene lamu seveni lili' ilo. Ido' lamu a'mido'
milalizani' nene a'mine lamu milaa' initeli'mi velela labana'
- 38 elo minelido' nene milalizave./ Ido' lamu viki've di lamine'
igi milalizangumu' loto've ido' lapese've nesi pipiza'vesi
- 39 nomine' ngoli laminetunu' nene lili' ilizave./ Lamu milaa'
initekisi ma inite' nesi lili' ili ma ngoli lamine' geni've 30
- 40 kilo ne'minedunu' lili' ilo./ Inite' mata' ne'mino minelive lo
golola avazaha've gelebizuvodo' lisihe' igivo' lili' ilizado' o
neize. Gizebo lamine' igi lili' ilo.^a /

Laka'ni 26

O'moso'mo

Seli Mono' Numuno Lili' Ilizani' Monovomu'

Mose'ni Lo-imine' Gamazi

(Kul 36:8-38)

- 1 Ido' Guvelesi ve'mo imine' molo ti' lo Mose'ni lo-imine':
Seli mono' numu'ne lili' ilisa ne'mi lave minelive li lavolavo
ha'na teni'a ma lavolavo laminetunu' lili' igi di bizi
badilizave. Ido' a'mine lavolavolo' nene gonolise've
minelingumu' gumi kala ne'mine nalakisi gulehedise kala
ne'mine nalakisi gulehe' nalakisi diisa nedunu' nene kelubu
angeloliti pikisa'ine lili' igi ongotika' ongotika' ilizave.
- 2 A'mine gono do guno oga' iveli'mo dalive./ Ido' a'mine
badilizani' lavolavo hamo hamoliti ha'na'ine nene mo

^a 25:40 Apo 7:44; Heb 8:5

- hoto'ile 12.6 mita neivo li'nibe'ine nene avito'ile 1.8 mita mineleseive. A'mine lavolavo muki' nete hamoli'mine
- 3 saísilo' minilisave./ A'mine lavolavouti' faif nene di hamo' mili ongoti lumo faif minani' nesi di hamo' mili
- 4 ongotilizave./ Ne'mine igi a'mine lavolavo naba sitalitisi lumola minine' lavolavo'mi gahevelo' nene gumi kala ne'mine nalatunu' vele ngomo ngomou' ongotilizave./
- 5 A'mine seli numuno'mi lave mineline' lavolavo hamo' hamoto' nene vele ngomo fifti fifti ongotilizave. Ido' a'mine lavolavo naba sita' di lobe' ilizani' nene a'mine vele ngomo muki' mini'mi limani' nete hamo' makilo' go'ine hizi minika'
- 6 minika' ilisave./ Ne'mine igi lavolavo naba sita' nene di hamo' ikevo seli mono' numu'ne nene hamo' lolo' ogo minelingisi do ogo do hamo' o-daa' nite' ngolidunu' fifti'a ma lili' ilo./
- 7 Ido' a'mine numu'nelo' hitaa' seli naba lili' ilizangumu' nene lavolavo leveni'a memeli'mi zopovodunu' ma lili' ilo./
- 8 A'mine lavolavo hamo hamoliti ha'na'ine nene mo hoto'ile 13.5 mita neivo li'nibe'ine nene avito'ile 1.8 mita mineleseive. A'mine lavolavo muki' nete hamoli'mine
- 9 saísilo' minilisave./ A'mine lavolavouti' faif nene di hamo' mili ongoti ido' lavolavo sigisi lumo minilizani' nene di hamo' mili ongotilo. A'mine lavolavo sigisiuti' gahevela mineline' lavolavo naba sigisi nene gangi huli numuno
- 10 velela ikilo./ Ido' di hamo' mili ongotani' lavolavo sitakuti' nene lavolavo heta hamo' hamoto' nene lolovola lolovola nene nalatunu' vele ngomo ngomou' ongotilizave. Lavolavo
- 11 hamo' hamoto' nene vele ngomo fifti fifti ongotilizave./ Ti' igi di hamo' iga' inite' fifti ma bolonisidunu' lili' igi vele ngomo ngomou' loloso' igi seli numuno nene di hamo' ikevo a'mine numuno nuubi' nene hamo' lolo' ogo mineleseive./
- 12 Ido' lavolavo sigisi neuti' hamo' ne'mi linge lumo minine'

- 13 nene numuno mehenela hito leme minelive./ Ido' numuno
hela hela a'mine lavolavo 45 sedimita 45 sedimita lumo
- 14 minasine' nene limi numuno nene di hiti-dilisive./ Ido'
a'mine numudo' hiti minilisine' seli gohi sita' ma lili' ilizave.
Hamo' nene sipisipi vemoho' mukiliti losuvo a'mido' pen
noso gulehe' hilani' nedunu' nene lili' ilizave. Ido' a'mido'
gohi hitilizani' seli nene guvo nosou' bulumaka' mukiliti
losuvodunu' lili' ilizave./
- 15 Ido' a'mine seli numu'ne do otaali'mi amuzo've di
- 16 otilizani' nene akasiza zadunu' lili' ilizave./ Za posi've hamo'
hamo' nene ha'na've 4.5 mita neivo a'mine za posi sita' sita'
di hamo' igi numuno amuzo've lili' ilizani' lohoto' za hamo'
- 17 hamo' nene ha'na've nene 67 sedimita mineleseive./ Ido'
a'muzo inite've hamo' hamo' nene gizene ngomo sita' sitakisi
lili' ilizave. Seli numuno amuzo've muki' nene
- 18 ne'mine monovolo' lili' ilizave ./ Ido' seli numuno amuzo've
lili' niigi ma numungu' mino ho' dizaa' ida noningunivo ade
- 19 hulaa' unida mineline' lavemu' nene tuvedi lili' ilo./ Ido'
a'mine amuzo niteliti gize'ine a'mingu' loloso' igi di otilizani'
inite' foti nene siluvadunu' lili' ilo. Amuzo nite' nene hamo
hamoli'mi gala'munguko loloso' igi di otaa' nite' sita' sita'
minikesivo amuzo nite' gize'ine a'mingu' loloso' igi
- 20 di otilizave./ Ido' seli numuno lave gohi ma adavala
- 21 minelingumu' nene amuzo've tuvedi lili' ilo./ Ido' a'mine
initeliti gize'ine a'mingu' loloso' igi di otilizani' inite' foti
nene siluvadunu' lili' ikevo amuzo nite've hamo hamoli'mi
gala'munguko loloso' igi di otaa' nite' sita' sita' minelive./
- 22 Ido' hela ho' lemaa' ine' gahevelamu' nene numuno lave
- 23 amuzo've sigisi nene lili' ilo./ Ido' seli numuno mehenela
- 24 konalo' konalo' nemu' lave amuzo nite've sita' lili' ilo./ Ido'
a'mine kona konalo' minilisine' amuzo've nene

- gala'munguko home lave lingesi di lobe' ikilo. Ti' iki veleta hoze lini ma minida di hamo' ikilo. Kona sitata hamoli'mine
- 25 inite' ilisave./ Ne'mine ogo lave amuzo've eiti'a mino gize'ine loloso' igi di otaa' inite' nene 16 mineleseive. Lave amuzo've hamo hamoto' sita' sita' minilisave./
- 26 Numuno lavela ledoo vaa' za akasiza zadunu' lili' ilo.
- 27 Lave helalamu' faif ma lili' ilo./ Ido' helalamu' nene faif lili' ilo. Ido' ho' lemaa' ida numuno mehenela mineline' lavemu' faif ma lili' ilo./ Ido' ledoo viline' za numuno amuzo've oluso' mineline' nene oluso' gehepeve neivo lave a'midoti' dizeline' ido' lemo viline' mo hamoli'mine mineleseive. A'mine ledoo viline' za nene lave lumoo helalati' vo lumoo helala nene vo
- 29 osu' loloseive./ Lave amuzo've nene ngolidunu' mili hiti-ngidi a'mido' ledi vilizani' zava di ngii li minaakumu' nene di ngii laa' lini ngolidunu' lili' igi milalo. Ido' a'mine ledi vilizani' lohoto' zava nesi ngolidunu' mili hiti-ngidilo./
- 30 Ne'mine ogo golola lo-gimuvoni' ma'minosa numuno nene gizo do otelesane./
- 31 Ido' seli numungu' izo hukiline' lavolavo ha'na nene lavolavo laminetunu' lili' igi a'mine lavolavolo' nene gumi kala ne'mine nalakisi gulehedise kala ne'mine nalakisi gulehe' nalakisi di nedunu' nene kelubu angeloliti pikisa'ine lili' igi ongotika' ongotika' ilizave. A'mine gono do guno
- 32 oga' iveli'mo dalive./ A'mine lavolavo nene akasiza zadunu' lili' igi ngolidunu' mili hitani' za posi fo'a siluvadunu' lili' ani' loloso' igi di otaa' niteku' oti minado' huku ngolidunu'
- 33 lili' ado' nene badikilo./ Ido' a'mine lavolavo nene veleta seli naba sita' di hamo' ani' inite' minani' gala'mudo' nene izi huki badilizave. Ti' ikevo lavolavo ne'mo lumoo sita' ado' kekeize lo neine' lumusi ido' ivile' ivo kekeize gehepeve lo neine' lumusi do ize' molo-ngede mineleseive. Ne'mino

- neivo gamazi lo huko lo gizuvo geheni gemeloni' nene
 milalizani' bokisi ma nene lavolavo minido' ezauko kekeize
 34 gehepeve lo neine' lumuu' nene milalo.^a / Ido' a'mine lo huko
 lo gizuvo geheni gemeloni' nene milalizani' bokisi ne'mo
 kekeize gehepeve lo neine' lumuuko neivo bokisi
 35 velelo' nene di hitilo./ Izo huko neine' lavolavo heta nene
 tevoli ma nene milalo. Ido' tevoli mineline' galala lamu
 milaa' inite' ma nene milalo. Ho' lemaa' ida ningi nizavo
 lamu milaa' inite' nene adavala neivo tevoli nene adine
 hulaa' ada mineleseive./
- 36 Ido' a'mine seli numuno'mi gatedo' hito minelingumu'
 nene lavolavo lamine' lili' ilo. A'mine lavolavolo' nene gumi
 kala nalatunukisi gulehedise nalatunukisi guluhe'
 37 nalatunukisi luhuvo lamine' ongotikevo minelive./ Ido'
 a'mine lavolavo asi gizilizangumu' nene za posi've faif nene
 akasiza zadunu' lili' igi ngolidunu' mili hitilo. Ne'mine igi
 a'mine posilo' mini lavolavo di gili' li minilizani' inite' nene
 ngolidunu' lili' ilo. Ido' posi di otilisa a'mingu' hiziliza nite'
 faif nene bolonidunu' lili' ilo./

Laka'ni 27

O'moso'mo

Inite' Gizi Imaa' Alata Lili' Ilizani' Monovomu'

Mose'ni Lo-imine' Gamazi

(Kul 38:1-7)

- 1 Inite' gizi nimaa' alata nene akasiza zadunu' lili' ilo.
 Li'nibe've ido' ha'na've nene lisihe' ivosavo' ve, mo 2.25

^a 26:33 Heb 6:19; 9:3-5

- 2 mitavo', ido' 1.35 mita nene dizo vivo ve./ Ido' veleta kona
konala nene bulumakaliti komu ne'mine fo'a lili' igi gi'mizi
ngimikilo. Alata neesi hamo' minilizaze. Ido' a'mine alata
3 vaito' nene bolonisdunu' mili hitilo./ Ido' a'mine alatamu'
gono inite've muki' ado' lani molaa' baketi'vesi ido'
savoli'vesi vanise do hulaa' lapese'vesi izeu' hizilizani' foku
naba'vesi ido' olo' di milaa' lapese've neesi nene
4 bolonisdunu' ma lili' ilo./ Ido' a'mine alatamu' nene olo' do
mino lili holomo ngolo' ngolo' lo neine' ma bolonisdunu'
lili' ilo. Ido' a'mine olo' do mino lili holomola kona sita've
sita'vela nene gehe do vaa' lini ma bolonisdunu' ma lili' igi
5 milika' milika' ilo./ Ti' igi a'mine ngolo' ngolo' lo neine'
holomo nene di alata do vodo vodo o neine' leleho'no
gala'munguko alata dizo vida oluso' gehepeve milalo./
6 Ne'mine igi akasiza zadunu' za gohovo ma lili' ilo. Lili' igi
7 bolonisdunu' izi hitilo./ Ido' alata gihi di vili ma nene a'mine
za gohovo hela hela liniu' loloso' igi gihi di vilizani'
8 ve./ A'mine alata nene za palanidunu' bokisi ne'mine lili'
ikevo lulouko haza ngolo' lo mineleseive. Gomu' golola lo-
gimuvoni' ma'minosa lili' ilisave./

O'moso'mo

**Seli Mono' Numuno'mi Gesi Lili' Ilizani' Monovomu'
Mose'ni Lo-imine' Gamazi**

(Kul 38:9-20)

- 9 Seli mono' numu'ne ne'mi omo' di vodo vodo igi gesi
hizilo. Ado' ho' lemaa' ida ningi nizavo adavala mineline'
gesi nene lavolavo lamine' goloso ha'na've 45 mita nedunu'
10 lili' ilo. / A'mine gesi ne'mi za posi've tuvedi mini posi
a'mingu' loloso' igi di otaa' inite' bolonisdunu' lili' ani'
tuvedi nesi minilizave. Ido' za posilo' leleho'nosi lavolavo

- 11 badaakumu' huku've neesi siluvadunu' lili' ilizave./ Ido' a'mine'mine igi ho' lemaa' ida ningi nizavo zamela mineline' gesi nene lavolavo lamine' goloso ha'na've 45 mita nedunu' lili' ikevo ne'mi za posi've tuvedi mini posi a'mingu' loloso' igi di otaa' inite' bolonisdunu' lili' ani' tuvedi nesi
- 12 minilizave./ Ido' omo' gaheve ho' lemaa' ida mineline' gesi nene lavolavo lamine' goloso ha'na've 22.5 mita nedunu' lili' ikevo ne'mi za posi've teni mini posi a'mingu' loloso' igi di otaa' inite' nene bolonisdunu' lili' ani' teni nesi minilizave./
- 13 Ido' ho' dizaa' ida omo' gaheve ne'mo 22.5 mita neivo/
- 14 gesi've hela konaloti' oduviline' nene lavolavo ha'na've 6.75 mita nedunu' lili' ikevo za posi've sitohamo mini posi a'mingu' loloso' igi di otaa' inite' sitohamo nesi minilizave./
- 15 Ido' gesi've hela konaloti' olomiline' nene lavolavo ha'na've 6.75 mita nedunu' lili' ikevo za posi've sitohamo mini posi a'mingu' loloso' igi di otaa' inite' sitohamo minilizave./ Ido' a'mine omo' gaheve oluso' neine' gatenilo' neve nene hito mineline' inite' ha'na've 9 mitasi mineleseive. Ido' a'mine hito mineline' inite' nene lavolavo laminetunu' lili' igi a'mido' gumi kala nalatunukisi gulehedise nalatunukisi gulehe' nalatunukisi gonolise've luhuvo lahava lamine' ongotikevo za posi've fo'a mini posi a'mingu' loloso' igi di otaa' inite' fo'a nesi minilizave./ Seli mono' numuno a'mido' mineline' omo' do vodo vodo o-deline' gesi'mi za posilo' nene leleho'nosi huku nesi siluvadunu' lili' ani' nene mineleseive. Ido' a'mine za posi a'mingu' loloso' igi di otaa' nite' nene bolonosidunu' lili' ani' minilizave./ A'mine omo' nene ha'na've 45 mita mineleseive. Ido' li'nibe've 22.5 mita mineleseive. Ido' a'mido' vodo vodo ogo gesi mineline' nene lavolavo laminetunukovo' lili' ikevo dizeline've nene 2.25 mita neivo za posi've muki' nene loloso' igi di otaa' nite' bolonisdunu' lili' angukovo' nene loloso' igi di otilizave./

- 19 Seli mono' numu'neu' gono daa' nite' pata' nene bolonisdunu' lili' ani' initekovo' minilizave. Ee, ido' numunosi gesisi di minaa' nala' iza' ilizani' posi ngomo vai' nesi bolonisdunukovo' lili' ani' minilizave./

O'moso'mo
Lamumu' Ilizani' Monovomu'
Mose'ni Lo-imine' Gamazi

(Lou' 24:1-4)

- 20 Lamu ma gizekanivo api' ogo lilidoti' nene lo do vo minelingisi Isilaele' aleve lo-ngedanivo oliva gihile gesebe' izanguti' nene uveli pipizakisi nomine' laminekovo' nene
- 21 ma di-gidi alizave./ Neni' ogo evene'ne ningaa' oloni' numu'neu' mino a'mine lamu nene lo huko lo gizuvo geheni gemeloni' nene milalizani' bokisi hito mineline' lavolavo heta mineleseive. Neivo Aalonile gipele zuhosi di lamine' igi gizaa' ilisave. Gizikevo a'mine lamu nene Guve'nesi ve neni' ve'nelo' nivengati' lo do vo nedenga' oga' ilive. Ne'mine monovo nene Isilaele' aleve nete di nizavo mine do vo nga'vopilemotasi vo mo osu' lamilive lo lou' molo-lengedekuve./

Laka'ni 28

O'moso'mo
Eveneto' Medeli Mini Ei' Imani' Inite' Lehizi-daa' Aveti
Oko'nido' Inite' Lili' Ilizani' Monovomu'
Mose'ni Lo-imine' Gamazi

(Kul 39:1)

- 1 Isilaele' aleveuti' nene gei' uvaho Aalonikisi ei' gipele zuhosi neni' gono di-nidi eveneto' medeli mini nimani' inite' lehizi-nidaa' ilizave minilizave lo lo-ngemanivo ngele'mizi

- geita alizave. Ado' Aaloni'nimukisi ido' gipele Nadabu' Abihu' Eleazale' ido' Itamali' engikumukisi nene noluve./
- 2 Uvaho Aaloni' izavo gonolise've laminekisi mino evene' naba geelive li oko'nolo' inite' kekeize lo mineline' ma lili'
- 3 i-dilo./ Ee, Aaloni' aza nenito' gono doo eveneto' medelo mino nimani' inite' lehize-nedaa' gonolo' ele'mize molaloningumu' ve lo gaza lo-ngedanivo naza amuzo ngemekuvo inite' di guni iga' ave nene Aaloni' oko'nolo'
- 4 inite' lili' i-dilizaze. Lo-ngedezo./ Oko'nolo' izeli inite' nene ne'mine lili' ilizave: Losonolo' inite' ngomo masi veleta nite' ngomo *efod nesi delesi gele vine' initekisi ido' lulouko izeline' sioti ha'na lupize tapize' o mineline' neesi ido' godololo' liko liko angili' ne'mine gehaa' iline' lavolavo neesi ido' gopololo' liko leti ne'mine izeline' lavolavosi lili' i-dilo. Ee, ido' ne'mine igi Aalonikisi ei' gipele zuhosi nenito' gono di eveneto' medeli mini inite' nimani' lehizi-nidilisamu' izilizani' oko'nido' nite' kekeize li minilizani'
- 5 nene lili' i-ngidilizangumu' nene/ ingine ngoli di ido' gumi kala nalakisi gulehedise nalakisi gulehe' nalakisi ido' lavolavo laminekisi diisa nedunu' lili' ilizave./

O'moso'mo

**Veleta Izaa' Inite' Efod Lili' Ilizani' Monovomu'
Mose'ni Lo-imine' Gamazi**

(Kul. 39:2-7)

- 6 Veleta iza' inite' ngomo efod nene ngolidunukisi ido' gumi kala nalakisi gulehedise nalakisi gulehe' nalakisi ido' lavolavo laminetunu' lili' ilizave. A'mine gono do guno oga'

* Efod ne'mi monovo lo ngolo' lo gizune' gamazi nene laka'ni 25 goholo 7 neine' avilelo' neido' ningo gato gelelesane.

- 7 iveli'mo dalive./ Ido' a'mine efod gatana hela helala kiso ize
gili' loka' iline' inite' sitakisi lili' i-dilizave. A'mine inite'
nene efod ne'mi mehenelasi ido' velelasi izi gili' lilisine' ve./
- 8 Ido' efod gopololo' do mineline' inite' nene efodisi di hamo'
igi efod lili' ani' inite' ado' ngoli ido' gumi kala nalakisi
gulehedise nalakisi gulehe' nalakisi ido' lavolavo
lamedunukisi efod lili' ani' ma'minosavo' di guni igi lili'
- 9 ilizave./ Ne'mine igi koneliani geheni lamine' sita' ma di
a'mido' nene Isilaele' aleveti me'ningine Zakobo' gipeleliti
- 10 gulive'ine ma nene gite gite' igi gizilo./ Gehedo' hamo
hamoto' nene gulive sigisi mineka' mineka' ilive. Ido'
gulive'ine gizili ma gana' soto' ive'mi gulive nene gana' gizi
ezeloti' soto' ive'mi gulive a'midoti' gizi ne'mine ika' ika' igi
- 11 alinge' soto' ive'mi gulive alinge' gizii gizi osu' lilizave./ Ee,
geheni ngomolo' luhuvo ngomo ngomo do guno ogo gizaa'
iveli'mo a'mine geheni sitato' nene Zakobo' gipele vailiti
gulive'ine gize-lengedavo a'mine geheni di gili' li minilisine'
- 12 inite' lamine' nene ngolidunu' lili' igi/ a'mine efod kiso izzaa'
iline' initetoto' nene milikilo. Ne'mine ikevo Aaloni' gatanalo'
gehe do ogo Guve'nesi ve'mi ve'nelo' viline' nene ne'mo
- 13 Zakobo' gipele zuhomu' lo gate oloseive./ Geheni do gili'
14 laa' inite' lamine' nene ngolidunu' lili' igi/ ngolidunu' nene
seni nala' ngomo ngomo lili' igi nala' izi a'mine geheni di
gili' laa' initetoto' izilo.

**Aaloni' Losonolo' Izeline' Inite' Lili' Ilizani' Monovomu'
O'moso'mo Mose'ni Lo-imine' Gamazi**

(Kul 39:8-21)

- 15 Neni' O'moso gele nouvoni' inite' do soto' ogo
lengelebizavo ningo gelaakumu' mineline' inite' Aaloni'
losonolo' izeline' nene lili' ilo. Veleta izzaa' inite' efod lili'
ani' ma'minosa nene a'ne'mine gono do guno ogo daa'

- iveli'mo ngolisi gumi kala nalakisi gulehedise nalakisi
 gulehe' nalakisi ido' lavolavo laminekisi nene dosa nedunu'
 16 lolo' ilive./ A'mine lavolavo nene gatapa' lisihe' lamine'
 gangi sita' ikevo lisihe' lamine' sikoea o mino ha'na've 23
 sedimita neivo li'nibe've nesi nene 23 sedimita mineleseive./
 17 A'mine losonolo' initeto' nene gonolise've minilizani' * geheni
 lamine' ato ato' nene lainim ilo. Laini sita've sita've
 milalizave. Gana' lainilo' nene lubi geheni mili a'midoti'
 18 topazi gehenisi emeladi gehenisi milalo./ A'midoti' naba tuu
 lainilo' nene teekoisi gehenisi sahila gehenisi daimon
 19 gehenisi milalo./ Ido' laini naba tililo' nesi nene hiasini
 gehenisi agate gehenisi ametisi gehenisi nene milalo./
 20 A'midoti' lumola lainilo' nene belili gehenisi onikisi gehenisi
 zasipa gehenisi mili di limilo. A'mine geheni nene losonolo'
 initeto' di gili' li di minilizani' inite' nene
 21 ngolidunu' lili' ikevo minilizave./ A'mine gonolise geheni
 Isilaele' gipeleti gulive mine'mo vine' tuvelu nene
 mineleseive. Ee, lengi' zuho mulise tuvelu neti gulive hamo'
 hamo' nene geheni tuvelu nelu' gulive'ine sainim iga'
 gehenilo' giti gizaa' ani' ma'minosa gite gite' igi gizi'mi
 22 vilo./ nGolidunu' lili' ani' teleti di nala' izi losonolo' inite'
 23 neemu' seni nalava ma lili' ilo./ nGolidunu' lini ne'mine inite'
 sita' lili' igi a'mine losonolo' initeto' veleta mineline'
 24 gaheve hela hela konalo' di gi'mizilo./ Di gi'miziki a'mine
 lini sitato' nene ngolidunu' lili' ani' nala' sita' nene izilo./

* Aaloni' losonolo' izeline' initeli'mi gonolise've minilizani' geheni ato atoliti gulive'ine gizine'za a'minguti' gulive
 linge maliti monovo gele lamine' amune . Nani'mine gehenimu' lihe nene gele guno amune. Gelamune'za a'mine
 geheni ato ato' muki' nene silingenge'ne'nesi mini kala'ine laminekisi minani' gehenimukovo' live lo gele none.
 A'mine gehenguti' linge ma gulebe' minikevo linge ma zavile minikevo linge ma gihungo' minikevo linge ma gumi
 kala minikevo linge mokono' minani' nene gele none. Ido' ne'mine gehenimu' lisita gohi ma Mono' Godolo
 Gosohoku' Leveleseni 21:19-20 nela ningelesane. A'mine lisita gizumingu' nene geheni ato atoliti kala'nesi lo soto'
 ogo gizame.

- 25 Iziki a'mine nala' sitalitisi lolovo nene geheni di gili' laa' inite' sitato' nene izilo. Ne'mine ikevo ne'mo a'mine losonolo' inite' nene veleta iza' inite' efod gatanalo' inite' gili' lo mineleseive./
- 26 Ne'mine igi gohi lini sita' nene ngolidunu' lili' igi a'mine losonolo' inite' mi gaheve gala'muda efod nelo' bizo minelida hela hela konalo' nene di gi'mizilo./
- 27 Ne'mine igi gohi lini sita' nene ngolidunu' lili' igi gatanalo' inite' ne'mo lemo vine' gahevela veleta iza' inite' efod leme vo gopololo' nene no'novo minelida nene di gi'mizilo./
- 28 Ne'mine igi gumi kala nala' di losonolo' inite' mi gaheve gala'muda minasine' linilo' iziki veleta iza' inite' efod leme vo gopololo' nene no'novo minelida minasine' linilokisi izilo. Ne'mine ikevo ne'mo a'mine losonolo' inite' nene apasamoloseive./
- 29 Ido' ne'mine ilizadi'mo Aaloni' aza neni' kekeize lo neine' numu'neu' dizeline' gamenelo' gamenelo' nene neni' gele nouvoni' inite' do soto' ogo lengelebizavo ningo gelaakumu' mineline' inite' losonolo' neido' nene Zakobo' gipele vailiti gulive'ine neivo engikumu' gohi gelelosido' mineleseive./
- 30 Ido' a'mine luvoni' inite' muki' igisa alinge' nene neni' O'moso gele nouvoni' inite' do soto' ogo lengelebizavo ningo gelaakumu' inite' sita' umimi ido' tumimi nene a'mine losonolo' initeku' di go'zilo. Ne'mine ikevo Aaloni' aza Guve'nesi ve'mi ve'nela vo mineline' gamenelo' gamenelo' nene Isilaele' aleve longo' i-nidado' lo-ngemeloni' gamazi do soto' ogo geleline' inite' nene do mineleseive.^a /

^a 28:30 Nab 27:21; Goh 33:8; Ezel 2:63; Neh 7:65

O'moso'mo
Eveneto' Medeli Mini Ei' Imani' Inite' Lehizi-daa' Aveti
Okonido' Inite' Linge Lili' Ilizani' Monovomu'
Mose'ni Lo-imine' Gamazi

(Kul. 39:22-31)

- 31 Efod lulouko izeline' inite' ha'na delesi gele vine' nene
 32 gumi kala lavolavodunukovo' ma lili' ilo./ Oluso' nene
 godolomu' ngolo' ma lo minelive. Ido' hikelikelizave li
 a'mine ngolo' nene patenimu' ngolo' lani' ongotaa' ani'
 33 ne'mino ongoti vodo vodo igi di guni ilizave./ A'mine inite'
 gala'muda neine' gahevela nene pomigalaneti za gihile
 ne'mine gumi kala nalatunukisi gulehedise nalatunukisi ido'
 gulehe' nalatunukisi ongoti vodo vodo igi olusoto' olusoto'
 nene ngolidunu' lili' ani' pelo' ngomo ngomo milika' milika'
 34 ilo./ Ne'mine ikevo pomigalaneti gihile gala gala ido' pelo'
 gala gala mini a'mine delesi gele vine' initeli'mi gahevela
 35 mudise vodo vodo igi minilizave./ Mono' gono've dalo ma
 Aaloni' nene a'mine inite' do izosa ne'mine ilive. Kekeize lo
 mineline' numunou' Guve'nesi ve neni' ve'nelo' nodizivo ido'
 a'minguti' nolimivosi pelo' nete ngolele nilavo neti no'ine
 gililizave. Ido' ne'mine noluvoni' nene Aaloni' neni' ve'nelo'
 navo pelo' izo ngolele lamivo ma belekuvo aza helalive lo
 noluve./
- 36 Ido' ngoli lamine' di nedunu' nene guvovo gele vine'
 gonolise nite' ma lili' igi a'mido' nene gulive'ine sainim iga'
 gehenilo' giti gizaa' ani' ma'minosa luhuvo ti' li giti gizilo:
 37 Guvelesi vela kekeize lo neive./Ido' a'mine inite' nene
 Aaloni' madunolo' initeli'mi velela nene gumi kala nalatunu'
 38 nalava izikilo./ Aaloni' golihilelo' nene izeka' ilize. Ne'mine
 ilidi'mo nene Isilaele' alevete inite' ma di kekeize li
 Guve'nesi ve neni' lehizi-nidilizangu' di gopo ikevo ma
 ne'mi lihime nene ei' Aaloni' oko'nolo' dizeleseive. Ee,

- Guve'nesi ve naza engi' ninge lamine' o-ngedovo' minelive lo Aaloni' aza a'mine inite' golihilelo' izo minaakovo' ilive./
- 39 Ido' Aaloni' lulouko izeline' sioti ha'na lupize tapize o mineline' masi ido' godololo' liko liko angili' ne'mine gehaa' iline' lavolavo nesi lavolavo laminetunu' nene lili' i-di ido' gopololo' liko leti ne'mine izeline' lavolavo nene lili' i-di a'mido' nakesedunu' luhuvo lahava lamine' mili-dilo./
- 40 Ido' Aaloni' gipele zuhomu' nene sioti ha'nasi ido' gopo'nido' liki leti ne'mine izilizani' lavolavo neesi lili' i-ngidilo. Ido' angili' ha'na dizilizani' neesi lili' i-ngidilo. Ido' ne'mine inite' lili' i-ngidilizani' nene gonolise'ine laminekisi
- 41 mini evene' naba gidini gililizave li lili' i-ngidilizave./ Ido' a'mine oko'nido' inite' nene uvaho Aaloni' ve gipele zuhosivo' nene do ize-ngedo eveneto' medeli mini nimani' inite' lehizi-nidilizave lili' igi nenito' gono daa' ilizave minilizave loo nenito' do kekeize lo-ngedo uveli lamine' godo'nido' leke-ngedo gono'nido' do kegeso ote-ngedelesane./
- 42 Ido' oko'ine hito minelive li talasisi li'nibe lavolavo lulou' holi gopo'nidoti' obuvo'nido' limivo izika' ilizani' ma lili' i-
- 43 ngidilo./ Aalonikisi gipele zuhosi ingine neni' ogo evene'ne ningaa' oloni' numu'neu' dizilizani' gamenelo' gamenelo' ido' kekeize lo mineline' ebeku' alata neida dizilizani' gamenelo' gamenelo' nene oko'ine soto' ogavo ingine lihime di hilikelizave li a'mine talasisi nene izikisavo' dizilizave. Meneve nene lou' gamazi mino Aalonidokisi ei' a'vopilemo' mukitokisi vo do minevo' minevo' ogo mineleseive./

Laka'ni 29**O'moso'mo****Aaloningine Ei' Gipele Zuhosi Eveneto' Medeli Mini****Ei' Imani' Inite' Lehizi-daa' Gono Dalizado'****Di Oti-ngidilizani' Monovomu'****Mose'ni Lo-imine' Gamazi**

(Lou' 8:1-36)

- 1 Aaloningine gipele zuho nene eveneto' medeli mini neni'
nimani' inite' lehizi-nidaa' ave lili' i-ngidili ma nene di
ne'mine i-ngidilo: Bulumaka' vemoho' olihe lodive olosa
neine' hamokisi ido' sipisipi vemoho' sitakisi oko'nida
- 2 gofoso amine' nene dalo./ Ido' lulu iza' inite' zisiti hulamani'
beletisi ma di ido' zisiti hulamani' beleti uveli laminekisi di
gopo igi lili' anikisi ido' zisiti hulamani' bisiketi a'mido' uveli
lamine' hilani' nesi nene dalo. A'mine inite' muki' nene viti
laminetunu' lili' ani' palauvadunu' lili'
- 3 ilizani' dalo./ A'mine inite' basiketiu' milisa basiketisi
bulumakakisi sipisipi sitakisi nene maka' di igi lehizi-
- 4 nidilo./ Ne'mine ilisa nene Aaloningine gipele zuho nene
neni' ogo evene'ne ningaa' oloni' seli numu'ne gatedo' nene
- 5 ngele'mizi igi nosou' ingi-ngidilo./ Ti' igisa Aaloni'ni
oko'nolo' inite' lili' i-dani' ma nene di ngili-dilo. Ado' sioti
ha'nasi efod lulouko izeline' inite' delesi gele vinekisi a'mine
efod nesi losonolo' initekisi ne di ngili-dilizave. Ne'mine igi
efod do gili' liline' leti gonolise'vesi neine' nene di izi-dilo./
- 6 Ido' godololo' liko liko angili' ne'mine gehaa' iline' lavolavo
ma nene godololo' di gihi-di a'mido' nenito' kekeize lo
minaali'mi maki've lili' i-dani' nene di gi'mizilo./
- 7 Ido' neni' gono'nelo' ngele'mize mili lepi-ngidaa' uveli ma
- 8 nene godolou' gonolo' ele'mizi mili lepi-dilo./ Ne'mine igi
gipele nene ngele'mizi igi sioti ha'na lili' i-ngidani' ma nene

- 9 di ngili-ngidi/ gopo'nido' liki leti ne'mine izilizani'
lavolavosi di ngili-ngidi angili' ha'na ma nene madu'nido' di
gihi-ngidilo. Ele'vole' ogo minevo' minevo' ogo mineline'
lou' gamazi ma lido' igi a'mine zuho nene eveneto' medeli
mini neni' nimani' inite' lehizi-nidaa' ave minika' minika' igi
di vivo' minilizave. Aaloni'nisi gipele zuhosi gonolo' di oti-
ngidilizani' monovo nene nolo-gimuve./
- 10 Bulumaka' ize nene neni' ogo evene'ne ningaa' oloni' seli
numu'ne'mi velela di ikevo Aaloni' ve gipele zuho ingine
11 godololo' a'ine milalizave./ Milikevo a'mida seli mono'
numuno gatedo' Guve'nesi ve'mi ve'nelo' nene a'mine
12 bulumaka' nene belezo./ Belo vanise've linge ma dosa alata
kona konala nene bulumakaliti komu ne'mine dizo hosu' o
mine' mine' ido' nene angadunu' holozo. Ne'mine ogo
13 vanise lumo nene alata monovola nene lepo hulozo./ Ido'
ne'mine ogo ize lulo hala' initeto' gavozo gi'mize mine' mine'
ine' nene do ido' muluno ha'na neidasi ahovolo sitakisi ido'
a'mido' gavozo gi'mize mine' mine' ine' nesi nene do
14 alatalo' oloto' gizo nemezo./ A'mine inite' ne'mino
nemeline'za bulumaka' me'mele oko'no losuvo ido' lulo hala'
nite' nene lingine ingada heta homi di vi olo' gizi di hulilo.
Neve nene lihime'ine do hulo osu' lo-ngedaa' ofa nene gizi
nimilisave./
- 15 Sipisipi ma nene di ikevo Aaloni' ve gipele zuho nesi
16 ingine godololo' a'ine milalizave./ Ti' ikevo belosa vanise've
nene do alata hela hela mukita nene hutile' ogo hulozo./
17 Ne'mine ogo a'mine sipsipi vemoho' nene huko ngomo
ngomo ogo lulo hala'nisi gizene anasi nene do noso' izo
hulosa godolosi oko'no huko ngomo ngomo ogo molanida
18 nene molozo./ Sipisipi oko'no muki' nene sokile've dizo
vilive lo alatalo' nene gizezo. Neve nene olotunu' gizo osu'

laa' ofa mino unuvo've nene Guve'nesi ve naza gelekuvo
lanite' oga' neine' inite' nene nemelesane.^a /

- 19 Sipisipi vemoho' gohi ma di alo. Di ikevo Aaloni' ve
20 gipele zuho nesi ingine godololo' a'ine milalizave./ Ne'mine
ikevo belezo. Belosa vanise've linge ma dosa Aaloningine
gipele zuhoti ga'ine zamelasi ido' a'ine mozovo zamelasi
gize'ine mozovo zamelasi nene holo-ngedezo. Ti' ogo vanise
lumo nene alata hela hela mukita nene hutile' ogo
21 hulozo./ Huloko a'mine alataloti' vanise ma do neni'
gono'nelo' ngele'mize mili lepi-ngidaa' uvelisi do Aaloni'
oko'nolokisi oko'nolo' initetokisi nene hibi' izo hulo-do
gipele zuhoti oko'nidokisi oko'nido' initetokisi nene hibi' izo
hulo-ngedezo. Ne'mine oganivo Aalonikisi gipele zuhosi
oko'nido' inite' neesi nene nenito' kekeize li minilisave./
22 Gono'nido' ngele'mize molaakumu' ize nenako nemu'
nene a'mine vemoho' sipisipi izeli'mi gavozo ado' avasuvo
gavozosi lulo hala' initeto' gavozosi muluno ha'na lamine'
minidasi aho'volo sitakisi a'mido' gavozosi ido' amasumolo
23 zamela nesi di/ ido' zisiti hulamavo lulu izamine' beleti ato
ato' basiketi' mili Guve'nesi ve'mi ve'nelo' milanguti' nene
uvelisi neine' beleti hamokisi uveli nomine' beleti hamokisi
24 ido' bisiketi hamokisi dalo./ A'mine noso' nite' muki' nene
Aaloni' ve gipele zuhoti a'ningu' molanivo Guvelesi ve'mine
lolo' oloseive li a'inedunu' di igi vigi lehizi-nidilizave./
25 Ne'mine ikevo a'ninguti' nene do tine' molo do Guve'nesi ve
oloku' gize nema' initeto' veletu' nene molo ne'mi unuvo
Guvelesi ve'mo gelavo lanite' ilive lo gizezo. Neve nene
olodunu' gizi inite' Guve'nesi ve neni' nimani' ma'minosa
neive./

^a 29:18 Ebe 5:2; Hip 4:18

- 26 Aalonile gono'nido' ngele'mize molaakumu' izeli'mi
 losono nene do ogo Guve'nesi ve neni' ve'nelo' do soto'
 nelebizanivo ne'mo lehize-nedane' gelavo a'mine nene gaza
- 27 ha do nalosane./ A'mine gono'nido' ngele'mize molaakumu'
 izeloti' nene Aaloni'nisi gipele zuhosi ngimiliza inite' nene
 ado' Guve'nesi ve neni' ve'nelo' di soto' nelebizani' losonosi
 ido' lehize-nidani' amasumolo nesi nene engi' ve li di
- 28 kekeize li-ngidilo./ Ne'mine igi do hamo' ogo
 mineloningumu' ve li Isilaele' aleve Guve'nesi ve ofa nimi
 ize di alizani' gamenelo' gamenelo' a'mine izeli'mi losonosi
 amasumolo zamelasi nene Aaloni' zuhoutu' ve engito' medeli
 mini Guve'nesi ve neni' inite' lehizi-nidilizave nene ngimaa'
 ilizave. Neve nene levo levo lo mineline' lou' gamazi
 noluve./
- 29 Aaloni' oko'nolo' inite' kekeize li minani' nene ei' helavo
 a'vopilemo' zuhoutu' eito' medeli gono dika' dika' ilizave
 nene uveli hili-ngidi a'mine gonolo' ngele'mizi mili-
 ngidilizani' gamenelo' gamenelo' nene a'mine inite'
- 30 ngilalizave li di minilisave./ Ido' Aalonido' medelo gipele
 mali'mo gono dalive ne'mo neni' ogo evene'ne ningaa' oloni'
 seli numu'neu' kekeize lo neine' lumuu' gono dalosa dizelo
 ma nene gamene seveni nene a'mine inite' oko'nolo' do
 otuhoko minelive./
- 31 Aaloningine gipele zuho nene gono'nido' ngele'mizi
 milalisa vemoho' sipisipi bilani' ne'mi me'mele nene di
 kekeize li minani' ebeku' nene di dizi somo milalizave./
- 32 Ne'mine igi Aaloni' ve gipele zuho ingine a'mine ize'mi
 me'melesi basiketiu' beleti ha mineline' nesi nene di vi neni'
 ogo evene'ne ningaa' oloni' seli numuno'mi gatenila
- 33 nalizave./ Gono'nido' di kekeize li-ngidi ngele'mizi milani'
 gameneu' lihime apasaakumu' dani' ofa neeti' nene ingine ha

- nalizave. Kekeize lo neine' noso' nite' nenako haza ve
 namavo eveneto' medeli mini nimani' inite' lehizi-nidaa'
 34 avetevo' nalizave./ Gono'nido' ngele'mizi miladoti' ize
 me'mele he ido' beleti he ni osu' lamavo nedenga' ogavo ma
 kekeize lo neine' noso' nite' nenako nene mo nami gizi
 lo'voti hulilizave./
- 35 Lo-giduvodo' ogo Aaloningine gipele zuho nene ne'mine
 o-ngedelesane. Gono'nido' ngele'mizi mili'mi vi nizavo
 gamene seveni nene ogo voloseive. A'mine gamene seveni
 36 ogo novivo ne'mine ilizave./ Gamene gamene lihime
 apasaakumu' nene vemoho' bulumaka' nene belo olo' gize
 nemelesane. Belo olo' gize nonemo nene olo' gizaa' inite'
 alataloti' nene lihime do hulolosane. Ido' ti' ogo a'mine
 37 alatalo' uveli holo nenita do kekeize lolosane./ Gamene
 seveni nene ne'mine ogo a'mine alataloti' nene lihime apaso
 do kekeize lolosane. Ne'mine oganivo a'mine alata nene
 kekeize gehepeve lo neivo evene' nehe inite' mali'mo nehe
 a'mido' ma di gililizani' ne'mo inginesi di kekeize lisa
 minilisave./

O'moso'mo

Isilaele' Aleve Go'laneme Go'laneme Sipisipi Bili

Oloku' Gizi Imilizani' Monovomu'

Mose'ni Lo-imine' Gamazi

(Nab 28:1-8)

- 38 Ido' alatalo' nene ne'mine inite' oloku' gizi nimilizave:
 Gamene gamene nene vemoho' sipisipi sita' kilisimasi
 39 hamo' hulikesine' nene bili olo' gizi nimilo./ Nedenga' go'
 nolivo tu'ati' nene ma bili olo' gizi ma nene nivenga'
 40 liti'muso olihe izelesa neivo bili olo' gizi nimilo./ Ize gana'
 hamo' nene nibili ma palauva' lamine' vanu kilo nene ma di

- ido' oliva gihile gesebe' izadoti' uveli lamine' vanu lita ma di di gopo anikisi nene di mili nimilo. Ido' noso nimaakumu'
- 41 nene vaini noso vanu lita nesi lepilo./ Ido' ize gohi nivenga' bili gizi nimilizani' nene nedenga' ani' ne'minisa palauvakisi uvelisi vaini nososi nimi ne'mi unuvo Guvelesi ve'mo gelavo lanite' ilive li gizilo. Neve nene olodunu' inite'
- 42 Guve'nesi ve neni' nimani' ma'mine lolo' neive./ Ne'mine ofa oloku' gizi nima' suno nene levo levo lo neivo langa'vopilemolitesi ti' igi di nimika' nimika' igi minilizave. Ido' ne'mine ilizani' nene naza ogo neze evene'ne ningo gamazi lo-ngemelo seli numuno'mi gatedo' nene ne'mine
- 43 ilisave./ A'mida nene naza ogo evene'ne zuho Isilaele' aleve ninge-ngedaa' olosuve. Ido' a'mida nouvodoti' neni' labana'ne ne'mo numuno nene do kekeize lo mineleseive./
- 44 Ee, naza ogo evene'ne ningaa' oloni' seli numuno nesi alata nesi do kekeize lo-ngedo Aaloni' ve gipele zuho neve nene eveneto' medeli mini nimani' inite' lehizi-nidaa' ave lili'
- 45 ilizave lo do kekeize lo-ngedelesuve./ Isilaele' aleveti vovo'ningu' mino molo ogo naza nene engi' O'moso'ine lolo'
- 46 ogo minelesuve./ Ido' naza engi' vovo'ningu' mino ogo molo olodoti' nene ingine nenikumu' aza nene Aigita misubouti' lele'mizo ani' Guvetesi ve O'mosote ve li gililisave. Naza nene Isilaele' engi' Guve'nesi ve O'moso'ine nouve./

Laka'ni 30

O'moso'mo

Unuvo Lamine' Oga' Inite' Gizi Imaa' Alata

Lili' Ilizani' Monovomu'

Mose'ni Lo-imine' Gamazi

(KuL. 37:25-28)

- 1 Unuvo lamine' oga' ine' sokile gizaa' alata ma akasiza

- 2 **zadunu' lili' ilo./ Li'nibe've ido' ha'na've nene lisihe' ivosavo'
ve, mo 45 sedimitavo', ido' 90 sedimita nene dizo vivo ve.
Ido' veleta kona kona'vela bulumakaliti komu ne'mine lili'**
- 3 **ilizani' nene a'mine hamo' zadunukovo' lili' ilizave./ A'mine
alata nene hela hela mukitasi veletasi ido' komu'vesi nene
ngolidunu' hiti ngolidunu' leleho'no nene alata di vodo vodo**
- 4 **igi laka'ni milalo./ Ido' hela helamu' nene gihi di viliza za
gohovo loloso' oga' lini sita' ngolidunu' ma lili' igi laka'ni
milani'gala'munguko di gi'mizilo./ A'mine za gohovo nene**
- 5 **akasiza zadunu' lili' igi ngolidunu' mili hitilo./ Ti' igi a'mine
alata nene seli mono' numuno lulou' lo huko lo gizuvo
geheni gemeloni' nene milalizani' bokisi velela lavolavo asi
gizikani' heta nene milikilo. Ee, bokisi velelo' nite' minine'
velela gehepeve milalo. A'mida nene gei' ogo ninge-gedaa'**
- 7 **olosuve./ Nedenga' nedenga' nene Aaloni' lamu do lamine'
olosa alido' nene unuvo lamine' oga' ine' sokile nene**
- 8 **gizeleseive./ Ido' nivenga' liti'muso izelesa neivo lamu enge
vite' olosa alingu' nesi unuvo lamine' oga' ine' sokile nene
a'mine alatalo' gizelive. Guve'nesi ve neni' ve'nelo' unuvo
lamine' oga' ine' sokile gize nema' suno nene levo levo lo**
- 9 **mino osu' lamilive./ A'mido' nene inite' ato' ado' haza unuvo
oga' sokile nehe ize ato ato' nimilizanipe viti nimilizanipe
ido' vaini noso leki-nidilizanipe nevo'mine inite' nene**
- 10 **a'mido' gizi nimamilizave./ Kilisimasiu' kilisimasiu' gamene
hamokovo' nene Aaloni' aza lihime apasaakumu' bilani'
izeli'mi vanise ma dosa dizo a'mine alatalo' komu've hosu' o
mine' mine' ido' nene holo a'mine alata do lisihe' oloseive.
A'mine inite' nene O'moso nenikumu' kekeize gehepeve lo
neine' nenako a'mine do lisihe' oga' monovo nene di'mi di
dizi nizavo mo osu' lamoloseive./**

O'moso'mo
Seli Mono' Numuno'mi Gonolo'
Takisi Moni Hulilizani' Monovomu'
Mose'ni Lo-imine' Gamazi

- 11, 12 Guvelesi ve'mo Mose'ni ti' lo lo-imine':/ Gaza Isilaele' veliti gulive'ine do gateline' gamenelo' nene nogatanivo inite' goloso soto' o-ledalive li vemoho' hamo' hamo' muki' ingine hilami ve'inesi ha minilizani' aka meni hizi inite' ma
- 13 nimika' nimika' ilizave./ Gulive'ine do gatanivo ve hamo' hamo' ingine gatanive muki' nizada vilisa siluva' nene *hapu sekeli hapu sekeli ma hulilizave. Ido' hulilizani' nene Guve'nesi ve neni' nimani' ofa ne'minisa hulilizave. Ido' hapu sekeli ve noluvoni' nene mono' numudo' zusimi iga' nani' sekelimu' noluve. A'mine sekeli nene tuvedi gela malo'
- 14 lisihe' o neive.^a / Vemoho' kilisimasi tuvedi nehe tuvedi ivile' ivo hulikeve nehe gatanivo ingine muki' nene gomu' gatanive muki' nizada vilisa ofa ne'minisa Guve'nesi vela
- 15 nimilizave./ Ido' helamo vetesi ha minelodo' do lisihe' o-ledelingumu' ve li a'mine ofa Guve'nesi ve nenita hulilizangu' nene henehi ve a'mine hapu sekeliloti' di'mi dizi naba hulikevo goho' gahali' nene di'mi limi ngomo hulamilizave. Vemoho' muki' nene mo lisihe' igivo'
- 16 hulilizave./ Isilaele' alevete helamo vetesi ha minelonido' do lisihe' o-ledelingumu' ve li hulikevo gaza engitati' moni nehe inite' ne'mine ma do ma nene naza evene'ne ogo ninge-lengedaa' oloni' seli numungu' gono nodo ma a'minguko

^a Sekelisi ido' gela nesi Zuda vete laa' ani' gamazi ve. Laza kilo ido' gram inite' geni'vemu' laa' noune' ne'mini ingine a'mine gamazi sita' inite' geni'vemu' laa' ani'. Hapu sekeli lune' nene a'mine siluva' geni'vemu' lune' ve. Vanu sekeli ne'mi geni've nene 11 gram ne'mine minine' nenako hapu sekeli ne'mi geni've nene 5 1/2 gram ne'mine minine'. Neve nene moni teni toea ne'mi saisilo' lisihe' neive. Ido' Mose' minine' gameneu' nene siluva' ne'mine geni'vesi nene leli' moni naniketo' lisihe' minine' nehe. Laza moni naba minamine' nene ha gele none'za leli' moni naniketo' lisihe' minine' nehe nene mo gele lamine' amune. Pisin Baibel gizavete K5 ve li gizani' nene gopo angise'ine gifani' makilo' di mili gizani' noloseive.

^a 36:13 Kul 38:25-26, Mat 17:24

hulozo. Lingine helamo vetesi ha minelonido' do lisihe' o-ledelingumu' ve li hulilizani' ofa ne'mo Guve'nesi ve neni' ve'nelo' ogo Isilaele' aleve lengikumumu' nene do ga'nelo' oloseive./

O'moso'mo

**Noso' Izaa' Lapese Naba Lili' Ilizani' Monovomu'
Mose'ni Lo-imine' Gamazi**

(Kul 38:8)

- 17, 18 Guvelesi ve'mo Mose'ni ti' lo lo-imine':/ Noso' iza'a' lapese naba bolonisidunu' ma lili' ilo. Ido' a'mine lapese milalizani' gizene/monovo nesi bolonisidunu' ma lili' ilo. Ti' igi naza evene'ne ninge-lengedaa' oloni' seli numunosi alatasi oluso' nene mili a'mingu' noso ohizi vai' lilo.^a /
- 19 Ne'mine ikevo Aaloni' gipele zuho ve ingine a'mine noso
- 20 nedunu' gize'ine a'ine noso' iza'a' ilizave./ Inginge naza ogo ninge-lengedaa' oloni' seli numungu' gono dalisa ilizani' nene haza vilizani' hilikelizana'ko gomumu' lapeseu' nene gize'ine a'ine noso' izikisa vi gono dalizave. Ido' ingine gono'ine di inite' lehizi-nidi alatalo' oloku' gizilisa alatala
- 21 vilizani' nene/ hilikelizana'ko neemu' nene gize'ine a'ine noso' iza'a' ilizave. Lo huko noluvo gamazi meneve nene levo levo lo mineline' gamazi ve. Ingingesi nga'vopilemokisi nene di minivi' minivi' ilisave./

^a 30:18 Kul 38:8

O'moso'mo
Mono' Gonolo' Do Kekeize Laa' Uveli
Lili' Ilizani' Monovomu'
Mose'ni Lo-imine' Gamazi

(Kul. 37:29)

- 22, 23 Guvelesi ve'mo Mose'ni ti' lo lo-imine':/ Unuvo lamine' oga' inite' ato ato' laminekuti' nene ne'mine dozo: Mula zali'mi novozo nene 6 kilo dozo. Ido' silihoni za galupo izi lanahana ikevo unuvo lamine' oga' neine' nene 3 kilosi ido' unuvo lamine' oga' ine' zavile otoso nene 3 kilo
- 24 dozo./ Ido' kasia za galupo izi lanahana ikevo unuvo lamine' oga' neine' nene 6 kilo dozo. A'mine inite' muki' sigelilo' molaline' nene haza sigelilo' molamo mono' gono daveti sigelilokovo' molozo. Ido' ne'mine inite' dosa oliva gihileti'
- 25 uveli nene 4 lita dozo./ A'mine inite' muki' doo sada lili' iga' aveti monovolo' do molo do gopo ogo mono' inite' do
- 26 kekeize laakumu' uveli lamine' lolo' ozo./ A'mine uveli gono've nene ne'mine initeti' holoo nedunu' do kekeize lo-ngedezo: Naza ogo ninge-lengedaa' oloni' seli numunosi lo
- 27 huko-lingiduvoni' gamazi milalizani' bokisi nesi/ ido' tevoli nesi a'mido' minilizani' gono inite' nesi ido' lamu milalizani' initekisi a'mido' minilizani' inite' neesi ido' unuvo lamine'
- 28 oga' ine' inite' gizi nimiliza alata neesi/ ido' ize bili nimi oloku' giziliza alata neesi lapese'vesi ido' noso iza' lapese nabasi a'mine lapese do minaa' gizene nesi nene a'mine
- 29 uvelidunu' holo do kekeize lo-ngedezo./ Ne'mine ogo neni' inite' ve lo noso molanivo mo kekeize gehepeve li minilizave. Ne'mine ogavo a'mine initeti' di gililizave
- 30 muki' nene inginesi kekeize li minilisave./ Nenito' gono dii eveneto' medeli mini O'moso niman' inite' lehizi-nidilizave minilizave li Aaloni'nisi ei' gipele zuhosi a'mine uvelidunu'

- 31 hili-ngidi gono'nido' di oti-ngidilizave./ Isilaele' aleve nene ti' lo lo-ngemelesane: Lengi' langa'vopilemolite soto' ika' ika' i'mi nidizavo a'mine ne'mine uveli nene neni' gono'ne di-nidilizavelo' hili-ngidi di oti-ngidilizani' uveli
- 32 mineleseive./ A'ne'mine uveli nene haza ve lengi' okodido' mo keke' hilamilisave. A'mine luvoni' inite' di gopo igi a'ne'mine uveli' ato' gonomu' nene lili' amilo. A'ne'mine uveli nene kekeize lo neine' nenako lingine gilavo kekeize
- 33 lo minelido' o neive./ A'ne'mine uveli lili' igi haza eveneliti oko'nido' hilalizave muki' nene leli' zuho nizamave li huli heto' i-ngidilizave./

O'moso'mo

Unuvo Lamine' Oga' Sokile Oga' Inite'

Lili' Ilizani' Monovomu'

Mose'ni Lo-imine' Gamazi

- 34 Guvelesi ve'mo Mose'ni ti' lo lo-imine': Unuvo lamine' oga' inite' ato ato' ne'mine ma dozo: Mula za novozo ngi line' izi lanahana ani' ido' lulu' amuzo izi lanahana ani' ido' ngalabanumi guvise'mi novozo izi lanahana ani' nesi ido' za mali'mi novozo nene hamo' votigilelo' doo do gopo ozo./
- 35 Ne'mine ogo guvosi do gopo ogo unuvo lamine' iga' inite' lili' iga' avete iga' nadi'mine ogo olo' gizikevo unuvo lamine' oga' sokile oga' inite' lamine' gehepeve nenito' kekeize lo
- 36 minelido' nene lolo' olosane./ Lolo' ogo a'minguti' linge ma doo izo lanahana gehepeve ogo naza ogo ninge-lengedaa' oloni' seli mono' numungu' lo huko-lingiduvoni' gamazi milalizani' bokisi'mi velela geikisi minelosida nene do molozo. Lingine gilavo kekeize lo neine' inite' gehepeve
- 37 mineleseive./ Leli' numudeukisi' a'ne'mine unuvo ma nene ma gelelone li a'mine luvoni' inite' di di gopo igi unuvo oga' sokile inite' lili' amilo. Guvelesi ve'mi inite' ve li nenikumu'

38 di kekeize lilizave./ Evene' ma nene ne'mi lanite've leli'
geleloningumu' ve li a'ne'mine inite' lili' ilizave muki' nene
leli' zuho nizamave li huli heto' i-ngidilizave.^a /

Laka'ni 31

O'moso'mo

Seli Mono' Numuno'mi Inite've Muki'
Lili' Ilizaveti Monovomu'
Mose'ni Lo-imine' Gamazi

(Kul 35:10-19, 30-36:1)

1, 2 Mose'ni Guvelesi ve'mo ti' lo lo-imine':/ Gelezo. Naza ve
ma gonomu' do kegese-duve. Ado' Zuda' a'vopilemo'
zuhouti' ve Huli' gipele Uli' ei' gipele Bezaleli' nene do
3 kegese-duve./ Do kegese-do O'moso neni' sikalahu'ne ei'
lulou' gono amuzo molo dalive lo eita imiselo gala gele ngee
lo ato ato' gono do guno daa' amuzo nene emekuve./
4 Ado' gala gelo ngolidunukisi siluvatunukisi
5 bolonisdunukisi inite' lamine' lolo' oga' amuzosi/ ido' zeveli
geheni huko halizo halizo do ve'ne ve'ne eloo initeto' do
guno ogo molaa' amuzosi ido' za halizo a'mido' luhuvo
6 iza' amuzosi emekuvo ato ato' inite' ha lolo' ilive./ Ido'
ne'mine ogo naza imine' molo do analo' analo' oga' ilive
nene Dani' a'vopilemo' zuhouti' ve Ahisamaki' gipele
Oholiabu' nene do ote-de nouve. Ido' naza inite' di guno igi
lili' iga' ave muki' nene ne'mine ilizani' amuzo nene mo
ngeme osu' lokuvo lo-giduvoni' inite' muki' ha lili' ilizave./

^a 30:22-38 Kul 37:29

- 7 Ado' evene'ne ogo ninge-lengedeloni' seli numunosi lo huko-lingiduvoni' gamazi milalizani' bokisisi ido' ne'mi velelo' nitekisi ido' seli numungu' inite' muki' mineline' nesi
- 8 nene ha lili' ilizave:/Ado' tevolisi a'mido' inite' minilizanikisi ido' lamu milaa' inite' pipiza'vesi nomine' ngoli laminetunu' lili' ilizanikisi ido' a'mida inite' minilizani' mukikisi ido' unuvo lamine' oga' ine' sokile gizaa' alata nesi/
- 9 ido' inite' oloku' gizi nimaa' alatasi a'mido' inite' minilizani' mukikisi ido' a'ine noso iza' lapesesi a'mine lapesi do
- 10 mineline' gizene nesi/ ido' Aaloni' ve gipele zuhosi eveneto' medeli mini nimani' inite' lehizi-nidaa' gono nidi iziliza
- 11 inite' ongoti lili' i-ngidi di kekeize li-ngidilizanikisi/ ido' gono'nido' ngele'mizi-mili hili-ngidaa' uvelisi ido' unuvo lamine' oga' sokile mono' numungu' kekeize lo mineline' lumuu' gizi nimilizani' neesi ve. Ne nite' muki' lili' niigi ma nene mo luvoni' gehepeve ne'mine igisa lili' ilizave./

O'moso'mo

Isilaele' Aleve Holise' Gameneu' Di Igi Mili Minilizani'

Monovomu'

Mose'ni Lo-imine' Gamazi

(Kul. 35:1-3)

- 12, 13 Guvelesi ve'mo Mose'ni ti' lo lo-imine':/ Isilaele' aleve lo-ngemezo: Holise' ne'mo naza nenita do kekeize lo-lengedo neni' evene'ne lolo' o-lingiduvoni' Guve'nesi ve nouvoni' nene do soto' o lengelebizaa' maki've lingimuvoni' nenako nemu' nene holise' minaakumu' lo-lingimuvoni' gamazi'ne nene gili di minilo. A'mine maki nene lengi' langa'vopilemo' soto' i'mi dizi minilizada levo levo lo

- 14 mineleseive.^a / Holise' nene lingine nenikumu' di kekeize li minilizani' gamene neive. Nemu' nene naza a'mine gamenelo' gono dami holise' minilizave lo lo-lingiduvoni' gamazi nene gili divo' minilizado' o neive. Ve ma a'mine holise' gamene do gopo ilive nene bili hililizave. Ee, holiseku' gono dalive nene ei' evenele zuhouti' di osu' li-
- 15 dilizave./ Salele hamoku' gonoka nene gamene sigisi dalosaba gamene seveni ne'mi lulou' nene gono damaa' mine gelo minaa' gamene gehepeve mino Guve'nesi ve nenikumu' kekeize lo neive. Holise' gameneu' nene ve mali'mo gono nodavo ma nene goni' i-di bili hililo.^b /
- 16 Isilaele' aleve neesi alinge' nga'vopilemo' netesi holise' nene di gili' li di mini'mi nidi vilisave. Holise' gamenemu' lo huko lo-lingiduvoni' gamazi mene mo levo levo lo mineline'
- 17 nenako gili di minilizani' nene mo huko vamilive./ Ee, neni' Guve'nesi ve nene okulumo' misubo lolo' o do novo gamene sigisi gono do seveni malo' nene mine giluvoni' nenako holise' neve nene Isilaele' aleve neni' evene'ne nizavo naza lengi' O'mosotine nouvongumu' levo levo lo mineline' maki nene mineleseive.^c /
- 18 Guvelesi ve aza Sinae gololo' Mose'ni nene gamazi lo-eme osu' lo ei' O'moso'mo lo huko lo-lidine' gamazi anadunu' gazine' geheni sita' gatapa' nene Mose'ni do imine'./

^a 31:13 Ezek 20:12, 20:20

^b 31:15 Kul 20:8-11, 23:12, 34:21, 35:2; Lou' 23:3; Goh 5:12-14

^c 31:17 Kul 20:11

Laka'ni 32**Isilaele' Aleve**

**O'mosote Ve Li Bulumaka' Avazaha Lili' Ikevo
O'moso'mo nGebele Gese' Ogo Do Osu' Lo-ngedelove Lavo
Mose' Ne'mine Amiline Lo Ezela Lavo Gele Imine' Gamazi**

(Lou' 9:6-29)

- 1 Evene' ingine Mose' lite' lo lemo amo gololo' gamene
ha'na minave li Aaloni'ni igi hizi vodo vodo i-di ti' li lani':
Otezo. Ogo o'moso inite' lolo' o-ledezo. Leze gomu' mili
limi lele'mizi vilizave. Aigita misubouti' lele'mizo ave
- 2 Mose' ma nene vo nadi' neihe nene gelamunge.^a / Aaloni' ti'
lo lo-ngimine': Eleding' izipahatinete lini ngoli ga'ningu'
3 nalava izika' ani' nene apasi di nenita alo./ Ti' lavo evene'
muki' ingine lini ngoli ga'ningu' izika' ani' nene apasi
- 4 Aaloni' neida di ani'./ nGoli ga'ninguti' nene di ikevo do gizo
lala lo inite' lolo' oga' ine' initeku' ma hulo vemoho'
bulumaka' avazaha lolo' ine'. Ne'mine ogavo evene' nete ti' li
lani': Isilaele' alevkizo, Aigita misubouti' lengele'mizo
- 5 ani' o'mosotine ma nene neive.^b / Ne'mine li igi mili minani'
nene Aaloni' ningo bulumaka' avazaha ne'mi velela nene
inite' oloku' gizaa' alata ma lolo' ogo bulumakakumu' nene
O'moso ve lo ti' lo line': Aize' neve nene Guvesi ve opo'ni
- 6 lo noso' nite' naba gize vata' olosune.^c / Ido' nedenga'
holukati' oti bulumaka' ma ngibili oloku' gizi o'moso imaa'
ofa imi o'mososi do hamo' oga' ofasi gizi imilisa di ani'.
Ne'mine igi evene' ingine mito' mine gese' igi noso' nite' niki
oti zohi' goloso igi minani'./

^a 32:1 Apo 7:40

^b 32:4 I Kin 12:28; Apo 7:41

^c 32:6 I Kod 10:7

- 7 Guvelesi ve'mo Mose'ni ti' lo lo-imine': Lite' lo lemo
vo'nazo. Gei' eveneka Aigita Misubouti' gomu' molo ngemo
- 8 do anive nene monovo di goloso naze./ Naza gamazi
e'metilizave lo luvoni' ma nene geti hulikeve. nGolidunu' di
lala li bulumakali'mi avazaha ma lili' igi opo'ni li ize bili
niimave. Ido' ti' li lave: Isilaele' alevekizo, meve nene
O'moso gomu' molo lengemo Aigita misubouti'
- 9 lengele'mizo ave ma ne neive./ Ne'mine lo Guvelesi ve'mo
Mose'ni ti' lo lo-imine': Evene' mene a'manapa goloso iga'
- 10 nani' nene mo ningo gelekuve./ Gaza aka'ne hize tile-
nedamanivo idise nene nizebolo' molavo mulu'neu' olo'
noline' ne'mo do goloso ogo osu' lo-ngedelesuve. Ti' ogo
gezesi ga'vopilemokisi nalava nabalo' geitati' do soto' o-
lengedelesuve./
- 11 Line'za Mose' aza Guvelesi ve O'moso do hongu lo-do ti'
lo line': Gaza eveneka Aigita misubouti' amuzoka nabadunu'
ngele'mizo aine' ma nene nanimu' gizebolo' molavo do
- 12 goloso o-ngedeline./ Aigita ve nete geikumu' ti' li lilisave:
Aza ngele'mizo vine' nene mo gala goloso gelo ingine
misubouti' osu' lilizave lo gololo' ngebele gese' olosa
ngele'mizo do vaani' neive li lilizani' nene edamoloseive.
Alamozo. Gizebolo' molani' nene do hongu lo luka do
velepe' izo eveneka ngebelelesa laine' nene alamo hulo-
- 13 ngedezo./ Gaza gelekele' i-gidaa' ave Abalahamu' Isaka' ido'
Isilaelenginemu' gelezo. Gei' gulivekalo' salani gamazi lo
huko ti' lo laine' ma nene gelezo: Naza langa'vopilemo'
okulumoto' sonohi' nizani' ne'minosa lengemo naza
lengemelesuve lo luvo misubo muki' mene ngemelesuve.
Ido' ngemekuvo engi' misubo'ine gehepeve lolo' ogo

- 14 mine'mo voo mineleseive lo lo-ngemaine' ma ve line'.^a / Ti'
lo lavo Guvelesi ve aza evene've do goloso o-ngedelesa
giline' ma nene lulo do velepe' izo ne'mine amine'.^b /
- 15 Mose' aza velepe' izo geheni sitato' lo huko line' gamazi
16 hela helala gazine' nene gehe do gololo' lemo vine'. / A'mine
geheni nene O'moso asi've gono do ei' anadunu' gito gazine'
geheni ve. /
- 17 Mosekisi Zosuvakisi gololoti' nilimasivo golo gizeneuko
home evene' geke' geke' li minani' nene gelo Zosuva' aza
18 Mose'ni ti' lo lo-imine': Numuda nene lovo gamazi gele vo
live. / Line'za Mose' ti' lo line':
Neve nene lovou' ngivile' igi geke' lani' no'ine nevoba
ido' ngivile' ikevo ive nama igi lani' no'ine nevoba
asi gopo' napa zohiku' nama nilani' gele vo livo
nogiluve. /
- 19 Mose' aza omo numuno avito' ogo bulumaka' avazaha
nene ningo ido' evene' gize'ine a'ine izi minani' nene ningo
izebolo' goloso molani' ne'mo O'moso'mo gazine' geheni
20 sita' nene a'mida golo gizeneu' hulo izo ledo hitine'. / Ti' ogo
vo bulumaka' lili' ani' nene do oloku' gizo hupu' izo lanahana
ogo hutile' ogo nosolo' hulo a'mine noso nene Isilaele'
alevete nalizave lo lo-ngedavo nani'. /
- 21 Neloti' nene Mose' aza Aalonida ti' lo line': Gaza do
lihime naba'mi veleu' ize-ngedaniko evene' mene geita igi
22 nadi' ave. / Lavo Aaloni' aza ti' lo line': Guvekasi ve, nezemu'
gizebolo' molamozo. Evene' ingine inite' goloso
23 dalisa iga' nani' nene mo gele nane. / Evene' ingine igi nezela
ti' li likeve: Ve meu' Aigita misubouti' do gomu' molo
lele'mizo ave Mose' ma nene vo nadi' ihe. Gelamunge. Do

^a 32:13 Api' 17:8; 22:16-17

^b 32:11-14 Nab 14:13-19

- gomu' molo lele'mizo vilizani' o'mosote ma lolo' o-ledezo.
 Ne'mine li likevo naza ti' lo longo' o-ngiduve:/
- 24 nGoli zaho do nane. nGoli nene apasi di igi nimilo. Lokuvo
 nimikevo hulo oloku' okuvo bulumaka' nene lolo' ine' ve./
- 25 Mose' aza Aaloni' gele ngemavo evene' ingine monovo
 golosou' vili vivi' vivi' igi minikevo lovo ve'ine nete gize' i-
 26 ngidilizado' o minine' nene ningo giline'./ Ti' ogo Mose' aza
 numuno ebeli'mi gatedo' ote mino geke' lo ti' lo line': Evene'
 ma lingine Guvesi vemu' none li ma nili ma nene nenita
 alo. Ti' lavo Levi' a'vopilemo' muki' nene igi Moseda
 27 minani'./ Minikevo ti' lo lo-ngimine': Guvesi ve Isilaele'
 aleveti O'moso'mo ti' lo lave: Lingine bainati mitetine di
 gateni meloti' gateni mala vi igi vigi i'mi mini lengi' zuho
 zogo mili lengikisi avito' avito' ingi minaa' ani' nene
 28 ngibilika' ngibilika' igi pililo./ Ti' lavo Levi' a'vopilemolite
 ingine Mose' lidi'mine igi ngibilani' nene a'mine hamo'
 29 gameneukovo' evene' tili tauseni nene hilani'./ Ne'mine
 ikevo Mose' aza a'mine Levi' a'vopilemo' nene ti' lo lo-
 ngimine': Lengi' gipetine minani' nehe ido' uvotinge
 akunotine zuhouti' minani' nehe ne'mine minangumu' gili
 huli lingine a'mine monovo goloso ave ngibilangumu' gelo
 Guvesi ve aza idise no'noho' ize-lengedo eveneto' medeli
 mini imani' inite' lehizi-daa' ilizave've ve lo idise do ote-
 lengedave./
- 30 Go' lavo Mose' nene evene' ti' lo lo-ngimine': Lingine
 lihime naba goloso dikeve. Nemu' nene idise naza golola
 dizo vo lengikumu' Guvesi vela lolosuve. Lokuvo
 lihimetine hulo-lengedelove lo lilihe o'ove lilihe.
- 31 Ningelone./ Ne'mine lo Mose' aza O'mosola tine' molo vo ti'
 lo line': Agae, evene' mene lihime naba goloso dikeve.

- 32 InGINE ngolidunu' o'moso'ine lili' ikeve./ Ti' ikeni'za idise
nene lihime'ine apase-ngedilibe. Ido' ne'mine amolo ma gei'
evenekaliti gulive'ine minine' bukukoti' neni' gulive'ne ma
33 nene gilite hulozo.^a / Ne'mine lavo Guvelesi ve'mo ti' lo lo-
imine': Lihime dave ne'mi gulive neni' bukuti' nene gilite
34 hulolodo' o neive./ Vozo. Evene' nene ngele'mizo ebe' lo-
giduvoda nene vilinize. Gaza gele minezo. Neni' angelo'ne
ne'mo gomu' molo-lengedo lengele'mizo voloseive. Ne
neiha lihime ngemeloni' gamene mo aloseive. A'mido' nene
35 lihime'ine memu' gono ngemelesuve./ Neloti' alinge' nene
Guvelesi ve aza Aaloni' lolo' ine' bulumaka' avazaha lolo'
ilive li lave nene lihime ngemo inite' gize daa' nene engita
do soto' ine'./

Laka'ni 33

**nGele'mizo Novanivo Isilaele' Aleve Sinae Golo Mene Huli
Kanaha Misubola Vilizaha Neni' Vovotingu' Vamolosuve Lo
Guvelesi Ve'mo Mose'ni Lo-imine' Gamazi**

- 1 Guvelesi ve'mo Mose'ni ti' lo lo-imine': Gazasi Aigita
misubouti' ngele'mizo anivesi mene ebe' huli aka api' igi vi
misubo nene langa'vopilemo' ngemelesuve lo Abalahamu'
Isaka' ido' Zakobongi lo huko lo-ngimuvoni' misubou' nene
2 vilo.^b / Angelo' ma gomu' molo lengemo vilive lo imiselo
a'mine misubola minave ado' Kanaha ve Amoli ve Heti ve
Pelizi ve Hivi ve ido' Zebusi ve nene ngimiselo do
3 hulolosuve./ Gavozo misubo ido' lanite' noso' nite' lamine'
vai' lo neine' misubola lengele'mizo volosuha lingine nene
a'manapa a'manapa iga' nani' aleve nizanako akalo' novo
lengebele gese' ogalonako naza lengi' vovotingu' maka'

^a 32:32 Nam 69:28; Lev 3:5

^b 33:1 Apr' 12:7; 26:3; 28:13

- 4 linginesi vamolosuve line'./ Ne'mine lo geni gamazi line' nene gili evene' nete mulu'ningu' mulumo gili mini gonolise inite' iza' ani' nene izami minaa' ani'./
- 5 Ee, Guvelesi ve'mo Mose'ni ti' lo lo-imine': Isilaele' aleve ti' lo lo-ngemezo: Lingine nene a'manapa a'manapa iga' nani' aleve nizave. Naza gamene li'nibemukisi lengikisi maka' voloni' nene do goloso o-lengedelesuve. Idise nene izi nizani' gonolise nitetine nene apasi milalo. Apasi milikevo naza o-lengedelo nite' nene ningo gelelove./
- 6 Ne'mine lavo Isilaele' alevete gonolise nite'ine nene apasi mili Holebi golo huli vadoti' nene a'mine gonolise nite'ine gohi izisa'mani'./

**O'mososi Maka' Minaa' Numuno Ve Lo
Mose' Aza Seli Numuno Do Otaa' Ine' Monovo**

- 7 Isilaele' aleve igi ebe' mala seli numu'ine di oti ingi minikevo Mose' aza seli numuno ma do vo a'mine seli numuno nene hoto' gidini do otaa' ine'. Ido' a'minemu' nene O'mososi maka' minaa' numuno ve lavo Guvelesi ve'mo gilingumu' longo' i-dilisa gilave muki' ingine ingi minani' numu'ine huli a'mine O'mososi maka' minaa' seli numungu'
- 8 vi longo' i-daa' ani'./ Ido' Mose' aza a'mine seli numuda volosa novine' gamenelo' gamenelo' nene evene' muki' oti seli numu'ine gatedo' oti mini Mose'ni ningi nizavo
- 9 O'mososi minaa' seli numungu' nene vo dizaa' ine'./ Dize numungu' neivo Guvelesi ve'mo Mose'ni gamazi nolo-imivo a'mida nene limuso ha'na dizine' ne'mo a'mine seli
- 10 numuno gatedo' lemo minaa' ine'./ Ido' limuso ha'na dizine' nene a'mine numuno gatedo' neivo ningi a'mido' geti evene' vailite oti engi' seli numu'ine gatedo' gatedo' limi go'ine

- 11 hizaa' ani'./ Haza evene' laza ge ninge ne ninge lo mino gamazi lo volelo' melo' oga' noune' ne'mini Guvelesi vesi Mosekisi maka' mini gamazi li volelo' melo' igi laa' asine'. Neloti' nene Mose' aza evene' muki' ingaa' ani' numuda tine' molo vaa' ine'za ve goso've gelekele' o-daa' ive Nuni' gipele Zosuva' ne'mo a'mine seli numunguti' hulo vosa'mine'./

**Guvelesi Ve'mo Lengikisi Vamolosuve Lido' Nene
Mose' Aza Zahosi Volone Lo Mulumo Gani Lo-davo
Aza Geikisi Mine'mo Nouvo Ha Volosane Lo-imine' Gamazi**

- 12 Mose' Guvelesi vela ti' lo line': Gelezo. Gaza evene' mene ngele'mizo vozo lo lo-nede nane'za hize ele' o-nedelve zahine imiselanivo maka' volone. Nemu' nene ma lo-nemamane. Ee, gaza nene neni' ningo gele vevese'mo ogo mo ninge lamine' o-nedaa' nouve lo ha nolo-nemane'za zahine imiselanivo maka' volone. Nemu' ma lo-nemamane./
- 13 Ido' naza gei' olosa gelaine' inite' nemu' longo' noo-giduve. Idise nene nenikumu' ha lamine' nogelo ma nene a'minemu' lo-nemanivo geze nene gele vevese gehepeve o-gedekuvo gaza nenikumu' gelanivo lamine' o'movo' vilive lo noluve. Ido' mene aleve nete gei' eveneka gehepeve nizave.
- 14 Nemukisi gele minezo./ Ne'mine lavo Guvelesi ve'mo ti' lo lave: Naza geikisi mine'mo ogo nouvo ha volosane. Novanivo gaka muki' gelaane' nene do mate-gedelesuve.^a /
- 15 Lavo Mose' ti' lo lo-imine': Gasika lezesi vamolo ma nene mene ebe' huli dizi vilo lo limiselamozo./ Gaza lelikisi
- 16 vamiline' nene gaza nenikisi gei' eveneka Isilaele' aleve nesi ninge lamine' o-lede nane' nene evene' ato atolite nanitetoti' ningi gililizave. nGeli ningi gilamilizaha gaza lelikisi viline'

^a 33:14 Goh 12:10; Isa 63:9

- ne'mo nazasi gei' evenekasi misubo mukiku' minani' evene'
 zuho ato ato' mukikuti' nene do kegeso minelesune./
- 17 Ne'mine lavo Guvelesi ve'mo Mose' ni ti' lo lo-imine': Ninge
 lamine' o-gedo gei' nene ninge vevese nouvonako gei' laine'
 ne'mine gehepeve olosuve./

Mose' Aza Gei' Labanaka Ningeloho Lavo
O'moso'mo Neni' Mehe'nevo' Gelebizekuvo
Ningeline Lo Line' Gamazi

- 18 Neloti' nene Mose' ti' lo longo' ine': Agae, nelebizanivo
 19 naza gei' labanaka gehepeve ningeloha./ Guvelesi ve'mo
 line': Naza nemeni dameni lamine' nene gei' vekalo' do soto'
 o gelebizo ido' Guve'nesi ve ve lo neni' kekeize lo neine'
 gulive'ne nene gei' nanida lo soto' o-gedelesuve. Naza mene
 evene' nasahili' o-ngedelove lo gelelonive nene nasahili' ha
 o-ngedelesuve. Engi' mulumo'ine gelelove lo gelelonive
 20 nene mo mulumo'ine gelelesuve.^a / Evene' malite neni' go'ne
 ve'nelo' gehepeve ningilizani' nene ingine neloti' ve'inesi
 gohi minami hililisave. Nemu' nene gaza neze go'ne ve'ne
 21 ningamolosane./ Ne'mine lo gohi ti' lo line': Ningezo. Geze
 ote mineline' ebe' nene geheni minuvoda mene neive./
 22 A'mido' ote nanivo neni' nouvodoti' soto' oga' neine'
 labana'ne nene navo ma nene geze nene hulo geheni muliku'
 o-gimiko a'nedunu' do hite-gedo naza ogo volosuve.^b / Ti'
 23 ogo a'ne nene do hulokuvo go'ne ve'ne nene ningamiliba
 mehe'nevo' nene ningelesane./

Laka'ni 34

**O'moso'mo Mose'ni Geheni Gatapa' Sita' gohi Gito
Gololo' Nenita Do Dizezo Lo-do do dizo Ogavo
A'mido' Soto' O Emo Monovo've Lo-emo
Isilaele' Vemu' Gamazi Gohi Lo Huko
Aka Gamazi Gehedo' Gohi Gizine' Gamazi**

(Lou' 10:1-5)

(Kul 23:14-19; Lou' 7:1-5; 16:1-17)



- 1 Guvelesi ve'mo Mose'ni ti' lo lo-imine': Gaza geheni gatapa' sitato' lo huko gizuvo gamazi belo ledaine' ma'mine sita' ma gitezo. A'mido' gomu' gehenilo' minine' luhuvo ma
- 2 gizelesa luze.^a / Ne'mine ogo do va'va' ogo aize' nedenga' neve nene Sinae golola dizo pelo neni' nouvoda alosane./
- 3 Evene' ma gezesi maka' dizi amilizave. Ido' golola evene' hamokisi keke' monavo ningamolove. Ido' sipisipi nehe bulumaka' nehe guviselo' monilizani' nene a'mine gololasi

^a 34:1 Kul 31:18

- 4 gizeneukosi keke' monamilizave./ Ti' lavo Mose' aza
 Guvelesi ve'mo lo-imine' ne'mino gomu' geheni ma'mine
 geheni gohi sita' ma huko nedenga' holukati' golola gehe do
- 5 dizo vine'./ Guvelesi ve aza nene limusou' lemo ogo Mose'
 neida ote mino Ei' gulive've ogo Guve'nesi ve ve line'./
- 6 Guvelesi ve aza Mose' velela ogo novo ti' lo line': Guve'nesi
 ve ve. Guve'nesi ve ve. Neni' nene mulumotine gelo ninge
 lamine' o-lengedaa' ogo nizebolo' geto molamaa' ivo mino
 nasahili' vauve elo o-lengedo gotine izamo lo huko-
 lingiduvoni' gamazi nene mo do gihile izaakovo' oga'
- 7 nouvoni' O'moso nene nouve ./ Gamazi lo hukuvodo' gele
 dovo' mino evene' muki' tauseni vai' ivile' ivosa nasahili' o-
 ngedo neni' gamazi gili huli monovo goloso igi lihime dani'
 nene hulo-ngedaa' nouvoni'za lihime davemu' nene ingine
 lihime damave mo keke' losa'muve. Me'ninge lihime dado'
 lihime ngemekuvo ne'mi gihile nene engi' izipaha'nidokisi
- 8 nga'volokisi engi' izipaha'nidokisi vo daa' neive.^a / Ne'mine
 lavo Mose' aza lite' lo misubolo' obuvolo hizo gubi' ize emo
- 9 opo'ni line'./ Ne'mine ogo ti' lo line': Guvekasi ve, Gaza
 nene lamineto' nenikumu' ninge lamine' o-nede nane' o
 noline' nene gei' nene lelikisi maka' volone lo nogiluve.
 Mene aleve nene a'manapa a'manapa iga' nani' aleve
 nizani'za do goloso une' nesi ido' lihimetesi hulo-ledo gei'
 eveneka lolo' o-ledo do ti' o-ledo do minezo./
- 10 Ti' lavo Guvelesi ve'mo line': Idise mene naza gamazi
 lengikumukisi ma ti' lo lo huko noluve: Gei' eveneka muki'
 neti ve'nido' nene naza misubou' misubou' ma di soto' amani'
 inite' votine viline' inite' gehepeve nene ma olosuve. Ee,
 lingine vi vovo'ningu' ingi monilizani' aleve muki' nete

^a 34:6-7 Kul 20:5-6; Nab 14:18; Goh 5:9-10; 7:9-10

- Guve'nesi ve'mo oloni' inite' nene ningilisave. Lengi' hize ele' o-lengedo lengehelele izeline' inite' gehepeve olosuve./
- 11 Idise nolo-lingiduvoni' gamazi muki' nene gili di e'metivo' minilo. Ne'mine igi mini'mi nivavo neni' nene vilizada nizani' aleve ado' Amoli ve Kanaha ve Heti ve Pelizi ve Hivi ve ido' Zebusi ve nene ngimiselo do hulolosuve./
- 12 A'mine vilizani' misubouko nizani' aleve nete lengi' vovotingu' ha mini lengemengu' mili lengele'mizi goloso ikelizanako.lingine zogo molo minelone li engikisi gamazi
- 13 di hamo' igi minamilo.^a / Asi a'mida nivi ma engi' soza mono' inite'ine nene di hulilo. Ado' alata'ine nene bili kusi mono'inemu' di kekeize li geheni ha'na di otaa' nanikisi ido' o'moso aluli'mi avazaha minine' za posi'ine neesi nene
- 14 bilivi' kusivi' igi di goloso palasa ilo.^b / Guve'nesi ve neni' gulive'ne nene nenito' medeli di minilizani' initekumu' nizebolo' molaa' ive ve. Ido' lamine' naza nenito' medeli di minilizani' initekumu' nizebolo' molaa' neine' O'moso ne nouve. Nemu' nene o'moso ato' gubi' izi imi opo'ni lamilo./
- 15 A'mine ebekuti' alevesi zogo mili-ngidilizadoti' olovo' igi minilo. Ma ti' ilizani' nene ingine monovo goloso igi o'moso inite'ine gubi' izi ngimi ize bili gizi ngimilizani' gameneu' a'minguti' nalizado' nene alo li lengikisi elese mili-
- 16 lingidikevo vi a'minguti' nikelizave./ Ido' a'minguti' nalizadoti' nene engi' aluvo'ine nene lengi' gipetine ngimikevo dikevo a'mine vene' nete monovo goloso di engi' o'moso nge'meti lengi' gipetinesi ngele'mize soza o'mosola milikevo nenita lisihe' igi minamilizaze. Zogo mili-ngidamilo./

^a 34:12 Kul 23:32-33

^b 34:13 Goh 16:21

- 17 Lingine ngoli nehe siluva' nehe nevo'mine initetunu' di lala li o'mosotine lili' amilo.^a /
- 18 Ido' do lulu iza' ine' inite' zisiti hulamani' beleti nalizani' holise' minaa' ilisave. Ike'ni ma gulive *Abibi neu' nene lingine Aigita misubo huli heta ani' nenako a'mine ike'ni Abibi ogavo ma muluvoni' gamenelo' nene api' igi gamene seveni ogo novivo beleti nalizani' nene naza lo-lingimuvoni' ma'mino zisiti hulamani' beleti nene ni minilisave.^b /
- 19 Venelite gana' gidani' gipesi ido' sipisipi nehe bulumaka' nehe ize gulotine ato ato' mukikuti' alungolite gana' gidani' gipe nesi nene neni' ve li huli-ngidikevo engi' neve neni'
- 20 inite' minilisave.^c / Ne neine'za dongi ize gipe gana' soto' ani' nene sipisipi gipedunu' meni hizi di ti'nilo. Ido' meni hizo do tibizamolo ma nene dongi ize Guvelesi ve emaato' lisihe' i minisa'mani' nenako luvono ize ngutanivo helelive. Ido' lengi' gipetine ize'ninge gana' gidani' nesi a'mine'mine igi meni hizi di lengita ilo. Ido' nei' ve'nela alizani' nene evene' hamolitesi neze nimiliza nite' nomine' mini ma neni' ve'nela amilisave.^d /
- 21 Salele hamoku' gamene sigisi nene gono ha dalizaha seveni neu' nene gono dami mine gili minilizave. Mine gosoho' zuho' ilisa misubo gono daa' gameneupe minamuno dolizaa' gameneupe nesi nene gamene seveni ogavo ma gono mo damilo.^e /
- 22 Misubotingu' zuho' ani' viti api' igi di lumo ilisa a'minguti' ma nimi nenikumu' gilisa noso' nite' naa' holise'

^a 34:17 Kul 20:4; Lou' 19:4; Goh 5:8; 27:15

^a A'mine ike'ni Abibi nene ogavo Znda ve kilisimasi gosoho' api' neive laa' ani'. Ido' a'mine ike'ni nene leli' ike'ni "March" osu' lolosa neivo he "April" api' neivo he ne'mine gamenelo' oga' ine'.

^b 34:18 Kul 12:14-20; Lou' 23:6-8; Nab 28:16-25

^c 34:19 Kul 13:2

^d 34:20 Kul 13:13

^e 34:21 Kul 20:9-10; 23:12; 31:15; 35:2; Lou' 23:3; Goh 5:13-14

- minilo. Ido' kilisimasi nene osu' lolosa neivo za gihiletine
 husani' nene di lumo ilisa a'minguti' ma nimi nenikumu'
 23 gilisa noso' nite' naa' holise' minilo.^a / Guve'nesi ve Isilaele'
 aleveti Guvetinesi ve neni' nouvoda nene kilisimasi
 hamoli'mi lulou' nene vemoho' muki' ingine a'mine gamene
 24 sitohamo igi soto' i nimilizave./ Evene' zuho ato ato'
 ngimiselo do hulo-ngedo misubo'ine lengi' lengemo
 misubotine nene do naba o-lengedekuvo lingine kilisimasiu'
 kilisimasiu' a'mine gamene sitohamo dizi neni' nouvoda
 soto' i nimika' nimika' navo evene' atolite lengi' misubotine
 dalone li ma amilisave. Nemu' nene biluvalite igi misubote
 dikelizave li gizebo igi minami ha dizi soto' i nimilizave./
 25 Ize bili neni' gizi nimilisa ninimi ma nene a'minesi zisiti
 hulani' beleti nene mili-nidamilo. Isetine izuvo holise' mini
 sipisipi bili nimadoti' lingela ma ha milikavo vo nedenga'
 amivo.^b /
 26 Midingu' gana' dolizilizani' initekuti' lamine' neine' nene
 Guvetinesi ve O'moso neni' numu'neu' di dizi nimilo.
 Meme' ize angale nene izelehi amine novozou' somo
 milamilo.^c /
 27 Neloti' nene Guvelesi ve'mo Mose'ni ti' lo lo-imine':
 Gamazi gezemukisi Isilaele' alevemukisi lo huko lolosa
 noluvonaze. Bukuu' gamazi luvoni' nene gize molozo line'./
 28 Ido' gololo' nene Mose' aza Guvelesi vesi neivo gamene
 foti'a ogo vine'. Ido' a'mine gameneu' nene Mose' aza noso'
 nitekisi nososi malise ogo inite' hamokisi ma namine'.
 Ido' Guvelesi ve'mo lo huko line' gamazi ado' aka gamazi
 nene a'mine geheni gatapa' sitato' luhuvo gizine'./

^a 34:22 Lou' 23:15-21, 39-43; Nab 28:26:31

^b 34:25 Kul 12:10

^c 34:26 Goh 14:21; 26:2

**Mose' Aza Geheni Gatapa' Nene Gehe Do
Sinae Gololoti' Lemo navo
Golo Veleloti' Silingenge'ne Hulo Minine' Gamazi**

- 29 Alinge' nene Mose' aza aka gamazi minine' geheni
gatapa' sita' nene gehe do Sinae gololoti' lemo vine' nene
Guvelesi vesi gamazi li minasine' maloti' anako golo
veleloti' nene labana' hulo minine'za Mose' asi've nene
30 a'minemu' ma ningo gelamine'./ Aaloni' ve Isilaele' aleve
muki' nene Mose'ni ningani' golo velelo' nene silingenge'ne



- hulo neivo ningani'. Ningi ngehelele izavo avito' vamani'./
31 Ti' ani'za Mose' aza asi lo-ngedavo Aaloni' ve eveneliti
gizebo ve'ine ingine Mose' neida vikevo gamazi lo-

- 32 ngimine'./ Neloti' nene Isilaele' aleve muki' imi avito' ikevo
Mose' aza Guvelesi ve'mo Sinae gololo' lo huko lo-imine'
gamazi muki' nene lo-ngimine'./
- 33 Mose' evene' nene gamazi lo-ngemo osu' lo golo velelo'
34 nene inite' do hitine'./ Ido' gamazi lo-emelesa Guvelesi ve'mi
velelo' dizine' gamenelo' gamenelo' nene do hulo dizo lo-
emaa' ine'za lemo ogosa nene gohi do hitaa' ine'. Lemo
ogosa nene Guvelesi ve'mo lo-dine' gamazi nene Isilaele'
35 aleve lo-ngemaa' ine'./ Ido' ne'mine neivo Isilaele' aleve ei'
golo velelo' silingenge'ne nene ha ningaa' ani'. Ningikevo
golo velelo' nene gohi do hitaa' ine'. Do hite mino alinge'
gohi Guvelesi ve vo gamazi lo-emelo ma nene do hulaa'
ine'.^a /

Laka'ni 35

Mose' Aza

Isilaele' Aleve Gonouti' Mino Gelo Minaa' Ilizani' Monovomu' Lo-ngimine' Gamazi

(Kul 31:12-17)

- 1 Mose' aza Isilaele' aleve muki' nene asi lo do nuboo-
2 ngedo line': Meneve nene Guvelesi ve'mo ti' lo live:/ Salele
hamoku' gonoka nene gamene sigisi dalosaba gamene
seveni ne'mi lulou' nene gono damaa' mine gelo minaa'
gamene gehepeve mino Guve'nesi ve nenikumu' kekeize lo
neive. Holise' gameneu' nene ve mali'mo gono nodavo ma
3 nene goni' i-di bili hililo.^b / Numudingu' numudingu' a'mine
gamene gehepeveu' olo' nesi gizamilo./

^a 34:29-35 2 Kod 3:7-16

^b 35:2 Kul 20:8-11; 23:12; 31:15; 34:21; Lou' 23:3; Goh 5:12-14

Mose' Aza**Isilaele' Aleve Seli Mono' Numuno Gizilizangumu'
Inite' Di Alizani' Monovo Lo-ngimine' Gamazi**

(Kul 25:1-9)

- 4 Mose' aza Isilaele' aleve muki' nene ti' lo lo-ngimine':
 5 Guvelesi ve'mo ne'mine lo-neive:/ Lingine di nizani'
 initetinguti' inite' linge ma di kegesi Guvelesi ve imilisave.
 Ve hamo' hamo' muki' nene inite' ma emelesa geleine' nene
 Guvelesi ve emelini inite' nene ha do alosane. Ado' ngolisi
 6 siluvakisi ido' bolonisisi nene do alosane./ Gumi kala
 gulehedise ido' gulehe' teleti nala' sipisipi zopovodunu' lili'
 ani' ve. Ido' lavolavo laminekisi meme' ize lopovo nesi ve./
 7 Sipisipi vemoholiti losuvo gulehe' guhise hilanikisi ido'
 guvo nosou' bulumakaliti losuvo nesi ve. Ido' akasiza za
 8 lamine' nesi ve./ Lamukumu' uvelisi ido' gonolo' di oti-
 ngidilisamu' hili-ngidilizani' uvelimukisi ido' unuvo lamine'
 oga' ine' sokile gizaa' initekumukisi unuvo lamine' iga' inite'
 9 ato ato' nesi ve./ Ido' O'moso inite' oloku' gizo lehize-delive
 naba ne'mo sioti've ha'nalo' hito veleta izeline' inite' * efod
 nelokumukisi ido' a'mido' losonolo' mineline' initekumukisi
 koneliani geheni lamine' ido' geheni lamine' gohi ato ato'
 nesi ha do ogo emelesane./

* Efod nene Zuda veti no'ninguti' gamazi ne neive. Eveneto' medelo mino O'moso imani' inite' lehize-daa' ive nabali'mi oko'nolo' mite' mamu' laa' ani' ve lo gele none'za a'mine efod oko'no nene nado minaa' ine' neve. Nene gele gumo amune. Evene' malite a'mine efod nene anasi minamine' sioti ne'mine minime' nehe li gilavo malite siketi li'nibe ne'mine minime' nehe li gilaa' nave.

Mose' Aza**Seli Mono' Numunomu' Ne'mine Inite' Lili' Ilizave Lo
Isilaele' Aleve Lo-ngimine' Gamazi**

(Kul. 39:32-43)

- 10 Ido' vovotingu' ga'ine gili ngee li inite' mata' di guno igi
lili' iga' ave nizave muki' nene igi Guvelesi ve'mo lo-lidine'
- 11 inite' muki' lili' ilizave:/ Ado' O'moso'mi numuno ne'mi seli
nubikisi a'mido' hite-de mineli initekisi inite've do gili' laa'
initekisi numuno amuzosi lohoto' za'vesi lave za posi'vesi
- 12 posi loloso' igi di otaa' inite'vesi/ bokisisi za gohovo'vesi ido'
bokisi velelo' initekisi ido' lavolavo ha'na asi gizikevo
- 13 bokisi mine hite-de minelinekisi/ tevolisi za gohovo'vesi
a'mido' inite' mata' minilizanikisi ido' O'moso'mi velelo'
- 14 mili-dilizani' beleti nesi/ lamu mineline' initekisi a'mida
miniliza inite' matakisi lamusi ido' lamuu' laa' ili uvelisi/
15 ido' unuvo lamine' oga' ine' sokile gizaa' alata nesi za
gohovo'vesi gono'nido' ngele'mizi mili-ngidi hili-ngidaa'
uvelisi ido' unuvo lamine' oga' sokile O'moso gize emaa'
inite' neesi ido' seli mono' numuno gatedo' lavolavo hito
- 16 mineline' neesi/ ido' inite' oloku' gizi nimaa' alatasi ido'
a'minemu' olo' do mino lili holomo ngolo' ngolo' lo neine'
ma bolonidunu' lili' igi za gohovo'vesi a'mida minaa'
inite've mukikisi ido' a'ine noso' iza' lapese nesi a'mine
- 17 lapese do mineline' gizene neesi/ ido' numuno ma hite-de
minaa' lavolavosi ne'mi za posi'vesi ido' posi di ngilaa'
inite'vesi ido' numuno gesi ming'u' dizaa' gatenilo' hite
- 18 mineline' lavolavosi/ ido' numunosi gesisi di minaa' nala'
19 iza' ilizani' posi ngomosi neti nala'inesi lili' ilizave./ Ido'
kekeize lo neine' numungu' gono daakumu' oko'nido' inite'
lamine' tamine' ado' Aaloni' ve gipele zuhosi eveneto'
medeli mini nimani' inite' lehizi-nidaa' gono dalisa iziliza
initekisi lili' ilizave lo lo-ngimine'./

**Mose' Lo-ngimido' Igi
Isilaele' Aleve Seli Mono' Numuno Gizilizangumu'
Inite' Ato Ato' Di Igi Guvelesi Ve Imani' Gamazi**

- 20 Ne'mine lavo Isilaele' aleve muki' nene Mose'ni huli-di
21 vani'./ Ido' neloti' nene lu'ine do ote-ngidine' aleve muki'
ingine igi gilado' gilado' nene Guvelesi ve'mo ogo evene've
ninge-ngedaa' seli numunomukisi ne'mi gono'vemukisi ido'
a'mingu' gono daakumu' kekeize li minilizani' oko'nido'
nitekisi lili' ilizani' inite' nene Guvelesi ve imilisa di ani'./
22 Vene' vemoho' ingine di minani' inite' ngolidunu' lili' ani'
nene ado' gonolise inite' ato ato' ngolidunu' lili' ani' ado'
ga'nido' linisi a'nido' linisi a'nido' nitekisi luvoningu'
initekisi nene di ani'. Ee, engikuti' evene' hamo' hamo' muki'
nene ngoli inite' a'ningu' di igi vigi igi Guvelesi ve lehizi-
23 dani'./ Evene' muki' di minani' minani' inite' gumi kala
nalakisi gulehedise nalakisi gulehe' nalakisi ido' lavolavo
lamine' ido' meme' zopovosi sipisipi vemoholiti losuvo
gulehe' guhise hilanikisi ido' guvo nosou' bulumakaliti
24 losuvo nesi muki' inginela minine' inite' nene di ani'./ Evene'
ma siluva' nehe bolonisi nehe di alizado' milani' muki' ingine
di igi Guvelesi ve lehizi-dani'. Ido' akasiza za numuno gizaa'
gono daato' lisihe' o minine' ma milika' ani'
25 nesi di ani'./ A'mine gono daato' lisihe' i minani' vene' muki'
ingine nala' ato ato' gumi kala nalakisi gulehedise nalakisi
26 gulehe' nalakisi lili' igi di ani'./ Ido' a'mine gidini vene' ma
27 minani' nete meme' zopovodunu' nala' lili' ani'./ Gizebo
ve'ine ingine O'moso imani' inite' lehize-daa' ive naba'mi
losonolo' initekumukisi veleta izeli inite' ngomomukisi
koneliani geheni laminekisi ato ato' geheni laminekisi di
28 ani'./ Ido' lamumukisi di kegesi-ngidi hilaa' uvelimukisi ido'
unuvo lamine' oga' sokile gizaa' initekumu' nesi unuvo

- 29 lamine' iga' inite' ato atokisi uvelisi di ani'./ Isilaele' aleveuti' vene' vemoho' lu'ine'mo do ote-ngedavo Guvelesi ve'mo Mose'ni imine' gonomu' inite' ma di igi imilisa gilani' inite' muki' nene ingine mo ha di igi imani'./

Mose' Aza

**Seli Mono' Numuno Gizaa' Gono Dalizaveti Monovomu'
Lo-ngimine' Gamazi**

(Kul 31:1-11)

- 30 Ne'mine ikevo Mose' aza Isilaele' aleve ti' lo lo-ngimine':
Gililo. Guvelesi aza ve ma gonomu' do kegesede neive.
Ado' Zuda' a'vopilemo' zuhouti' ve Huli' gipele Uli' ei'
- 31 gipele Bezaleli' nene do kegesede neive./ Do kegesede ei'
sikalahu've ei' lulou' gono amuzo molo dalive lo eita imiselo
gala gele ngee lo ato ato' gono do guno daa' amuzo nene mo
- 32 eme neive./ Ado' gala gelo ngolidunukisi siluvatunukisi
33 bolonidunukisi inite' lamine' lolo' oga' amuzosi/ ido' zaveli
geheni huko halizo halizo do ve'ne ve'ne eloo initeto' do
guno ogo molaa' amuzosi ido' za halizo a'mido' luhuvo
lahava iza' amuzosi eme neivo ato ato' inite' ha lolo' ilive./
- 34 Ido' eikisi Dani' a'vopilemo' zuhouti' ve Ahisamaki' gipele
Oholiabu' eikisi nene gono maka' dalizave nene apizi
- 35 ngimilisine' amuzo nene ngeme neive./ Gono ato' ato' ado'
ngolidunu' nehe siluvatunu' nehe nevo'mine initetunu' inite'
lili' iga' amuzosi ido' inite' plenim lamine' igi di lamine' iga'
amuzosi ido' gumi kala nalakisi gulehedise nalakisi gulehe'
nalakisi di ido' lavolavo lamine' di lavolavolo' gonolise
ongotaa' amuzosi ido' lavolavo lili' iga' amuzosi ngemo
ga'ine do ngee lo-ngede neivo ingine inite' ato ato' ha plenim
igi di lamine' igi lili' ilisasive./

Laka'ni 36

1 Bezalelikisi Oholiabukisi gono dalisine' nene Guvelesi
 ve'mo lido' gehepeve e'meti dalisine' o neive. Ido' Guvelesi
 ve'mo kekeize lo neine' numu've gizilizangumu' ve lo evene'
 gohi ma gono ato' ato' dalizado' do lisihe' o-ngidive muki'
 inginesi ei' lido' gehepeve e'meti gono dalizani' o neive lo
 lo-ngimine'./

Isilaele' Aleve Imine' Mili

**Seli Mono' Numuno Gizilisa Inite' Ato Ato Muki' Di Ikevo
 Mose' Aza Gohi Di Amilo Lo Lo-ngimine' Gamazi**

2 Mose' aza Bezalelikisi Oholiabukisi ido' gonou' ve linge
 Guvelesi ve'mo gono daa' amuzo ngimive lu'ine do ote-
 ngidine' muki' nene vise lo igi gono api' igi dalizave lo lo-
 3 ngimine'./ Lo-ngemavo igi evenelite kekeize lo minine' seli
 numuno gizaa' inite' di ani' nene Mosedati' dani'. Dani'za
 nedenga' nedenga' evene' ingine O'moso inite' imilisa gilani'
 4 nene mo di ika' ika' igivo' minani'./ Ne'mine igi minangumu'
 nene kekeize line' seli numuno gizaa' gono dave muki' nene
 5 gono'ninguti' huli/ Mose' neida igi ti' li li-imani': Evene'
 ingine di naani' inite' nene Guvelesi ve'mo dalizave lo
 limine' gono dalonido' vo dosa ivile' ogo maukisi novive li
 6 li-imani'./ Nemu' Mose' nene numungu' numungu' gamazi ti'
 lo lo huline': Venepe vemohope kekeize line' seli
 numudokumu' inite' di naani' ma nene moda ti' ikilo. Ti'
 7 lavo evene' nene inite' gohi ma di amani'./ Inite' di ani' inite'
 nene gono dani' gono nesi di osu' likevo lumosi mineline'
 ine'./

Seli Mono' Numuno Lili' Ani' Gamazi

(Kul 26:1-37)

- 8 Neloti' nene inite' di guno igi lili' iga' ave muki' nete seli numuno'mi lave nene minelive li lavolavo teni'a ma lavolavo laminetunu' lili' igi di bizi badani'. Ido' a'mine lavolavolo' nene gonolise've minelive li gumi kala ne'mine nalakisi gulehedise kala ne'mine nalakisi gulehe' nalakisi diisa nedunu' nene kelubu angeloliti pikisa'ine lili' igi ongotika' ongotika' ani'. A'mine gono do guno oga' iveli'mo
- 9 do guno ine'./ Ido' a'mine badani' lavolavo hamo hamoliti ha'na'ine nene mo hoto'ile 12.6 mita neivo li'nibe'ine nene avito'ile 1.8 mita minine'. A'mine lavolavo muki' nete
- 10 hamoli'mine saisilo' minani'./ A'mine lavolavouti' faif nene di hamo' mili ongoti lumo faif minani' nesi di hamo' mili
- 11 ongotani'./ Ne'mine igi a'mine lavolavo naba sitalitisi lumola minine' lavolavo'mi gahevelo' nene gumi kala
- 12 ne'mine nalatunu' vele ngomo ngomou' ongotani'./ A'mine seli numuno'mi lave mineline' lavolavo hamo' hamoto' nene vele ngomo fifti fifti ongotani'. Ido' a'mine lavolavo naba sita' di lobe' ani' nene a'mine vele ngomo muki' mini'mi limani' nete hamo' makilo' go'ine hizi minika' minika' ani'./
- 13 Ne'mine igi lavolavo naba sita' nene di hamo' ikevo seli mono' numuno nene hamo' lolo' ogo minelingumu' do ogo do hamo' o-daa' nite' ngolidunu' fifti'a ma lili' ani'./
- 14 Ido' a'mine numunolo' hitaa' seli naba lili' ilizangumu' nene lavolavo leveni'a nene memeli'mi zopovodunu' ma lili' ani'./ A'mine lavolavo hamo hamoliti ha'na'ine nene mo hoto'ile 13.5 mita neivo li'nibe'ine nene avito'ile 1.8 mita minine'. A'mine lavolavo muki' nete hamoli'mine saisilo'
- 16 minani'./ A'mine lavolavouti' faif nene di hamo' mili ongoti ido' lavolavo sigisi lumo minani' nene di hamo' mili

- 17 ongotani'./ Ido' di hamo' mili ongotani' lavolavo sitakuti' nene lavolavo heta hamo' hamoto' nene lolovola lolovola nene nalatunu' vele ngomo ngomou' ongotani'. Lavolavo
- 18 hamo' hamoto' nene vele ngomo fifti fifti ongotani'./ Ti' igi seli numuno nene di hamo' ikevo a'mine numuno nuubi' nene hamo' lolo' ogo minelive li di hamo' iga' inite' fifti ma
- 19 bolonisdunu' lili' ani'./ Ido' a'mine numuno hiti minilisine' seli gohi sita' ma lili' ani'. Hamo' ma nene sipisipi vemoholiti losuvo a'mido' pen noso gulehe' hilani' nedunu' nene lili' ani'. Ido' a'mido' gohi hitilizani' seli nene guvo nosou' bulumakaliti losuvodunu' lili' ani'./
- 20 Ido' a'mine seli numuno'mi numuno amuzo've nene
- 21 akasiza zadunu' lili' ani'./ Za posi've hamo' hamo' nene ha'na've 4.5 mita neivo a'mine za posi sita' sita' di hamo' igi numuno amuzo've lili' ani' lohoto' za hamo' hamo' nene
- 22 ha'na've nene 67 sedimita minine'./ Ido' a'muzo've hamo' hamo' nene gizene ngomo sita' sitakisi lili' ani'. Numuno
- 23 amuzo've muki' nene ne'mine monovolo' lili' ani'./ Ido' numuno amuzo've lili' niigi numungu' mino ho' dizaa' ida noningunivo ade hulaa' unida minine' lavemu' nene tuvedi'a
- 24 lili' ani'./ Ido' a'mine numuno amuzoliti gize'ine a'mingu' loloso' igi di otilizani' inite' nene foti'a siluvadunu' lili' ani'. Numuno amuzo've hamo hamoli'mi gala'munguko loloso' igi di otaa' nite' sita' sita' minikesivo numuno amuzoliti
- 25 gize'ine a'mingu' loloso' igi di otani'./ Ido' numuno lave gohi ma adavala miningumu' nene amuzo've tuvedi'a lili' ani'./
- 26 Ido' a'mine initeliti gize'ine a'mingu' loloso' igi di otaa' inite' foti'a nene siluvadunu' lili' ikevo numuno amuzo've hamo hamoli'mi gala'munguko loloso' igi di otaa' nite' sita' sita' minine'./ Ido' hela ho' lemaa' ine' gahevelamu' nene numuno
- 27 lave amuzo've nene sigisi lili' ani'./ Ido' seli numuno mehenela konalo' konalo' nemu' lave amuzo've sita' lili'

- 29 ani'./ Ido' a'mine kona konalo' minasine' amuzo've nene
gala'munguko home lave lingesi di lobe' ani'. Ti' iki veleta
hoze lini ma minida di hamo' ani'. Kona sitata hamoli'mine
- 30 inite' ani'./ Ne'mine ogo lave amuzo've eiti'a mino gize'ine
loloso' igi di otaa' inite' nene 16 minine'. Lave'mi amuzo've
hamo hamoto' sita' sita' minani'./
- 31 Numuno lavela ledó vaa' za nene akasiza zadunu' lili'
32 ani'. Lave helalamu' faif ma lili' ani'./ Ido' helalamu' nene
faif lili' ani'. Ido' ho' lemaa' ida numuno mehenela minine'
33 lavemu' faif ma lili' ani'./ Ido' ledó vine' za numuno
amuzo've oluso' minine' nene oluso' gehepeve neivo lave
a'midoti' dizine' ido' lemo vine' nene mo hamoli'minevo'
minine'. A'mine ledó vine' za nene lave lumo helalati' vo
34 lumo helala nene vo osu' line'./ Lave amuzo've nene
ngolidunu' mili hiti-ngidi a'mido' ledi vani' zava di ngii li
minaakumu' nene di ngii laa' lini ngolidunu' lili' igi milani'.
Ido' a'mine ledi vani' lohoto' zava nesi ngolidunu' mili hiti-
ngidani'./
- 35 Ido' seli numungu' izo hukine' lavolavo nene lavolavo
laminetunu' lili' igi a'mine lavolavolo' nene gumi kala
ne'mine nalakisi gulehedise kala ne'mine nalakisi gulehe'
nalakisi di nedunu' nene kelubu angeloliti pikisa'ine lili' igi
ongotika' ongotika' ani'. A'mine gono do guno oga' iveli'mo
36 dani'./ A'mine lavolavo badaakumu' nene za posi fo'a
akasiza zadunu' lili' igi ngolidunu' mili hiti a'mido' huku
ngolidunu' lili' ani'. Ido' a'mine za posi loloso' igi di otaa'
37 nite' fo'a siluvadunu' lili' ani'./ Ido' a'mine seli numuno'mi
gatedo' hito minelingumu' nene lavolavo lamine' lili' ani'.
A'mine lavolavolo' nene gumi kala nalatunukisi gulehedise
nalatunukisi guluhe' nalatunukisi luhuvo lamine' ongotikevo
38 minine'./ Ido' a'mine lavolavo asi' gizilizangumu' nene za
posi've faif nene akasiza zadunu' lili' igi a'mine posilo' mini


lavolavo di gili' li minilizani' huku nene lili' ani'. Lili' igi za posi veletasi ido' leleho'nosi ngolidunu' mili hitani'. Ido' posi di otilisa a'mingu' hiziliza nite' faif nene bolonisidunu' lili' ani'./

Laka'ni 37

O'moso'mo Lo Huko Lo Gizine' Geheni Milalizani' Bokisi Lili' Ani' Gamazi

(Kul. 25:10-22)

1 Aza Bezalele' akasiza zadunu' bokisi ma lolo' ine'.



2 Ha'na've nene 112 sedimita ve. Ido' li'nibe've ido' dizo
vine' nene 67 sedimita ve./ Luloukisi hetasi nene pipiza'vesi
nomine' ngoli laminetunu' do hitekiné'. A'mida leleho'no
3 nene ngolidunu' vodo vodo ogo molani'./ Ido' ngoli ma do
lala loko a'minedunu' nene gihi di vaa' lini sita've sita've
ne'mine lolo' ogo gizene sita' ve sita' vela nene izine'.

- 4 Helala sita' izo helala sita' izine'./ Ido' za gohovo ne'mine
 nene akasiza zadunu' lolo' ine'. Lolo' ogosa ngolidunu' nene
 5 do hitine'./ Ne'mine ogo gihi di vaa' ani' lini hela hela
 6 nizangu' nene loloso' ine'./ Ido' velelo' nite' nene pipiza'vesi
 nomine' ngoli laminetunu' ha'na've 112 sedimita ido'
 7 gatapa've 67 sedimita nelo' lolo' ine'./ Ido' ngoli nene
 hamadunu' izevo' izevo' ogo kelubu angelo' ne'mine sita'
 lolo' ogo bokisi velelo' nite' lolovo sitata nene ote-
 8 ngimikine'./ Lolo' ogavo velelo' inite' nesi bize hamo' ogosa
 9 minine'./ Ido' a'mine kelubu angelo' sita' nene holoke'ne'ine
 di veleta pateli velelo' niteto' hiti minasine' lolo' o-ngedo
 ve'ine huli hamota igi velelo' inite' nene vonu' bili minasine'
 lolo' ine'./

**O'moso'mi Velelo' Milika' Milika' Ani' Beleti
 Milaa' Ani' Tevoli Lili' Ani' Gamazi**

(Kul. 25:23-30)

- 10 Tevoli akasiza zadunu' 90 sedimita ha'na ido' 45
 11 sedimita gatapa' ido' 67 sedimita dizivo a'mine Bezalele'
 ne'mo ma lolo' ine'./ A'mido' nene pipiza'vesi nomine' ngoli
 laminetunu' hito a'mida leleho'no nene vodo vodo ogo
 12 molani'./ Ido' tevoli vodo vodo ogo gesi ngomo ne'mine 7½
 sedimita dizivo hizo a'mine gesilo' nene ngolidunu' hito
 13 leleho'no nene vodo vodo molani'./ Za gohovo loloso'
 oga' lini sita' ve sita' ve ma lolo' ogo molani'. Gizene
 14 minido' minido' konalo' nene molani'./ A'mine tevoli gihi di
 viliza za gohovo loloso' oga' lini nene gesi ngomolo' bizi
 15 minani'./ Za gohovo nene akasiza zadunu' lolo' ogo
 16 ngolidunu' do hitine'./ Ido' lapesesi peletisi ido' vaini noso
 lepi O'mosola emakumu' kapusi gomisesi nene lolo' ine'.

A'mine inite' pata' nene pipiza'vesi nomine' ngoli
laminetunu' lolo' ine'./

Lamu Milaa' Inite' Lili' Ani' Gamazi

(Kul 25:31-40)

- 17 Ido' Bezalele' aza lamu milaa' inite' pipiza'vesi nomine'
ngoli laminetunu' lolo' ine'. A'mine ngoli nene hamadunu'
izevo' izevo' ogo lamu milaa' niteli'mi zavasi a'navasi nene
lolo' ine'. Ido' lamu milaa' initeto' guvovo nite' ne'mine lolo'
18 ine' nene mo a'mine hamo' ngolidunu' lolo' ine'./ Za a'nava
ne'mine gidini sigisi'a minani' helala sitohamo helala
19 sitohamo./ A'mine za a'nava sigisi hamo hamoto' nene
gonolise inite' amodi za guvovo ne'mine gili vani' sitohamo
20 sitohamo nene minani'./ Lamu milaa' initeli'mi zavalo' nene
amodi za guvovo nite' gili vani' gonolise nite' sita' ve sita'
21 ve ma lolo' ogavo minine'./ Ee, a'mine lamu milaa' initeli'mi
zava hela hela a'nava minasido' minasido' nene ne'mi
gala'muda guvovo gosoholi'mi avile've ne'mine lolo' ine'./
22 Lamu milaa' initeli'mi zavasi a'nava nesi guvovo nite'vesi
nene hamo' nite' minine'. Pipiza'vesi nomine' ngoli lamine'
23 do hamadunu' izevo' izevo' ogo lolo' ine'./ Lamu milaa'
initeto' milalizangumu' nene lamu seveni lolo' ine'. Ido' lamu
viki've di milalizangumu' loto've ido' lapese've nesi
24 pipiza'vesi nomine' ngoli laminetunu' nene lolo' ine'./ Lamu
milaa' initekisi ma inite' nesi lolo' ogo ngoli lamine' geni've
30 kilo ne'minedunu' lolo' ine'./

**Unuvo Lamine' Oga' Ine' Sokile Gizi O'moso Imaa' Alata
Lili' Ani' Gamazi**

(Kul. 30:1-5)

- 25 Unuvo lamine' oga' ine' sokile gizaa' alatanene Bezalele' gohi ma akasiza zadunu' lolo' ine'. Li'nibe've ido' ha'na've nene lisihe' ivosavo' ve, mo 45 sedimitavo' ido' 90 sedimita nene dizo vivo ve. Ido' veleta kona kona'vela bulumakaliti komu ne'mine lolo' ine' nene mo a'mine hamo' zadunukovo' 26 minani'./ A'mine alata nene hela hela mukikisi veletasi ido' komu'vesi nene ngolidunu' hito ngolidunu' leleho'no nene 27 alata do vodo vodo ogo laka'ni molani'./ Ido' hela helamu' nene gihi di viliza za gohovo loloso' oga' lini sita' ngolidunu' ma lolo' ogo laka'ni molani' gala'munguko do 28 gi'mizine'./ A'mine za gohovo nene akasiza zadunu' lolo' ogo ngolidunu' molo hitine'./

**Mono' Gonolo' Do Kekeize Laa' Uvelisi
Unuvo Lamine' Oga' Sokile Oga' Initekisi
Lili' Ani' Gamazi**

(Kul. 30:22-38)

- 29 Ido' sada uveli lili' iga' aveti monovolo' do molo mono' inite' do kekeize laakumu' uveli laminekisi unuvo lamine' oga' ine' sokile gizaa' initekisi lolo' ine'.^a /

^a 37:29 Kul 30:22-38

Laka'ni 38**O'moso Inite' Gizi Imaa' Alata Lili' ani' Gamazi**

(Kul 27:1-8)

- 1 Ido' Bezalele' aza inite' ato ato' lolo' o'mo novo inite' gizi
 O'moso imaa' alata nene akasiza zadunu' ma lolo' ine'.
 Li'nibe've ido' ha'na've nene lisihe' ivosavo' ve, mo 2.25
- 2 mitavo', ido' 1.35 mita nene dizo vivo ve./ Ido' veleta kona
 konala nene bulumakaliti komu ne'mine fo'a minani' nene
 alata nesi hamo' minani'. Ido' a'mine alata vaito' nene
- 3 bolonisdunu' molo hitine'./ Ido' a'mine alatamu' gono
 inite've muki' ado' lani molaa' baketi'vesi ido' savoli'vesi
 vanise do hulaa' lapese'vesi izeu' hizilizani' foku nabasi ido'
 olo' di milaa' lapese've nesi nene bolonisdunu' lolo' ine'./
- 4 Ido' a'mine alatamu' nene olo' do mino lili holomo ngolo'
 ngolo' lo minine' ma bolonisdunu' lolo' ogo do alata do
 vodo vodo o neine' leleho'no gala'munguko alata dizo vida
- 5 oluso' gehepeve molani'./ Ido' a'mine olo' do mino lili
 holomola kona sita've sita'vela nene gehe do vaa' lini ma
- 6 lolo' ogo moloka' moloka' ine'./ Ne'mine ogo akasiza zadunu'
 za gohovo ma lolo' ogo bolonisdunu' izo hitine'./
- 7 Ido' alata gihi di vilizangumu' nene a'mine za gohovo hela
 hela liniu' loloso' ine'. A'mine alata nene za palanidunu'
 bokisi ne'mine lili' ikevo lulouko haza ngolo' lo minine'./

Noso' Izaa' Lapese Naba Lili' Ani' gamazi

(Kul 30:18)

- 8 O'mososi minaa' seli numuno'mi gatedo' gizebo igi
 minaa' ani' veneliti gapogapo'ine bolonisdunu' lili' ani' nene

imikevo do a'mine gapogapotunu' nene noso' izaakumu'
lapese nabasi a'mine lapese do minaa' gizenesi lolo' ine'.^a /

Seli Mono' Numuno'mi Gesi Lili' Ani' Gamazi

(Kul 27:9-19)

- 9 Seli mono' numuno'mi omo' do vodo vodo ogo gesi
hizine'. Ado' ho' lemaa' ida ningi nizavo adavala minine' gesi
nene lavolavo lamine' goloso ha'na've 45 mita nedunu'
10 lolo' ine' / A'mine gesi ne'mi za posi've nene tuvedi mini
posi a'mingu' loloso' igi di otaa' inite' bolonisdunu' lili' ani'
tuvedi nesi minani'. Ido' za posilo' leleho'nosi lavolavo
11 badaakumu' huku've nene siluvadunu' lolo' ine' / Ido' ho'
lemaa' ida niningavo zamela minine' gesi nene lavolavo
lamine' goloso ha'na've 45 mita nedunu' lolo' ogavo
a'mine'mi za posi've tuvedi mini posi a'mingu' loloso' igi di
12 otaa' inite' bolonisdunu' lili' ani' tuvedi nesi minani' / Ido'
omo' gaheve ho' lemaa' ida minine' gesi nene lavolavo
lamine' goloso ha'na've 22.5 mita nedunu' lolo' ogavo ne'mi
za posi've teni mini posi a'mingu' loloso' igi di otaa' inite'
13 bolonisdunu' lili' ani' teni nesi minani' / Ido' ho' dizaa' ida
14 omo' minine' gaheve nene 22.5 mita neivo/ gesi gatani helala
konaloti' oduvine' nene lavolavo ha'na've 6.75 mita nedunu'
lolo' ogavo za posi've sitohamo mini posi a'mingu'
15 loloso' igi di otaa' inite' sitohamo nesi minani' / Ido' gesi
gatani helala konaloti' olomine' nene hamoli'mine minine'.
Gesi gatani hela helala lavolavo ha'na've 6.75 mita nedunu'
lolo' ogavo za posi've sitohamo mini posi a'mingu' loloso'
16 igi di otaa' inite' sitohamo nesi minani' / Ido' a'mine omo'
gahevelo' gesi minido' lavolavo vai' nene lavolavo lamine'

^a 38:8 Kul 30:18

- 17 gidi nani' goloso minine'./ Seli mono' numuno'mi omo' do vodo vodo o-dine' gesi'mi za posi a'mingu' loloso' igi di otaa' nite' nene bolonosidunu' lolo' ogavo za posilo' leleho'nosi huku'vesi nene siluvadunu' lili' ani' minine'. Ido' za posi lolovo'ine nene siluvadunu' molo hito lohoto' zava
- 18 mukikisi siluvadunu' lolo' ine'./ Ido' a'mine omo' gaheve oluso' minine' gatenilo' hito minine' inite' nene lavolavo laminetunu' lolo' ogo a'mido' gumi kala nalatunukisi gulehedise nalatunukisi gulehe' nalatunukisi gonolise luhuvo lahava lamine' izi ongotani'. Ido' a'mine gatenilo' hito minine' inite' ha'na've nene 9 mita neivo omo' gesi
- 19 ne'minosa 2.25 mita dizo vine'./ Ido za posi've fo'a mini posi a'mingu' loloso' igi di otaa' inite' fo'a nesi minani'. A'mine inite' bolonidunu' lili' ani'za za posi lolovo'inesi leleho'nosi siluvatunu' molo hito huku'inesi nene siluvatunu' lolo' ine'./
- 20 Ido' numunosi gesisi di minaa' nala' iza' ani' posi ngomo vai' nesi bolonidunukovo' lili' ani' minani'./

**Seli Mono' Numuno Gizado'
Zusim Ani' Inite' Lingeliti Lisita Gizani' Ne Me Neive**

- 21 Mose' lo-ngedayo ido' Aaloni' gipele Itamala' gizebo o-ngede neivo Levi' a'vopilemo' zuhouti' mono' gono daa' avelite seli mono' numuno ado' O'moso'mo lo huko-ngidine' gamazi gazine' geheni mili nizani' seli numuno gizado' zusim ani' inteliti lisita gizani' ne me neive:/'
- 22 Vani Huli' gipele Uli' gipele Bezalele' aza inite' mata'
- 23 nene Guvelesi ve'mo Mose'ni lo-dido' e'meto lolo' ine'./ Ido' Dani' a'vopilemo' zuhouti' ve Ahisamaki' gipele Oholiabu' ne'mo eikisi gono maka' daa' asive minine'. A'mine ve aza ngolidunu' nehe siluvatunu' nehe nevo'mine initetunu' inite' lolo' oga' ive mino ido' inite' ato ato' lolo' oga' monovo nene

gele guno o minaa' ive mino ido' gumi kala nalakisi
gulehedise nalakisi gulehe' nalakisi do ido' lavolavo lamine'
ma do lavolavolo' gonolise ongotaa' ive minine'./

- 24 Evenelite ngoli ofa di igi ngimikevo kekeize lo minine'
numuno gizaa' gonou' zusimi ani' ne'mi geni've nene 1 tonne
ne'mine minine'. Ido' sigelimi ani' nene haza sigelilo'
- 25 milami mono' gono daveti sigelilokovo' milani'./ Ido'
gulive'ine gizangu' siluva' di ani' nene mono' gono daveti
sigelilo' sigelimi ikevo geni've nene 3½ tonne ne'mine
- 26 minine'./ Neve nene vemoholite gulive'ine gizani' ado'
vemoho' kilisimasi'ine tuvedi ivile' ivo minave muki' ingine
hamo' hamo' igi siluva' *hapu sekeli hapu sekeli [6 gm 6 gm]
di ika' ika' ani'. Ido' a'mine vemoho' gatani' nene mo 603,550
ne'mine minani'.^{a b} /
- 27 A'mine siluvakuti' nene 3 tonne nesi 450 kg nesi di seli
mono' numuno lave'mi posisi ido' a'mine numungu' izo huko
minine' lavolavo di oti minani' posisi a'mingu' loloso' ikevo
di minani' inite' 100 nene lili' ani'. A'mine posi di minani'
inite' hamo' hamo' nene siluva' 34½ kg 34½ kg
- 28 nedunu' lili' ani'./ Ido' siluva' lumo 20 kg minine' nedunu'
nene lavolavo posila di minani' initekisi posilo' leleho'nosi
- 29 lili' igi posi lolovo nene siluvadunu' hiti milani'./ Ido'
evenelite ofa di igi bolonisisi ngimani' ne'mi geni've nene 2
- 30 tonne nesi 443 kg nesi minine'./ Ido' a'mine bolonisdunu'
nene O'mososi minaa' numuno'mi gatenilo' minani' posi
a'mingu' loloso' ikevo di minani' initekisi lolo' ogo ido'

* Sekelisi ido' gela nesi Zuda vete laa' ani' gamazi ve. Laza kilo ido' gram inite' geni'vemu' laa' nouné ne'mini ingine amine gamazi sita' inite' geni'vemu' laa' ani'. Hapu sekeli lune' nene a'mine siluva' geni'vemu' lune' ve. Vanu sekeli ne'mi geni've nene 11 gram ne'mine minine' nenako hapu sekeli ne'mi geni've nene 5 1/2 gram ne'mine minine'. Neve nene moni teni toea ne'mi saisilo' lisihe' neive. Ido' Mose' minine' gameneu' nene siluva' ne'mine geni'vesi nene leli' moni naniketo' lisihe' minine' nehe. Laza moni naba minamine' nene ha gele none'za leli' moni naniketo' lisihe' minine' nehe nene mo gele lamine' amune. Pisin Baibel gizavete K5 ve li gizani' nene gopo angise'ne gilani' makilo' di mili gizani' nolosecive.

^a 38:25-26 Kul 30:11-16

^b 38:26 Mat 17:24

- 31 O'moso imani' inite' oloku' gizani' alata nesi a'mido' olo' do
 mino lili inite' nesi ido' a'mido' lapese've nevo'minesi lolo'
 ogo/ mono' numuno gesi'mi posi mukikisi gesi gatenilo'
 minani' posisi a'mingu' loloso' ikevo di minani' initekisi lolo'
 ogo numuno lavesi gesisi di oti minaa' ani' nala' iza' ani'
 posi ngomo ngomo mukikisi lolo' ine'./

Laka'ni 39

Eveneto' Medeli Mini O'moso Imani' Inite' Lehizi-Daveti Oko'nido' nite' Lili' Ani' gamazi

(Kul 28:1-14)

- 1 Ido' Guvelesi ve'mo Mose'ni lo-dido' e'meti sipisipi
 zopovodunu' lili' ani' nala' ado' gumi kala nalakisi
 gulehedise nalakisi gulehe' nalakisi diisa nedunu' kekeize lo
 neine' numungu' gono daakumu' izilizani' oko'nido' inite'
 lamine' tamine' ongoti lili' igi Aaloni'ni kekeize li minani'
 oko'nolo' inite' neesi lili' ani'./
- 2 Veleta iza' inite' ngomo efod nene ngolidunukisi ido'
 gumi kala nalakisi gulehedise nalakisi gulehe' nalakisi ido'
- 3 lavolavo laminetunu' lili' ani'./ A'mine gono do guno oga'
 iveli'mo a'mine ngoli nene do hamadunu' belevo' belevo' ogo
 pepa avile ne'mine lolo' ogo giteka' giteka'ogo teleti nala'
 ne'mine lolo' ogo a'mine gumi kala nalakisi gulehedise
 nalakisi gulehe' nalakisi do hamo' ogo nedunu' nene
- 4 lavolavo lamine' ongotani'./ Ido' a'mine efod gatana hela
 helala kiso ize gili' loka' iline' inite' sitakisi lili' i-dani'.
 A'mine inite' nene efod ne'mi mehenelasi ido' velelasi izi
- 5 gili' lasine' ve./ Ido' gopololo' do minine' inite' nene efodisi
 di hamo' igi efod lili' ani' inite' ado' ngoli ido' gumi kala
 nalakisi gulehedise nalakisi gulehe' nalakisi ido' lavolavo
 lamine' nedunukisi efod lili' ani' ma'minosavo' di guni igi

lili' ani'. Guvelesive'mo Mose'ni lo-dido' gili mini lisihe' igi
lili' ani'./

- 6 A'mido' nene koneliani geheni ma di va'va' igi a'mine
geheni di gili' li minilisine' inite' lamine' ngolidunu' lili'
angu' nene di gi'mizi mili geheni ngomolo' luhuvo ngomo
ngomo do guno ogo gito gizaa' iveli'mo a'mine geheni sitato'
nene Zakobo' gipele vailiti gulive'ine gito gizavo/
7 ne'mo nene ei' Isilaele' gipele zuhomu' lo gala gala ilive li
Guvelesi ve'mo Mose'ni lo-dido' e'meti veleta izeline' inite'
gatanala kiso iza' ilido' nene milani'./

Aaloni' Losonolo' Izeline' Inite' Lili' Ani' Gamazi

(Kul 28:15-30)

- 8 Aaloni' losonolo' izeline' inite' nene lili' ani'. Veleta
izeline' inite' efod lili' ani' ma'minosa nene a'mine ne'mine
gono do guno ogo daa' iveli'mo ngolisi gumi kala nalakisi
gulehedise nalakisi gulehe' nalakisi ido' lavolavo laminekisi
9 nene do nedunu' lolo' ine'./ A'mine lavolavo nene gatapa'
gangi sita' ikevo lisihe' lamine' sikoea o mino ha'na've 23
10 sedimita neivo li'nibe've nesi 23 sedimita minine'./ A'mido'
nene gonolise've minilizani' * geheni lamine' ato ato' nene
lainim ani'. Laini sita've sita've milani'. Gana' lainilo' nene
lubi geheni mili a'midoti' topazi geheni mili emeladi geheni
11 milani'./ A'midoti' naba tuu lainilo' nene teekoisi geheni
12 mili sahila geheni mili daimoni geheni milani'./ Ido' laini
naba tili malo' nesi nene hiasini geheni mili agate geheni
13 mili ametisi geheni nene milani'./ A'midoti' lumola lainilo'
nene belili geheni mili onikisi geheni mili zasipa geheni
milii ti' igi mili di limani'. A'mine geheni nene losonolo'
initeto' di gili' li di minilizani' inite' nene ngolidunu' lili'

* A'mine gehenimu' lo ngolo' lo laka'ni 28 goholo 17 minime' avile gala'muda gizume' luhuvo nene ningezo.

- 14 ikevo minani'./ A'mine gonolise geheni nene Isilaele'
 gipeleti gulive mine'mo vine' tuvelulo' nene medelo minine'.
 Ee, engi' zuho mulise tuvelu neti gulive hamo' hamo' nene
 geheni tuvelu nelu' gulive'ine sainim iga' gehenilo' giti gizaa'
 ani' ma'minisa giti gizi'mi vani'./
- 15 nGolidunu' lili' ani' teleti di nala' izi losonolo' inite'
 16 nemu' seni nalava ma lili' ani'./ nGolidunu' geheni di gili' li
 minilisine' inite' sitakisi lini ne'mine inite' sitakisi lili' igi lini
 sita' nene a'mine losonolo' initetu' veleta minine' gaheve
 17 hela hela konalo' di gi'mizani'./ Di gi'miziki a'mine lini
 18 sitato' nene ngolidunu' lili' ani' nala' sita' nene izani'./ Iziki
 a'mine nala' sitalitisi lolovo nene geheni di gili' laa' inite'
 sitato' izani'. Ne'mine ikevo ne'mo a'mine losonolo' inite'
 nene veleta izeline' inite' efod gatanalo' initetu' gili' lo
 19 minine'./ Ne'mine igi gohi lini sita' nene ngolidunu' lili' igi
 a'mine losonolo' initeli'mi gaheve gala'muda efod nelu' bizo
 20 minelida hela hela konalo' nene di gi'mizani'./ Ne'mine igi
 gohi lini sita' nene ngolidunu' lili' igi gatanalo' inite' ne'mo
 lemo vine' gahevela veleta izeline' inite' efod leme vo
 gopololo' nene no'novo minelida nene di gi'mizani'./
- 21 Ne'mine igi gumi kala nala' di losonolo' initeli'mi gaheve
 gala'muda minasine' linilo' iziki veleta izeline' inite' efod
 leme vo gopololo' nene no'novo minelida minasine' linilokisi
 izani'. Ido' ne'mine ani' nene a'mine losonolo' inite' nene
 apasamilingumu' ve li ne'mine ani'. Ne'mine ani' ne'mo
 Guvesesi ve'mo Mose'ni lo-dine' gamazi nene gili dani' ve./

**Eveneto' Medeli Mini O'moso Imani' Inite' Lehizi-daa' Aveti
 Oko'nido' Inite' Linge Ma Lili' Ani' Gamazi**

(Kul 28:31-43)

- 22 Efod lulouko izeline' inite' delesi gele vine' nene gumi

- 23 kala lavolavodunukovo' ma lili' ani'./ Oluso' nene godolomu' ngolo' ma lo minine'. Ido' hikelalive li a'mine ngolo' nene patenimu' ngolo' lani' ongotaa' ani' ne'mino ongoti vodo
- 24 vodo igi di guni' ani'./ A'mine inite' gala'muda neine' gahevela nene pomigalaneti za gihile gele vine' ne'mine gumi kala nalatunukisi gulehedise nalatunukisi ido' gulehe' nalatunukisi ongoti vodo vodo ani'./ Ne'mine igi ngolidunu' pelo' ngomo lili' igi delesi gahevela pomigalaneti gihile vovou' vovou' nene di vodo vodo igi milika' milika' ikevo/
- 26 pomigalaneti gihile gala gala ido pelo' gala gala mini a'mine delesi gele vine' initeli'mi gala'muda velelo' nene vodo vodo igi minani'. Mono' gono've dalo ma Aaloni' nene a'mine inite' do izosa gono've dalive li Guvelesi ve'mo Mose'ni lo-dine' gamazilo' gili dani' ve./
- 27 Aalonikisi ei' gipele zuhosi iziliza sioti ha'na nene
- 28 lavolavo lamine' golosotunu' lili' i-ngidani'./ Aaloni' godololo' liko liko angili' ne'mine gehaa' ine' lavolavosi gipele angili' ha'na dizani' gihaa' anikisi ido' gopo'nido' initekisi ido' lulouko izaa' ani' talasisi li'nibe neesi lavolavo
- 29 laminetunukovo' lili' i-ngidani'./ Ido' gopololo' liko leti ne'mine izeline' lavolavo nene lavolavo laminetunu' lili' igi ne'mi gonolise've nene gumi kala nalatunukisi gulehedise nalatunukisi gulehe' nalatunukisi ongotani'. Ne'mine ani' nene Guvelesi ve'mo Mose'ni lo-dine' gamazilo' gili disa ne'mine ani'./
- 30 Ma nene O'mosola kekeize li minani' nene do soto' oga' ine' inite' guvovo gele vine' gonolise nite' ma ngolidunu' lili' igi a'mido' nene geheni ngomolo' gulive'ine gizaa' ani' ne'mine luhuvo ti' li gizani' ve: Guvelesi vemu' kekeize lo
- 31 neive./ Ne'mine igi Guvelesi ve'mo Mose'ni lo-dine' gamazilo' gili di Aaloni' madunolo' angili' ne'mi velela nene gumi kala nalatunu' nalava izani'./

Seli Mono' Numuno Gizaa' Gono Nene Di Pilani' Gamazi

(Kul 35:10-19)

- 32 Ne'mine igi seli mono' numuno ado' O'mososi minaa' numuno gizaa' gono nene di pilani'. Isilaele' aleve a'mine gono dani' nene mo Guvelesi ve'mo Mose'ni lo-dine'
- 33 gamazilo' gehepeve e'metisa nene di pilani'./ Gono di pili a'mine seli numunosi inite've ato ato' vaikisi di igi Mose'ni imani'. Ado' inite' di gili' laa' inite'vesi amuzo'vesi za gohovo'vesi za posi'vesi posi monovo di minaa' ani'
- 34 inite'vesi/ numudo' hitaa' ani' seli gulehe' sipisipi vemoholiti losuvodunu' lili' anikisi a'mido' gohi hitaa' ani' seli guvo nosou' bulumakaliti losuvodunu' lili' ani' selisi ido'
- 35 numungu' izi hukaa' ani' lavolavosi/ bokisi a'mingu' O'moso'mo lo huko line' gamazi gizine' geheni minine'
- 36 bokisisi za gohovo'vesi ido' bokisi velelo' initekisi/ ido' tevoli neesi a'mido' minaa' ani' gono inite' neesi O'moso'mi
- 37 velelo' milaa' ani' beletisi/ ido' lamu milaa' inite' ngoli laminetunu' lili' ani' neesi lamu'vesi a'mida minaa' ani' inite'
- 38 mukikisi lamuliti uveli neesi/ ido' ngolidunu' lili' ani' alatasi gonolo' di oti-ngidilisamu' hili-ngidaa' ani' uvelisi ido' gizikevo unuvo lamine' oga' ine' initekisi ido' seli numuno
- 39 gatenilo' hite minaa' ine' initekisi/ O'moso imani' inite' oloku' gizaa' ani' alata bolonisidunu' lili' ani' neesi a'mido' olo' do mino liline' inite' neesi za gohovo'vesi ido' a'mine alatalo' lapese've nevo'minesi noso' iza' lapese nabasi
- 40 a'mine lapese do minaa' gizenesi/ seli numuda gesilo' lavolavosi a'mine gesilo' za posisi ido' posi do minaa' inite'vesi gesi gatenilo' hite minaa' inite'vesi, posi di oti minaa' ani' nala'vesi ido' a'mine nala' iza' ani' posi ngomo ngomosi ido' a'mine seli numuno O'mososi minaa' numuno

- 41 minine' ne'mi gono daa' inite've muki' neesi/ ido' a'mine
numungu' gono dalisa iza' ani' inite' ongotani' ado' evene'
O'moso imani' inite' lehize-daa' gono dalisa Aaloni' ei'
oko'nolo' inite' kekeize li minani' iza' inekisi ei' gipele
- 42 oko'nido' iza' ani' inite'inesi di igi Mose'ni imani'./ Isilaele'
aleve ingine Guvelesi ve'mo Mose'ni lo-dine' gamazilo'
- 43 e'metisa a'mine gono vai' di pilani'./ Ne'mine ikevo Mose'
aza dani' inite' nene mono ningo ingine Guvelesi ve'mo
lidokovo' gili di di osu' lani' nene ningo no'noho' ize-
ngidine'./

Laka'ni 40

**Mose' Aza O'mososi Minaa' Seli Numuno Do otavo
A'midokisi Inite've Vaitokisi A'mingu' Gono Dalizavelokisi
O'moso'mi Gonolo' Do Kekeize Laa' Uveli Hilani' Gamazi**

- 1, 2 Guvelesi ve'mo Mose'ni ti' lo lo-imine':/ Ike'ni naba vanu
ne'mi dei naba vanu ogavo ma seli mono' numuno
- 3 O'mososi minaa' numuno nene di otilisave./ A'mingu' nene
naza lo huko lo-lingiduvoni' gamazi gizekuvoni' geheni
neine' bokisi di mili a'mido' lavolavo naba izi huki izi
- 4 hitilo./ Ne'mine igi tevoli di igi mili a'mido' miniliza nite'
nene di lisihe' igi milalo. Neloti' nene lamu milaa' nitekisi
di igi mili lamu've a'mido' di milalo./ Ne'mine igi unuvo
- 5 lamine' oga' neine' sokile gizaa' alata ngolidunu' mili hitani'
nene di igi kekeize gehepeve lo neine'lumuu' di dizami
lavolavo heta lo huko lo-lingiduvoni' gamazi gizekuvoni'
geheni neine' bokisi ne'mi velela milii seli numuno gatenilo'
- 6 hite minaa' inite' nene ebe'velo' di milalo./ Miliki O'moso
imani' inite' oloku' gizaa' alata nene seli mono' numuno
- 7 O'mososi minaa' numuno gateni'mi velela di milalo./ Noso'
iza' lapese naba nene di igi O'mososi minaa' numunosi

- 8 alatasi oluso' mili a'mingu' noso ohizi vai' lilo./ Ne'mine igi
gesi nene di vodo vodo igi hizi ne'mi gatenilo' hite mineline'
inite' nene milalo./
- 9 Neloti' nene mono' gonomu' do kekeize laa' uveli nene di
a'mine seli mono' numudokisi a'mingu' inite' mukitokisi hili
di kekeize lilo. Ne'mine ilizadoti' nene a'mine inite' muki'
10 nene mo kekeize li minilisave./ Evene' nete nimani' inite'
oloku' gizaa' alatalokisi ne'mi gono nite'velokisi uveli hilalo.
Ne'mine ilizadoti' nene mo kekeize gehepeve lo
11 mineleseive./ Ne'mine igi noso' iza' lapese nabalokisi
a'mine lapese do minaa' neine' gizenelokisi nene uveli hili di
kekeize lilo./
- 12 Aalonikisi gipele zuhosi ngele'mizi O'mososi minaa'
numuno gatenilo' igi a'mida nene engi' oko'ine haza
13 nosodunu' noso' izilo./ Noso' iziki Aaloni'ni kekeize li
nizani' oko'nolo' inite've nene di ngili-di nenikumu' gono
doo nimani' inite' lehize-nedaa' ilive minelingumu' ve li
14 uveli hili-di di oti-dilo./ Ne'mine igi ei' gipele nene
15 ngele'mizi igi sioti'ine ha'na di izi-ngidi/ me'nibine uveli
hili-dani' ne'mine igi engikisi uveli hili-ngidikevo inginesi
evene' nimani' inite' lehizi-nidilizave minilizave. Ne'mine
ilizadoti' nene gana' api' ogo inite' lehize-nedaa' zuho soto'
ogavo inginesi engi' nga'vopilemo' soto' i'mi vi
minilizanikisi a'mine gono di-nidi minilizani' nene mo
minevo' minevo' ogovo' mineleseive./
- 16 Mose' aza inite' muki' nene Guvelesi ve'mo lidi'mine
17 lidi'mine ogo dani'./ Ido' Aigita misubo huli adoti' kilisimasi
hamo' ogo vavo kilisimasi naba tuu ne'mi gana' ike'ni dei
vanu nelo' nene seli mono' numuno nene api' igi di otani'./
18 Ee, Mose' nene seli numuno nene do hamo' hamo' ogo do
hizine'. Ado' numuno amuzo'vesi za posi'vesi di minaa' ani'

- inite' nene ebe'nido' moloka' moloka' ogo numuno amuzo
 nene a'mingu' loloso' ogo lohoto' zasi do gi'mizo za posi do
 19 ote-ngedo/ numuno seli've a'mido' do patelo hito a'mido'
 velete' hito minaa' ine' nite' do hito Guvelesi ve'mo
 20 lidi'mine lidi'mine ogo osu' line'./ Ti' ogo O'moso'mo lo
 huko gizine' geheni gatapa' sita' nene do bokisi lulou'
 molani'. Za gohovo loloso' oga' inite' bokisilo' miningu' nene
 za gohovo sita' loloso' ogo velelo' inite' nene do
 21 hitine'./ Seli numuno ezauko bokisi nene do duvo molo
 bokisi velela do hitaa' lavolavo ma nene asi' gizine'. Ne'mine
 ogo bokisi nene mine hite-de minelive lo Guvelesi ve'mo lo-
 dido' lavolavo do hitine' ve./
 22 Ido' tevoli nene seli mono' numuno lulou' do dizo oluso'
 zamela gahevela numuno izo hukine' lavolavo heta molani'./
 23 Ido' Guvelesi ve'mo lo-didi'mine ogo beleti ma do dizo
 24 a'mine tevolilo' molokine'./ Ido' lamu milaa' inite' nene seli
 mono' numuno lulou' do dizo tevoli minine' helala adavala
 25 molani'./ Molosa a'mido' nene Guvelesi ve'mo lo-didi'mine
 26 ogo ei' Guvelesi ve'mi velelo' lamu nene molani'./ Ido'
 ngolidunu' lili' ani' alata nene lavolavo asi' gizikani' velelo'
 27 nene do dizo molo/ a'mido' nene Guvelesi ve'mo lo-
 didi'mine ogo unuvo lamine' oga' ine' sokile nene gizine'./
 28 Ido' seli mono' numuno'mi gatenilo' hite mineline' inite'
 29 nene ebe'velo' do otine'./ Ido' O'moso inite' imani' oloku'
 gize emaa' alata nene O'mososi minaa' seli mono' numuno
 gateni'mi velela do molo a'mido' nene Guvelesi ve'mo lido'
 ogo olotunu' gizo osu' laa' ofasi ido' palauva' ofasi gizo
 30 imine'./ Ido' a'nine noso' izilizangumu' ve lo lapese naba
 nene seli mono' numunosu' O'moso imani' inite' oloku' gizaa'
 alatasi oluso' do molo a'mingu' nene noso ohizo molani'./
 31- Ne'mine ogavo Guvelesi ve'mo Mose'ni lo-dine' ne'mine igi

- 32 Mose' ve Aaloni' ve gipele ingine seli mono' numungu' dizilisa ahe ido' alatala gono dalisa ahe ani' nene a'mine
- 33 lapeseu' a'nine gize'ine noso' izi hulisavo' nene dizi daa' ani'./ Ido' Mose' aza seli mono' numunosi alatasi do vodo vodo ogo gesi hizo gesi gatenilo' hite minaa' ine' inite' do oto molani'. Ne'mine ogo gono nene do piline'./

**Limusosi O'moso'mi Labana'vesi
Seli Mono' Numudo' Minaa' Asine' Gamazi**

(Nab 9:15-23)

- 34 Ne'mine ogo gono nene do nopilivo limusoli'mo O'mososi minaa' numuno nene molo hitavo Guvelesi ve'mi labana've nene a'mine seli mono' numungu' lemo vai' line'.^a/
- 35 Ne'mino limusoli'mo ha molo hito minavo Guvelesi ve'mi labana've nene a'mine seli mono' numungu' lemo vai' line'
- 36 ne'mo Mose' nene a'mingu' dizo vamine' ine'./ Ido' Isilaele' aleve aka monika' monika' nangu' nene ingine a'mine limuso ne'mo seli mono' numuno molo hite minaa' idoti' dizo voka' voka' idokovo' nene seli numu'ine di gangi oti
- 37 limuso e'meti vika' vika' ani'za/ dizo vamine' gameneu' nene minadokovo' mini aka visa'mani'. Ne'mine igi limuso'mo
- 38 ido' idokovo' ningi mini e'metani'./ Ido' ne'mine ani' nene nemu' ani' ve. A'mine limuso ne'mo nene seli mono' numuno molo hito mino go' lo minido' ha soto' ogo mino ido' holuka' liti'muso ize miningu' nene a'mine limusoli'mi lulouti' olo' lo minaa' ine'. Ne'mo nene Isilaele' aleve aka vika' vika' ani' gamene muki' nene a'mine limuso nene soto' minivo ha ningaakovo' igi minani' ve./

^a 40.34 | Kin 8:10-11; Isa 6:4; Ezek 43:4-5; Lev 15:8